

दूसरा राजा

अहज्याह बरे सँदिसा

1 अहाब क मरइ क पाछे मोआब इस्त्राएल क हुकूमत स अजाद होइ गवा।

2 एक दिना अहज्याह सोमरोन में अपने घरे क छत पइ क ऊपर क कमरा क जंगले में स गिर गवा। उ बुरी तरह घायल होइ गवा। अहज्याह सँदिसवाहक क बोलाएस अउ ओनसे कहेस, “एक्रोन क देवता बालजबूब क याजकन क लगे जा। ओनसे पूछा कि का मई अपनी चोटन स तन्दुरूस्त होइ सकबा।”

3 किन्तु यहोवा क दूत तिसबी एलिय्याह स कहेस, “राजा अहज्याह सोमरोन स कछू सँदिसवाहक पठएस ह। जा अउर एन लोगन स मिला। ओनसे इ कहा, ‘इस्त्राएल में परमेस्सर अहइ। तउ तू लोग एक्रोन क देवता बालजबूब स सवाल करइ काहे जात अहा? 4 राजा अहज्याह स इ सबइ बातन कहा: यहोवा कहत ह: तू अपने बिछउना स उठि नाहीं पउब्या। तू मरब्यो।” तब एलिय्याह चल पड़ा अउर उ अहज्याह क सेवकन स इहइ सब्ब कहेस। 5 सँदिसवाहक अहज्याह क लगे लौटि आएन। अहज्याह सँदिसवाहकन स पुछेस, “तू लोग एँतना हाली काहे लउट्या?”

6 सँदिसवाहकन अहज्याह स कहेन, “एक तु मनई हम स भेंटइ आवा। उ हम लोगन स उ राजा क लगे वापस जाइ क कहेस जउन हमका पठए रहा अउर ओहसे यहोवा जउन कहेस, उ कहइ क कहेस, ‘इस्त्राएल में एक परमेस्सर अहइ। तउ तू एक्रोन क देवता बालजबूब स सवाल करइ बरे सँदिसवाहकन क काहे पठया। काहेकि तू इ किहा ह इ कारण तू अपने बिछउना स नाहीं उठब्या। तू मरब्या।”

7 अहज्याह सँदिसवाहकन स पूछेस, “जउन मनई तोहसे मिला अउर जउन तोहसे अइसा कहेस उ कइसा देखोइ पड़ता रहा?” 8 सँदिसवाहकन अहज्याह स कहेन, “उ मनई क बदन पइ बहोत बार रहा अउर अपनी कमर में एक तु चमड़ा क पेटी बाँधे रहा।” तब अहज्याह कहेस, “इ तिसबी एलिय्याह अहइ।”

अहज्याह क जरिये पठए गए फउजियन

क आगी नस्ट करत ह

9 अहज्याह एक तु सेनापति अउर पचास मनइयन क एलिय्याह क लगे पठएस। सेनापति एलिय्याह क लगे गवा। उ समइ एलिय्याह एक तु पहाड़ी क चोटी पइ बइठा रहा। सेनापति एलिय्याह स कहेस, “परमेस्सर क जन राजा क आदेस अहइ, ‘खाले आवा।”

10 एलिय्याह पचास फउजियन क सेनापति क जवाब दिहस, “जदि मई परमेस्सर क जन हउँ तउ सरग स आगी

भहराइ पड़इ अउर तोहका एवं पचास फउजियन क नस्ट कइ देइ।”

एह बरे सरग स आगी गिर पड़ी अउर उ सेनापति अउ ओकरे पचास मनइयन क नस्ट कइ दिहस।

11 अहज्याह दूसर फउजी अउ पचास फउजियन क पठएस। सेनापति एलिय्याह स कहेस, “परमेस्सर क जन राजा क आदेस अहइ ‘हाली खाले आवा।”

12 एलिय्याह सेनापति अउर ओकरे पचास फउजियन स कहेस, “जदि मई परमेस्सर क जन हउँ तउ सरग स आगी भहराइ पड़इ अउर उ तोहका अउ तोहरे पचास फउजियन क बर्बाद कइ देइ।” परमेस्सर क आगी सरग स गिर पड़ी अउर सेनापति एवं पचास फउजियन क बर्बाद कइ दिहस।

13 अहज्याह तीसरे सेनापति क पचास फउजियन क संग पठएस। पचास फउजियन क सेनापति एलिय्याह क लगे आवा। सेनापतियन घुटनन क बल झुक कइ पराथना किहस, “हे परमेस्सर क जन मई तोह स पराथना करत हउँ, कृपा कइके मोर जिन्नगी अउ मोर एन पचास सेवकन क जिन्नगी क अपनी निगाह में मूल्यवान मानई। 14 सरग स आगी गिर पड़ी अउर पहिले दुइ सेनापतियन अउ ओनके पचास फउजियन क उ बर्बाद कइ दिहस। किन्तु अब कृपा करई अउर हमका जिअत रहइ देई।”

15 यहोवा क दूत एलिय्याह स कहेस, “सेनापति क संग जा। ओहसे डेराअ जिन।” एह बरे एलिय्याह सेनापति क संग राजा अहज्याह क लखइ गवा। 16 एलिय्याह अहज्याह स कहेस, “इस्त्राएल में परमेस्सर अहइ ही, तउ भी तू सँदिसवाहकन क एक्रोन क देवता बालजबूब स सवाल करइ काहे पठया? काहेकि तू इ किहा ह, इ कारण तू अपने बिछउना स नाहीं उठब्या। तू मरब्या।”

यहोराम, अहज्याह क जगह लेत ह

17 अहज्याह वइसे ही मरा जइसा यहोवा एलिय्याह क जरिये कहे रहा। अहज्याह क कउनो पूत नाहीं रहा। एह बरे अहज्याह क पाछे यहोराम नवा राजा भवा। यहोराम यहूदा क राजा यहोसापात क पूत यहोराम क राजकाल क दूसरे बरिस हुकूमत करब सुरू किहस। 18 अहज्याह जउन दूसर कारज किहस उ सबइ “इस्त्राएल क राजा लोगन क इतिहास” क किताबे में लिखे गए अहई।

एलिय्याह क अपने लगे लेइ क यहोवा क योजना

2 इ लगभग उ समइ रहा जब यहोवा एक हाव क चक्रवात क जरिये एलिय्याह क सरग में लइ जाइवाला रहेन। एलिय्याह एलीसा क संग गिलगाल गवा।

2एलिय्याह एलीसा स कहेस, “कृपा कइके हिअई रूका, काहेकि यहोवा मोका बेतेल जाइ क कहेस ह।”

किन्तु एलीसा कहेस, “मई यहोवा अउर तोहार जिन्नगी क किरिया खाइके प्रतिग्या करत हउँ कि तोहार क संग नार्ही छोड़ब।” एह बरे दुइनउँ लोग बेतेल तलक गएन।

3बेतेल क नबियन क समूह एलीसा क लगे आवा अउर उ एलीसा स कहेस, “का तू जानत अहा कि आजु तोहरे सुआमी क यहोवा तोहसे अलग कइके लइ जाइ?”

एलीसा कहेस, “हाँ, मई एका जानत हउँ। इ बारे मैं बातन न करा।”

4एलिय्याह एलीसा स कहेस, “मेहरबानी कइके हिअँ ठहरा काहेकि यहोवा मोका यरीहो जाइ क कहेस ह।”

किन्तु एलीसा कहेस, “मई यहोवा अउर तोहार जिन्नगी क किरिया खाइके प्रतिग्या करत हउँ कि मई तोहार संग नार्ही तजब।” एह बरे दुइनउँ लोग यरीहो गएन।

5यरीहो क नबियन क समूह एलीसा क लगे आवा अउर उ पचे ओहसे कहेन, “का तोहका मालूम अहइ कि यहोवा आजु तोहरे सुआमी क तोहसे दूर लइ जाइ।”

एलीसा कहेस, “हाँ, मई एका जानत हउँ। इ बारे मैं बातन न करा।”

6एलिय्याह एलीसा स कहेस, “मेहरबानी कइके हिअँ ठहरा काहेकि यहोवा मोका यरदन नदी तलक जाइ क कहेस ह।”

एलीसा जवाब दिहस, “मई यहोवा अउर तोहार जिन्नगी क किरिया खाइके प्रतिग्या करत हउँ कि मई तोहार क संग नार्ही तजब।” एह बरे दुइन मनई चलत रहेन।

7नबियन क समूह मैं स पचास मनइयन ओनकर अनुसरण किहना। एलिय्याह अउर एलीसा यरदन नदी पइ रूक गएन। पचास मनई एलिय्याह अउर एलीसा स कछू दूर खड़े रहेन। 8एलिय्याह आपन अंगरखा उतारेस, ओका तह किहस अउर ओहसे पानी पइ चोट किहस। पानी दाई कइँती बाई कइँती क फट गवा। एलिय्याह अउर एलीसा झुरान भुईया पइ चलिके नदी क पार किहस।

9जब उ पचे यरदन नदी क पार कइ लिहना तब एलिय्याह एलीसा स कहेस, “एहसे पहिले कि परमेस्सर मोका तोहसे दूर लइ जाइ, तू का चाहत अहा कि मई तोहरे बरे करउँ।”

एलीसा कहेस, “मोका तोहार आतिमा क दुईगुणा हीसा द्या।”

10एलिय्याह कहेस, “तू कठिन चीज माँग्या ह। जदि तू मोका उ समइ लखब्या जब मोका लइ जावा जाइ तउ उहइ होइ। किन्तु जदि तू मोका नार्ही लखि पउव्या तउ उ नार्ही होइ।”

परमेस्सर एलिय्याह क सरग मैं लइ जात ह

11एलिय्याह अउर एलीसा एक संग बातन करत भए टहरत रहेन। अचानक कछू घोड़न अउर एक ठु रथ आवा अउर उ पचे एलिय्याह क एलीसा स अलग कइ दिहेन। घोड़न अउर रथ आगी क तरह रहेन। तब एलिय्याह एक ठु बौड़र मैं सरग क चला गवा।

12एलीसा एका लखेस अउर जोर स गोहराएस, “मोर बापा। मोर बापा। इस्त्राएल क रथ अउर ओकर घोड़सवार फउजी।”

एलीसा एलिय्याह क फुन कबहुँ नार्ही लखेस। एलीसा आपन आपन ओढ़नन क मूठी मैं भरेस, अउर आपन सोक परगट करइ बरे, ओनका फार ड्राएस। 13एलिय्याह क अंगरखा भुईया पइ गिर पड़ा रहा। एह बरे एलीसा ओका उठाइ लिहस। फुन उ वापिस आएन अउर यरदन नदी क किनारे पइ खड़ा होइ गवा।

14एलीसा एलिय्याह क अंगरखा लिहस, जउन भुईया पइ गिर गवा रहा। एलीसा एका पानी पइ चोट किहस अउर कहेस, “एलिय्याह क परमेस्सर यहोवा, कहाँ अहइ?” जइसेन ही एलीसा पानी पइ चोट किहस, पानी दाई अउर बाई कइँती फट गवा अउर एलीसा नदी पार किहस।

नबी एलिय्याह क माँग करत हीं

15जब यरीहो क नबियन क समूह एलीसा क लखेस, उ पचे कहेन, “एलिय्याह क आतिमा अब एलीसा पइ अहइ।” उ पचे एलीसा स मिलइ आएन। उ पचे एलीसा क समन्वा खाले भुईया तलक प्रणाम करइ निहुरेन। 16उ पचे ओहसे कहेन, “लखा, हम अच्छे खासे पचास मनई अही। मेहरबानी कइके एका जाइ द्या अउर अपने सुआमी क हेरइ द्या। होइ सकत ह यहोवा क सवती एलिय्याह क ऊपर लइ लिहे होइ अउर ओका कउनो पर्वत या घाटी मैं भहराइ दिहे होइ।”

मुला एलीसा जवाब दिहस, “नार्ही, एलिय्याह क खोज बरे मनइयन क जिन पठवा।”

17नबियन क समूह एलीसा स एतना जियादा पराथना किहस, कि उ उलझन मैं पइ गवा। तब एलीसा कहेस, “ठीक अहइ, एलिय्याह क खोज मैं मनइयन क पठइ द्या।”

नबियन क समूह पचास मनइयन क एलिय्याह क खोज बरे पठएस। उ पचे तीन दिन तलक खोज किहेन मुला उ पचे एलिय्याह क न पाइ सकेन। 18एह बरे उ सबइ लोग यरीहो गएन जहाँ एलीसा ठहरा रहा। उ ओन लोगन स कहेस, का मई तोहसे न खोजइ बरे नार्ही कहे रहा।

एलीसा पानी क सुद्ध करत ह

19नगर क बसइया लोग एलीसा स कहेन, “महोदय, आप अनुभव कइ सकत हीं कि इ नगर सुन्दर ठउर मैं अहइ। किन्तु हिअँ पानी बुरा अहइ। इहइ कारण अहइ कि भुईया मैं फसल क उपज नार्ही होत।”

20एलीसा कहेस, “मोरे लगे एक ठु नवा खोरा लिआवा अउर ओहमा नून रखा।”

लोग नवा खोरा क एलीसा क लगे लइ आएन। 21तब एलीसा उ ठउरे पइ गवा जहाँ पानी भुईया स निकरत रहा। एलीसा नून क पानी मैं लोकाइ दिहस। उ कहेस, “यहोवा कहत ह, ‘मई इ पानी क सुद्ध करत हउँ। अब, मई इ पानी स कउनो क मरइ नार्ही देब, अउर न ही भुईया क अच्छी फसल देइ स रोकेब।’”

22पानी सुद्ध होइ गवा अउर पानी अब तलक भी सुद्ध अहइ। इ वइसा ही भवा जइसा एलीसा कहे रहा।

कछू लरिकन एलीसा क मजाक उड़ावत हीं

23उ नगर स एलीसा बेतेल गवा। एलीसा नगर कँइती पहाड़ी पइ चलत रहा जब कछू लरिकन नगर स खाले आवत रहेन। उ पचे एलीसा क मजाक उड़ावइ लागेन अउर उ पचे कहेन, “हे गंजे, तू ऊपर चढ़ि जा। हे गंजे तू ऊपर चढ़ि जा।”

24एलीसा मुड़िके ओनका लखेस। उ यहोवा स बिनती किहेस कि ओनके संग बुरा होइ। उहइ समइ जंगल स दुइ ठु रीछ आइके ओन लरिकन पइ हमला किहन, हुवाँ बयालीस लरिकन रछिन क जरिये फार दीन्ह गएन।

25हुवाँ स एलीसा कम्मेल पर्वत पइ गवा, ओकरे पाछे उ वापिस सोमरोन क गवा।

यहोराम इस्त्राएल क राजा बना

3 अहाब क पूत यहोराम सोमरोन में इस्त्राएल क राजा बना। यहोसापात क यहूदा पई राजकाल क अट्टारहवें बरिस में यहोराम राज्ज करब सुरू किहेस। यहोराम बारह बरिस तलक इस्त्राएल पई राज किहेस। यहोराम उ सब किहेस जउन यहोवा क निगाह में बुरा अहइ। परन्तु यहोराम अपने महतारी बाप क तरह न रहा काहेकि उ उ स्तम्भ क दूर कइ दिहस जउन ओकर बाप बाल क पूजा बरे बनवाए रहा। 3परन्तु उ नबात क पूत यारोबाम क अइसे पापन क, जइसे उ इस्त्राएल स भी कराएस, करत रहा अउर ओनसे न फिरा।

मोआब इस्त्राएल स अलग होत ह

4मेसा मोआब क राजा रहा। ओकरे लगे बहोत बोकुरियन रहिन। मेसा एक लाख मेमनन अउर एक लाख भेड़ा क ऊन इस्त्राएल क राजा क भेटेंस। 5मुला अहाब क मउत क पाछे मोआब क राजा इस्त्राएल क राजा क बिरूद्ध बिद्रोह कई दिहेस।

6तब राजा यहोराम सोमरोन क बाहेर निकरा अउ उ इस्त्राएल क सबहिं मनइयन क बटोरेस। 7यहोराम यहूदा क राजा यहोसापात क लगे संदेसवाहक पठएस। यहोराम कहेस, “मोआब क राजा मोर बिरूद्ध बिद्रोह कई दिहा ह। का तू मोआब क खिलाफ जुद्ध करइ मोरे संग चलब्या?”

यहोसापात कहेस, “हाँ, मई तोहरे संग चलब। हम दुइनउँ एक फउज क तरह मिल जाब। मोर फउज तोहकरे फउजियन जइसे होइहीं। मोर घोड़न तोहरे घोड़न जइसे होइहीं।”

एलीसा स तीन राजा सलाह माँगत हीं

8यहोसापात यहोसाराम स पूछेस, “हमका कउने राहे स चलइ चाही? “यहोराम कहेस, “एदोम क मरूस्थल क रास्ता स।”

9एह बरे इस्त्राएल क राजा यहूदा अउ एदोम क राजा लोगन क संग गवा। उ पचे लगभग सात दिन तलक

चारिहुँ कइँती घूमत रहेन। सेना व ओनके गोरूअन बरे पर्याप्त पानी नाहीं रहा। 10आपिर मैं इस्त्राएल क राजा यहोराम कहेस, “ओह, यहोवा फुरइ ही हम तीनहुँ राजा लोगन क एक संग एह बरे बोलाएस कि मोआबी हम लोगन क हरावई।”

11मुला यहोसापात कहेस, “का हिआँ यहोवा क नबी नाहीं अहइ? हम लोग नबी स पूछी कि यहोवा हम क का करइ क बरे कहत ह।”

इस्त्राएल क राजा क सेवकन मैं स एक ठु कहेस, “सापात क पूत एलीसा हिआँ अहइ। एलीसा, एलिय्याह क सेवक रहा।”*

12यहोसापात कहेस, “यहोवा क वागी एलीसा क लगे अहइ।”

एह बरे इस्त्राएल क राजा (यहोराम), यहोसापात अउर एदोम क राजा एलीसा स मिलइ गएन।

13एलीसा इस्त्राएल क राजा (यहोराम) स कहेस, “तू मोहसे का चाहत अहा? आपन बाप अउर महतारी क नबियन क लगे जा।”

इस्त्राएल क राजा एलीसा स कहेस, “नाहीं, हम लोग तोहसे मिलइ आए अही, काहेकि यहोवा हम तीन राजा लोगन क एह बरे एक संग हिआँ बोलवा ह कि मोआबी हम लोगन क हरावइ।”

14एलीसा कहेस, “मई यहूदा क राजा यहोसापात क सम्मान करत हउँ अउर मई सर्वसक्तीमान यहोवा क सेवा करत हउँ। उ निहचइ ही जिअत अहइ, एह बरे मई फुरइ कहत हउँ: मई न तउ तोह पइ दृस्टि डावत अउर न ही तोह पइ धियान देता, जदि यहूदा क राजा यहोसापात हिआँ न होत।” 15किन्तु अब एक अइसे मनई क मोरे लगे लिआवा जउन वीणा बजावत होइ।”

जब उ मनई वीणा बजाई तउ यहोवा क सक्ती एलीसा पइ उतरी। 16तब एलीसा कहेस, “यहोवा इ कहत ह, घाटी मैं गइहा खना। 17यहोवा इहइ कहत ह: तू हवा क अनुभव नाहीं करब्या, तू बरखा भी नाहीं लखब्या। मुला उ घाटी जल स भरि जाइ। तू, तोहार गइयन अउ दूसर जनावन क पानी पिअइ क मिली। 18यहोवा क बरे इ करब सहल अहइ। उ तोहका मोआबियन क भी पराजित करइ देइ। 19तू हर एक सुदृढ़ नगर अउर प्रमुख सहर पर आक्रमण करब्या। तू हर एक अच्छे वृच्छ क काट डउब्या। तू सबहिं पानी क सोतन क रोक देब्या। तू हरेक हरियर खेत क पाथरन स भरके नस्ट कइ देब्या।”

20भिंसारे सुबह क बलि क समइ, एदोम क कइँती स पानी बहइ लाग अउर घाटी पानी स भर ग रहा।

21मोआब क लोग सुनेन कि इस्त्राएल, यहूदा अउर एदोम क राजा लोग ओनके खिलाफ लड़इ बरे आए अहइँ। एह बरे मोआब क लोग कवच धारण करइवाला उमिर क सबहिं मनइयन क बटोरेन। ओन लोग जुद्ध बरे तइयार होइके चउहदूदी पइ प्रतीच्छा किहेन। 22मोआब क लोग भी

एलीसा एलिय्याह क सेवक रहा मूलार्थ एलिय्याह क हाथन पइ पानी डावा एकर अरथ अहइ कि एलीसा ओकर करीबी चेला रहा।

बहोत भिंसारे उठेन। उगत भवा सूरज घाटी क जल पड़ चमकत रहा अउर मोआब क लोगन क उ खून क नाई देखाइ देत रहा। 23मोआब क लोग कहेन, “खून क धियान स लखा। राजा लोग जरूर ही एक दूसर क खिलाफ जुद्ध किहे होइहीं। उ पचे एक दूसर क जरूर नस्ट कइ दिहे होइहीं। हम चली अउर ओनके लहासन स कीमती चिजियन लइ लेइ।”

24मोआबी लोग इस्राएली डेरे तलक आएन। किन्तु इस्राएली बाहेर निकरेन अउर उ पचे मोआबी फउज पड़ आक्रमण कइ दिहन। मोआबी लोग इस्राएलियन क समन्वा स भाग खड़े भएन। इस्राएली मोआबियन स जुद्ध करइ ओनके पहुँटा में घुस आएन। 25उ नगरन क बर्बाद किहन। अउ उ पचे अच्छे खेत क हर एक फउजी दुआरा फेंकइ गवा पाथरन स भर दिहिस। उ पचे सबहि पानी क सोतन क रोक दिहन अउर सबहि नीक बृच्छन क काट डाएन। अउर कीहरेसेत में सिरिफ पाथर रहे गएन जउन ओनकर गुलेलन स फेंकइ गवा रहेन जउन नगर क घेर रखा रहेन।

26मोआब क राजा लखेस कि जुद्ध ओकरे बरे बहोत जियादा प्रबल अहइ। एह बरे उ तरवार धारी सात सौ मनइयन क एदोम क राजा क बध करइ बरे सोझ फउज भेद क खातिर पठइ दिहिस। किन्तु उ पचे एदोम क राजा तलक फउज भेद नाहीं कइ पाएन। 27तब मोआब क राजा अपने जेठ पूत क लिहस जउन ओकरे पाछे राजा होत। नगर क चारिहुँ कइँती क देवार पड़ मोआब क राजा आपन पूत क भेंट होमबलि क रूप में दिहिस। अउर हुआँ इस्राएल क विरुद्ध बहोत जियादा गुस्सा रहा। एह बरे इस्राएल क लोग मोआब क राजा क तजेन अउर अपने देस क लउट गएन।

एक तु नबी क रौंइ मेहरारू एलीसा स मदद माँगत ह

4 नबियन क समूह में स एक तु मनई क मेहरारू रही। उ मनई मर गवा। ओकर मेहरारू एलीसा क समन्वा आपन दुखड़ा रोएस, “मोर भतार तोहरे सेवक क नाई रहा। अब मोर भतार मर गवा ह। तू जानत ह कि उ यहोवा क सम्मान करत रहा। किन्तु ओह पड़ एक मनई क करजा रहा अउर अब उ मनई मोर दुइ लरिकन क आपन दास बनावइ बरे लेइ आवत अहइ।”

2एलीसा पूछेस, “मई तोहार मदद कइसे कइ सकत हउँ? मोका बतावा कि तोहरे घरे में का अहइ?”

उ मेहरारू कहेस, “मोरे घरे में कछू नाहीं। मोरे लगे सिरिफ जइतून क तेल क गगरी अहइ।”

3तब एलीसा कहेस, “जा अउर आपन सब पड़ोसियन से खोरन उधार ल्या। उ सबइ खाली होइ चाही। बहोत स खोरन उधार ल्या। 4तब अपने घरे जा अउर दरवाजन बन्द कइ ल्या। सिरिफ तू अउर तोहार पूत घरे में रहिहीं। तब एन सबइ खोरन में तेल नावा जब उ खोरन भर जाइ तउ ओनका एक अलग ठउरे पड़ धरा।”

5अब उ मेहरारू एलीसा क हिआँ स चली गइ, अपने घरे पहुँची अउर दरवाजन बंद कइ लिहस। सिरिफ उ अउर ओकर पूत घरे में रहेन। ओकर पूतन खोरन ओकरे लगे

लिआएन अउर उ तेल नाएस। 6उ बहोत स खोरन भरेस। आखिर मैं उ अपने पूत स कहेस, “मोरे लगे दूसर खोरन लिआवा।”

मुला सभी खोरन भर चुका रहेन। पूतन में स एक तु मेहरारू स कहेस, “अब कउनो खोरा नाहीं रहि गवा ह।” उ समइ गगरी क तेल खतम होइ चुका रहा।

7तब उ मेहरारू आइ अउर उ परमेस्सर क जन (एलीसा) स इ घटना बताएस। एलीसा ओहसे कहेस, “जा, तेल क बेच द्या अउर अपना करजा लउटाइ द्या। जब तू तेल क बेच चुकब्यू अउ अपना करजा लउटाइ देब्यू तब तोहार अउ तोहरे पूतन क गुजारा बची रकम स होइ।”

सूनेम में एक तु मेहरारू एलीसा क कमा देत ह

8एक दिन एलीसा सूनेम क गवा। सूनेम में एक तु महत्वपूर्ण मेहरारू रहत रही। इ मेहरारू एलीसा स कहेस कि उ ठहरइ अउर ओकरे घरे खइया क खाइ। एह बरे जब भी एलीसा उ ठउरे स होइके जात रहा तब भोजन करइ बरे हुवाँ रुकत रहा।

9उ मेहरारू अपने भतार स कहेस, “लखा मई समुझत हउँ कि एलीसा परमेस्सर क जन पवितर जन अहइ। उ सदा हमरे घरे होइके जात ह। 10मेहरबानी कइके हम लोग एक तु कमरा एलीसा बरे छते पड़ बनाई। ओहमाँ हम लोग एक तु बिछउना, एक तु मेज, एक कुर्सी अउर एक तु डीबट रख देइ। जब जब उ हमरे घर आवइ तउ उ इ कमरा क अपने रहइ बरे प्रयोग कइ सकत ह।”

11एक दिन एलीसा उ मेहरारू क घरे आवा। उ उ कमरे में गवा अउर हुवाँ आराम किहिस। 12एलीसा अपने सेवक गेहजी स कहेस, “सूनेमिन मेहरारू क बोलावा।”

सेवक सूनेमिन मेहरारू क बोलाएस अउर उ ओकरे समन्वा आइ खड़ी भइ। 13एलीसा अपने सेवक स कहेस, अब इ मेहरारू स कहा, ‘लखा हम लोगन क देखभाल बरे तू यथासंभव नीक किहा ह। हम लोग तोहरे बरे का करी? का तू चाहति अहा कि हम लोग तोहरे बरे राजा या सेना क सेनापति स बात करी?’”

उ मेहरारू जवाब दिहिस, “मई हिआँ बहोत अच्छी तरह अपने लोगन में रहत हउँ।” 14एलीसा गेहजी स कहेस, “हम ओकरे बरे का कइ सकित ह?”

गेहजी कहेस, “मई जानत हउँ कि ओकर पूतन नाहीं अहइ अउर ओकर भतार बूढ़ा अहइ।”

15तब एलीसा कहेस, “ओका बोलावा।”

एह बरे गेहजी उ मेहरारू क बोलाएस। उ आइ अउ ओकरे दरवाजे क लगे खड़ी होइ गइ। 16एलीसा मेहरारू स कहेस, “अगले बसन्त में इ समइ तू अपने पूत क गले स लगाइ रही होइब्यू।”

उ मेहरारू स कहेस, “नाहीं महोदय! परमेस्सर क जन, मोहसे झूठ जिन बोला।”

सूनेमिन मेहरारू क पूत होत ह

17मुला उ मेहरारू क गरभ भवा। उ अगले बसन्त में एक तु पूत क जन्म दिहिस, जइसा एलीसा कहे रहा।

18 लड़का बड़ा भवा। एक दिन उ लड़का खेतन में अपने बाप अउर फसल काटत मनइयन क लखइ गवा। 19 लड़का अपने बाप स कहेस, “ओह मोर मूँड़। मोर मूँड़ फटा जात अहइ।”

बाप अपने सेवक स कहेस, “एका अपनी महतारी क लगे लइ जा।”

20 सेवक उ लरीका क ओकरी महतारी क लगे लइ गवा। लरिका दुपहर तलक अपनी महतारी क गोदी में बइठा। तब उ मरि गवा।

महतारी एलीसा स मिलइ जात ह

21 उ मेहरारू लरिका क परमेस्सर क जन क बिछउने पइ ओलराइ दिहस। तब उ दरवाजा बन्द किहस अउर बाहेर चली गइ। 22 उ अपने भतारे क बोलाएस अउ कहेस, “मेहरबानी कइके मोरे लगे सेवकन में स एक अउ गदहन में स एक क पठवा। तब मई परमेस्सर क जन स भेंटइ हाली जाबइ अउर लउटि अउबइ।”

23 उ मेहरारू क भतार कहेस, “तू आज परमेस्सर क जन क लगे काहे जाइ चाहति अहा? इ नवचन्द्र या सबित क दिन नाहीं अहइ।”

उ कहेस, “परेसान जिन हवा। सब कछू नीक होइ।”

24 तब उ एक गदहे पइ काठी धरेस अउ अपने सेवक स कहेस, “आवा चली अउ हाली करी। धीरे तबहि चला जब मई कहउँ।”

25 उ मेहरारू परमेस्सर क जन स भेंटइ कर्मेल पर्वत पइ गइ।

परमेस्सर क जन सूनेमिन मेहरारू क दूर स आवत लखेस। एलीसा अपने सेवक गोहजी स कहेस, “लखा, उ सूनेमिन मेहरारू अहइ। 26 कृपा कइके अब दउड़ि के ओहसे भंटा। ओहसे पूछा, ‘का सब कछू ठीक अहइ? का तू कुसल स अहा? का तोहार भतार कुसल स अहइ? का तोहार पूत कुसल ह?’”

गोहजी उ सूनेमिन मेहरारू स इहइ पूछेस। उ जवाब दिहस, “सब कुसल अहइ।”

27 मुला सूनेमिन मेहरारू स पर्वत पइ चढ़िके परमेस्सर क जन क लगे पहुँची। उ प्रणाम करइ निहुरी अउर उ एलीसा क गोड़ धइ लिहस। गोहजी सूनेमिन मेहरारू क दूर हींच लेइ बरे निअरे आवा। किन्तु परमेस्सर क जन गोहजी स कहेस, “ओका अकेला छोड़ द्या। उ बहोत परेसान अहइ अउर यहोवा एकरे बारे में मोहसे नाहीं कहेस। यहोवा इ खबर मोहसे छुपाएस।”

28 तब सूनेमिन मेहरारू कहेस, “महोदय, मई आप स पूत नाहीं माँग रहेउँ। मई आप स कहे रहेउँ, ‘आप मोका मूर्ख न बनावइँ।’”

29 तब एलीसा गोहजी स कहेस, “जाइ बरे तइयार होइ जा। मोर टहराइ क कुबरी लइ ल्या अउर जा। कउनो स बात करइ बरे न रूका। यदि तू कउनो मनई स मिला तउ ओका नमस्कार भी न कहा। यदि कउनो मनई नमस्कार करइ तउ तू ओकर जवाब भी न द्या। मोर टहरइ क कुबरी क बच्चा क चेहरा पइ रखा।”

30 मुला बच्चा क महतारी कहेस, “जइसा कि यहोवा सास्वत अहइ अउर आप जिअत अहइँ मई प्रतिग्या करति अहइँ कि मई तोहार बिना हिआँ स नाहीं जाब।”

एह बरे एलीसा उठा अउर सूनेमिन मेहरारू क संग चल पड़ा।

31 गोहजी सूनेमिन मेहरारू क घर, एलीसा अउ सूनेमिन स पहिले पहुँचा। गोहजी टहरइ क कुबरी क बच्चा क चेहरे पइ धरेस। मुला बच्चा न कउनो बात किहस अउर न ही कउनो अइसा संकेत दिहस जेहसे इ लागइ कि उ कछु सुनेस ह। तब गोहजी एलीसा स मिलइ लउटा। गोहजी एलीसा स कहेस, “बच्चा नाहीं जगा।”

सूनेमिन मेहरारू क पूत पुन जिअत ह

32 एलीसा घरे स आवा अउर बच्चा अपने बिछउना पइ मरा पड़ा रहा। 33 एलीसा कमरे में आवा अउर उ दरवाजा बन्द कइ लिहस। अब एलीसा अउर उ बच्चा कमरा में अकेल्ले रहेन। तब एलीसा यहोवा स पराथना किहस।

34 एलीसा बिछउना पइ गवा अउ बच्चा पइ ओलरा। एलीसा आपन मुँह बच्चा क मुँह पइ धरेस। एलीसा आपन आँखिन बच्चा की आँखिन पइ धरेस। एलीसा अपने हाथन क बच्चा क हाथन पइ धरेस। एलीसा अपने क बच्चा क ऊपर फइलाएस। तब बच्चा क तन गरम होइ गवा।

35 एलीसा उठा अउर कमरे में चारिहुँ कइँती घूमा। तब उ पुन बच्चा क ऊपर झुक गवा। तब बच्चा सात दाईं छीकेस अउर उ आँखिन खोलेस।

36 एलीसा गोहजी क बोलाएस अउर कहेस, “सूनेमिन मेहरारू क बोलावा।”

गोहजी सूनेमिन मेहरारू क बोलाएस अउर उ एलीसा क लगे आइ। एलीसा कहेस, “अपने पूत क उठाइ ल्या।”

37 तब सूनेमिन मेहरारू कमरा में गइ अउ एलीसा क चरणन पइ निहुरी। तब उ अपने पूत क उठाएस अउर उ बाहेर गइ।

एलीसा अउ जहरीला सुरवा

38 एलीसा पुन गिलगाल आइ गवा। उ समइ देस में भुखमरी क समइ रहा। नबियन क समूह एलीसा क समन्वा बइठ गवा। एलीसा अपने सेवक स कहेस, “बड़के बर्तन क आगी पइ धरा अउ नबियन क समूह बरे कछू सुरवा बनावे।”

39 एक ठु मनई खेतन में जड़ी-बूटी बटोरइ गवा। ओका एक जंगली बेल मिली। उ कछू जंगली लौकियन इ बेल स तोड़ेस अउ अपने लबादे क भर लिहस। तब उ आवा अउर जंगली लौकियन क बर्तन में डाइ दिहस। मुला न ओका अउर न ही दूसर नबियन क पता चला रहा कि उ कइसी लउकियन अहइँ?

40 तब उ पचे तनिक सुरवा मनइयन क खाइ बरे दिहन। मुला जब उ पचे सुरवा क खाब सुरू किहन, तउ उ पचे एलीसा स चिचिआइके कहेन, “परमेस्सर क जन! बर्तन में जहर बाटइ।” उ पचे बर्तन स कछू नाहीं खाइ सकेन काहेकि भोजन खाब खतरा स रहित नाहीं रहा।

41मुला एलीसा स कहेस, “कछू आटा लिआवा।” उ पचे एलीसा क लगे आटा लइ आएन अउर उ पचे ओका बर्तन में नाइ दिहन। तब एलीसा कहेस, “सुरवा क लोगन क बरे नावा जेहसे उ पचे खाइ सकई।”

तब सुरवा में कउनो दोख नहीं रहा।

एलीसा नबियन क समूह क भोजन करावत ह

42एक ठु मनई बालसालीसा स आवा अउर पहिली फसल स परमेस्सर क जन बरे रोटी लिआवा। उ मनई बीस ठु जौ क रोटियन अउ नवा अनाज क अपनी बोरी में लिआवा। तब एलीसा कहेस, “इ भोजन लोगन क द्या जेका उ पचे खाइ सकई।”

43एलीसा क सेवक कहेस, “आप का कहेन? हिआँ तउ सौ मनई अहई। ओन सबहिं मनइयन क इ भोजन मई कइसे दइ सकत हई?”

किन्तु एलीसा कहेस, “लोगन क खाइ बरे भोजन द्या। यहोवा कहत ह, ‘उ पचे भोजन कइ लेइहीं अउर भोजन बच भी जाइ।’”

44तब एलीसा क सेवक नबियन क समूह क समन्वा भोजन परोसेस। नबियन क समूह क खाइ बरे भोजन पर्याप्त भवा अउर ओनके लगे भोजन बचा भी रहा। इ वइसा ही भवा जइसा यहोवा कहे रहा।

नामान क समस्या

5 नामान अराम क राजा क सेना क सेनापति रहा। नामान अपने राजा बरे बहोत जियादा महत्वपूर्ण रहा काहेकि यहोवा ओकर उपयोग अराम क बिजय करावइ बरे किये रहा। नामान एक ठु महान अउ ताकतवर मनई रहा, मुला उ विकट चरमरोग स पीड़ित रहा।

2एक बार कछू आरामी सिपाहियन इस्त्राएल में छापामारइ बरे गएन। ओनक कैदियन में एक ठु नान्ह लरकी रहेन जउन नामान क मेहरारू क सेविका होइ गइ। 3इ लरकी नामान क मेहरारू स कहेस, “मई चाहत हई कि मोर सुआमी (नामान) उ नबी (एलीसा) स मिलेन जउन सोमरोन में रहत ह। उ नबी नामान क बिकट चरमरोग क ठीक कइ सकत ह।”

4नामान आपन सुआमी (अराम क राजा) क लगे गवा। नामान अराम क राजा क उ बात बताएस जउन इस्त्राएली लरिको कहे रही।

5तब अराम क राजा कहेस, “अबहिं जा अउर मई एक ठु पत्र इस्त्राएल क राजा क नाई पठउब।”

एह बरे नामान इस्त्राएल गवा। नामान अपने संग कछू भेंट लइ गवा। नामान साढ़े सात सौ पौण्ड चाँदी, छः हजार सोन क सिक्क, अउर दस हजार बदलइ क कपड़ा लइ गवा। 6नामान इस्त्राएल क राजा बरे अराम क राजा क पत्र भी लइ गवा। पत्र में इ लिखा रहा, “...इ पत्र इ जानकारी देइ बरे अहइ कि मई आपन सेवक नामान क तोहरे हिआँ पठवत हई। ओकरे विकट चरमरोग क नीक करा।”

7जब इस्त्राएल क राजा उ पत्र क बाँच चुका तउ उ आपन चिन्ता क परगट करइ बरे आपन ओढ़ना फारेस।

इस्त्राएल क राजा कहेस, “का मई परमेस्सर अहई? नाहीं। जिन्नगी अउ मउत पइ मोर कउनो अधिकार नाहीं। तब अराम क राजा मोरे लगे बिकट चरमरोग क रोगी क चंगा करइ बरे काहे पठएस? एका जरा सोचा अउर तू लखब्या कि अराम क राजा मोर संग झगड़ा करइ चाहत ह।”

8परमेस्सर क जन सुनेस कि इस्त्राएल क राजा परेसान अहइ अउर उ आपन ओढ़ना फार डाएस ह। एलीसा आपन सँदिसा राजा क लगे पठएस: “तू आपन ओढ़ना काहे फारया? नामान क मोरे लगे आवइ द्या। तब उ समुझी कि इस्त्राएल में कउनो नबी भी अहइ।”

9एह बरे नामान आपन घोड़न अउ रथन क संग एलीसा क घरे आवा अउर घरे क दुआर पई रुकि गवा। 10एलीसा एक ठु सँदिसबाहक क नामान क लगे पठएस। सँदिसबाहक कहेस, “जा, अउर यरदन नदी में सात दाई नहा। तब तोहार चरमरोग नीक हो जाइ अउर तू पवितर अउ सुद्ध होइ जाब्य।”

11नामान कोहाइ गवा अउर हुवाँ स चल पड़ा। उ कहेस, “मई समुझे रहेई कि कम स कम एलीसा बाहेर आई, मोरे समन्वा खड़ा होइ अउर यहोवा, अपने परमेस्सर क समन्वा पराथना करी। मई समुझ रहेई कि उ मोरे बदन पइ आपन हाथ फेरी अउ चामरोग क नीक कइ देइ। 12दमिस्क क नदियन अबाना अउ पपर इस्त्राएल क सबहिं जलासयन स नीक अहई। का मई ओन नदियन में नहाइके पवितर नाहीं होइ सकत रहा?” एह बरे नामान कोहाई गवा। अउ वापस जाई बरे मुड़ गवा।

13मुला नामान क सेवक ओकरे लगे ओसे बात करइ बरे गएन उ पचे कहेन, “पिता, जदि नबी तोहार स कउनो महान काम करइ क कहे होत तउ तू ओका जरूर कतेन। एह बरे तोहका ओकर आग्या क पालन करइ चाही। जदि उ सहल काम करइ क भी कहत ह अउर उ कहेस, ‘नहा अउर तू पवितर अउर सुद्ध होइ जाब्य।’”

14एह बरे नामान उ काम किहेस जउन परमेस्सर क जन कहेस, नामान खाले उतरा अउर उ सात दाई यरदन नदी में नहाएस अउर नामान पवितर अउ सुद्ध होइ गवा। नामान क चमड़ी बच्चा क चमड़ी क तरह कोमल होइ गइ।

15नामान अउ ओकर सारा समूह परमेस्सर क जन क लगे गवा। उ एलीसा क समन्वा खड़ा भवा अउर ओहसे कहेस, “लखा, अब मई समुझत हई कि इस्त्राएल क अलावा पृथ्वी पइ कहुँ परमेस्सर नाहीं अहइ। अब मेहरबानी कइके मोर भेंट स्वीकार करई।”

16मुला एलीसा कहेस, “मई यहोवा क सेवा करत हई। मई यहोवा क जिन्नगी क किरिया खाइके प्रतिग्या करत हई कि मई कउनो भेंट नाहीं लेब।”

नामान बहोत जतन किहस कि एलीसा भेंट लेइ मुला एलीसा इन्कार कइ दिहस। 17तब नामान कहेस, “जदि तू इ भेंट क स्वीकार नाहीं करतेन तउ कम स कम मोरे बरे एँतना करई। मोका एस्त्राएल क एतनी पर्याप्त धूरि लेइ देई जेहसे मोर दुइ खच्चरन पइ धरे टोपन भरि जाई, काहे? काहेकि मई फुन कबहुँ होमबलि या बलि कउनो दूसर देवता क नाहीं चढ़ाउब। मई सिरिफ यहोवा क ही बलि भेंट

करब। 18अउर अब मई पराथना करत हउँ कि यहोवा मोका इ बात बरे छिमा करी कि भविस्स मँ मोर सुआमी (अराम क राजा) लबार देवता क पूजा करइ बरे, रिम्मोन क मन्दिर मँ आइ। राजा सहारा बरे मोह पइ निहुरइ चाही, एह बरे मोका रिम्मोन क मन्दिर मँ निहुरइ पड़ी। अब मई यहोवा स पराथना करत हउँ कि मोका छिमा करइ जब वइसा होइ।”

19तब एलीसा नामान स कहेस, “सान्तिपूर्वक जा।”

एह बरे नामान एलीसा क तजेस अउ तनिक दूर गवा। 20मुला परमेस्सर क जन एलीसा क सेवक गेहजी बोला, “लखई, मोर सुआमी (एलीसा) अरामी नामान क, ओकर लिआई भइ भेंट क स्वीकार किए बिना ही जाइ दिहस ह। मई यहोवा क जिन्नगी क किरिया खाइके प्रतिग्या करत हउँ कि नामान क पाछे दउड़ब अउर ओहसे कछू लिआउब।” 21एह बरे गेहजी नामान कइँती दउड़ा।

नामान अपने पाछे कउनो क दौड़के आवत लखेस। उ गेहजी स भेंटइ क अपने रथे स उतर पड़ा। नामान पूछेस, “सब कुसल तउ अहइ?”

22गेहजी कहेस, “हाँ, सब कुसल अहइ। मोर सुआमी एलीसा मोका पठएस ह। उ कहेस, ‘लखा, एप्रैम क पहाड़ी पहुँटा क नबियन क समूह स दुइ नउजवान नबी मोरे लगे आएन ह। मेहरबानी कइके ओनका पचहत्तर पौण्ड चाँदी अउर दुइ दाई बदलइ क ओढ़ना दइ द्या।”

23नामान कहेस, “मेहरबानी कइके डेढ़ सौ पौण्ड लइ ल्या।” नामान गेहजी क चाँदी लेइ बरे मनाएस। नामान डेढ़ सौ पौण्ड चाँदी क दुइ बोरियन मँ धरेस अउर दुइ दाई बदलइ क ओढ़ना लिहस। तब नामान एन चिजियन क अपने सेवकन मँ स दुइ क दिहस। सेवक ओन चिजियन क गेहजी क बरे लइके आएन। 24जब गेहजी पहाड़ी तलक आवा तउ उ ओन चिजियन क सेवकन स लइ लिहस। गेहजी सेवकन क लउटाइ दिहस अउर उ पचे लउटि गएन। तब गेहजी ओन चिजियन क घरे मँ छुपाइ दिहस।

25गेहजी आवा अउर अपने सुआमी एलीसा क समन्वा खड़ा भवा। एलीसा गेहजी स पूछेस, “गेहजी, तू कहाँ गए रह्या?”

गेहजी कहेस, “मई कहुँ भी नाहीं गवा रहेउँ।”

26एलीसा गेहजी स कहेस, “इ फुर नाहीं अहइ। मोर हिरदइ तोहरे संग रहा जब नामान अपने रथे स तोहसे मिलइ क मुड़ा। इ समइ पैसा, कपड़ा, जैतून, अंगूर, भेड़, गइयन या सेवक-सेविकन लेइ क नाहीं अहइ। 27अब तोहका अउ तोहर बच्चन क नामान क बेरामी लगा जाइ। तोहका सदा ही बिकट चरमरोग रही।”

जब गेहजी एलीसा स बिदा भवा तउ गेहजी क चमड़ी बर्फ क तरह सफेद होइ गइ। गेहजी क कोढ़ होइ गवा रहा।

एलीसा अउ लौह फलक

6 नबियन क समूह एलीसा स कहेस, “जहाँ पइ हम लोग रहत अहई उ जगह हमारे बरे बहोत छोट अहइ। 2हम लोग यरदन नदी क चली अउर कछू लकड़ियन काटी। हम पचन मँ स हर एक एक तु लट्ठा लेइ अउर हम

लोग अपने बरे रहइ क एक ठउर हुवाँ बनाई।” एलीसा कहेस, “बहोत अच्छा, जा अउर करा।”

3ओनमाँ स एक मनई कहेस, “कृपा कइके हमारे संग चलई।”

एलीसा कहेस, “बहोत अच्छा, मई तोहरे संग चलब।”

4एह बरे एलीसा नबियन क समूह क संग गवा। जब उ पचे यरदन नदी पइ पहुँचेन तउ उ पचे कछू बृच्छ काटइ सुरू किहन। 5मुला जब एक मनई एक तु बृच्छ काटत रहा तउ कुल्हाड़ी क लोहा क फलक कुल्हाड़ी स निकर गवा अउर पानी मँ गिर पड़ा। तब उ मनई चिचियान, “हे सुआमी, मई उ कुल्हाड़ी उधार लिहे रहेउँ।”

6परमेस्सर क जन (एलीसा) कहेस, “उ कहाँ गिरी?”

उ मनई एलीसा क उ जगह देखाएस जहाँ लोहा क फलक गिरा रहा। तब एलीसा एक तु डण्डी काटेस अउर उ डण्डी क पानी मँ लोकाइ दिहस। उ डण्डी लोहा क फलक क तैराइ दिहस। 7एलीसा कहेस, “लोहा क फलक क पकड़ ल्या।” तब उ मनई अगवा बढ़ा अउर उ लोहे क फलक लइ लिहस।

अराम क राजा इस्राएल क राजा क फँसावइ क जतन करत ह

8अराम क राजा इस्राएल क खिलाफ जुद्ध करत रहा। उ फउज क अधिकारियन क संग परिषद क बैठक बोलाएस। उ हुकुम दिहस, “इ ठउरे पइ छुप जा अउर इस्राएलियन पइ तब आक्रमण करा जब हिआँ स होइके निकरउँ।”

9मुला परमेस्सर क जन (एलीसा) इस्राएल क राजा क एक सँदेसा पठएस। एलीसा कहेस, “सावधान रहा। उ ठउरे स होइके जिन जा। हुवाँ अरामी फउजी छिपे अहई।”

10इस्राएल क राजा उ ठउरे पइ जेकरे बारे मँ परमेस्सर क जन चितउनी दिहे रहा, अपने मनइयन क सँदेसा पठएस। इ एक या दुई दाई स जियाद भवा।

11अराम क राजा एहसे बहोत घबरान। अराम क राजा आपन फउजी अधिकारियन क बोलाएस, अउर ओनसे पूछेस, “मोका बतावा कि इस्राएल क राजा बरे जासूसी कउन करत अहइ।”

12अराम क राजा क फउजी अधिकारियन मँ स एक कहेस, “मोर पभू अउ राजा, हम पचन मँ स कउनो भी जासूस नाहीं अहइ। एलीसा, इस्राएल क नबी इस्राएल क राजा क अनेक गुप्त सूचना दइ सकत ह, हिआँ तलक कि आप जउन अपने बिछउन मँ कहिहीं, ओकर भी।”

13अराम क राजा कहेस, “एलीसा क पता लगावा अउर मई ओका धरइ बरे मनइयन क पठउब।”

सेवकन अराम क राजा स कहेस, “एलीसा दोतान मँ अहइ।”

14तब अराम क राजा घोड़न, रथ अउ विसाल फउज क दोतान पठएस। उ पचे रात क पहुँचेन अउर पचे नगर क घेर लिहन। 15एलीसा क सेवक उ भिंसारे हाली उठेन। एक सेवक बाहेर गवा अउर उ एक फउज क घोड़न अउ रथन क संग नगर क चारिहुँ कइँती लखेस।

एलीसा क सेवक एलीसा स कहेन, “ओह, मोर सुआमी हम का कइ सकित ह?”

16 एलीसा कहेस, “डेराअ जिन। उ फउज जउन हमरे बरे जुद्ध करत ह, उ फउज स बड़ी अहइ जउन अराम क बरे जुद्ध करत ह।”

17 तब एलीसा पराथना किहेस अउर कहेस, “यहोवा, मई तोहसे पराथना करत हउँ कि तू मोरे सेवक क आँखिन खोला जेहसे उ लखि सकइ।”

यहोवा जुवक क आँखिन खोलेस अउ सेवक लखेस कि पूरा पर्वत आगी क घोड़न अउ रथन स ढका पड़ा रहा। उ पचे सबहिँ एलीसा क चारिहुँ कइँती रहेन।

18 इ सबइ आगी क घोड़न अउ रथ एलीसा क लगे आएन। एलीसा यहोवा स पराथन किहेस अउर कहेस, “मई पराथना करत हउँ कि तू एन लोगन क आँधर कइ द्या।”

तब यहोवा अरामी फउज क आँधर कइ दिहस, जइसे एलीसा पराथना किहे रहा। 19 एलीसा अरामी फउज स कहेस, “इ गलत मारग अहइ। इ उ सहर नाहीं अहइ जेका तू खोजत ह। मोरे पाछे आवा। मई उ मनई क लगे तू पचन क लइ जाब जेकर खोज तू करत अहा।” तब एलीसा अरामी फउज क सोमरोन लइ गवा।

20 जब उ पचे सोमरोन पहोंचेन तउ एलीसा कहेस, “यहोवा, एँन लोगन क आँखिन खोल द्या जेहसे इ सबइ लखि सकइँ।”

तब यहोवा ओनकर आँखिन खोल दिहस अउर अरामी फउज लखेस कि उ सोमरोन नगर में रहेन। 21 इस्त्राएल क राजा अरामी फउज क लखेस। इस्त्राएल क राजा एलीसा स पूछेस, “मोरे बाप, का मई एनका मार डावउँ? का मई एनका मार डावउँ?”

22 एलीसा जवाब दिहस, “नाहीं, ओन लोगन क जिन मार। तू ओनका आपन तरवार या धनुस स नाहीं पकड़ेस ह किन्तु तू तउ अब ओन मनइयन क मराइ चाहत ह अरामी फउज क कछू रोटी पानी द्या। ओनका खाइ पिअइ द्या। तब एनका अपने सुआमी क लगे लउटि जाइ द्या।”

23 इस्त्राएल क राजा अरामी सेना बरे बहोत स भोजन तइयार कराएस। अरामी फउज खाएस-पीएस। तब इस्त्राएल क राजा अरामी फउज क ओनके घरे वापस पठइ दिहस। अरामी फउज अपने सुआमी क लगे क घर लउटे गइ। अरामी लोग एकरे पाछे इस्त्राएल पइ आक्रमण करइ बरे फुन कउनो फउज नाहीं पठएस।

भयंकर भुखमरी सोमरोन क कस्ट देत ह

24 जब इ सब होइ गवा तउ अराम क राजा बेन्हदद अपनी सारी फउज बटोरैस अउ उ सोमरोन नगर पइ घेरा डावइ अउर ओह पइ आक्रमण करइ गवा। 25 फउजियन लोगन क नगर में भोजन सामग्री भी नाहीं लिआवइ दिहन। एह बरे सोमरोन में भयंकर भुखमरी क समइ आइ गवा। इ एँतना भयंकर रहा कि एक गवहे क मूँड चाँदी क अस्सी सिक्कन में बिकइ लाग अउर एक ठु छोटा टोकरी कबूतर क गोबरी क कीमत पाँच चाँदी क सिक्कन रही।

26 इस्त्राएल क राजा नगर क प्राचीर पइ घूमत रहा। एक ठु मेहरारू चिचिआइके ओका गेहराएस। उ मेहरारू कहेस, “मोर पभूँ, अउर राजा, कृपा करके मोर मदद करइँ।”

27 इस्त्राएल क राजा कहेस, “जदि यहोवा तोहार मदद करत तउ मई कइसे तोहका मदद दइ सकत हउँ? मोरे लगे तोहका देइ क कछू भी नाहीं अहइ। खरिहानन स कउनो अन्न नाहीं आवा, या दाखरस क कारखाने स कउनो दाखरस नाहीं आइ।” 28 तब इस्त्राएल क राजा उ मेहरारू स पूछेस, “तोहार परेसानी का अहइ?”

मेहरारू जवाब दिहस, “इ मेहरारू मोहसे कहेस, ‘अपने पूत क मोका द्या जेहसे हम ओका मार डाइ अउर ओकर आज खाइ लेइ। फुन काल्ह मई आपन पूत क मारिके खाउब्या। 29 तब हम अपने पूत क पकावा अउर खावा। तब दूसरे दिन इ मेहरारू स कहेउँ, ‘अपने पूत क द्या जेहसे हम ओका मार सकी अउर खाइ सकी।’ किन्तु उ अपने पूत क छुपाए दिहस ह।”

30 जब राजा उ मेहरारू क बातन सुनेस तउ उ आपन ओढ़नन क अपनी सम्मया बतावइ बरे फार डाएस। जब राजा प्राचीर स होइके चला तउ लोग लखेन कि उ अपने पहिरावे क नीचे मोटा वस्त्र पहिरे रहा जेहसे पता चलत रहा कि उ बहोत दुखी अउ परेसान अहइ।

31 राजा कहेस, “परमेस्सर मोका निहचित ही दण्डित करइ जदि सापात क पूत एलीसा क मूँड इ दिन क आखिर तलक भी ओकरे धड़ पर रहि जाइ।”

32 राजा एलीसा क लगे एक ठु सँदिसवाहक पठएस। एलीसा अपने घरे में प्रमुखन क संग बइठा रहा। सँदिसवाहक क अवाइ क पहिले एलीसा प्रमुखन स कहेस, “लखा, उ हत्तियारा क पूत (इस्त्राएल क राजा) लोगन क मोर मूँड काटइ क पठवत अहइ। जब सँदिसवाहक आवइ तउ दरवाजा बन्द कइ ल्या। दरवाजा क बन्द रखा अउर ओका घुसइ जिन द्या। एहमों कउनो सक नाहीं कि ओकर सुआमी क कदमन क आवाज़ ओकरे पाछा करब्या।”

33 जउने समइ एलीसा अग्रजन स बातन करत ही रहा, सँदिसवाहक ओकरे करीब आवा। सँदिसा इ रहा: “इ बिपति यहोवा कइँती स आई अहइ। मई यहोवा क प्रतीच्छा आगे अउर काहे करउँ?”

7 एलीसा कहेस, “यहोवा कइँती स सँदिस सुना। यहोवा कहत ह: ‘काल्ह इहइ समइ सोमरोन क फाटक क संग क बाजार में लोग एक डलिया अच्छा आटा या दुइ डलिया जौ एक सेकेल में खरीदब्या।”

2 तब उ अधिकारी जउन राजा क बिस्सासपात्र रहा, परमेस्सर क जन स बातन किहेस। अधिकारी कहेस, “जदि यहोवा आकास में खिड़कियन भी बनाइ देइ तउ भी इ नाहीं होइ।”

एलीसा कहेस, “एका तू अपनी आँखिन स लखब्या। किन्तु उ भोजन में स तू कछू भी नाहीं खाब्या।”

कोढ़ी, अरामी डेरा क खाली पावत हीं

अंगर क दुआर क लगे चार मनई कोढ़ स पीड़ित रहेन। उ पचे आपुस में बातन किहन, “हम हिआँ मरइ क

प्रतीक्षा करत भए काहे बइठा अही? 4सोमरोन में कछू भी खाइ क बरे नाहीं अहइ। जदि हम लोग नगर क भीतर जाब तउ हुवाँ हम भी मरि जाब। किन्तु जदि हम पचे हिआँ रहा, तउ भी मरि जाब। एह बरे हम लोग अरामी डेरा कइँती चली। जदि उ पचे हम क ज़िअत रहइ देत हीं तउ हम ज़िअत रहब। जदि उ पचे हम क मार डावत हीं तउ मर जाब।”

5एह बरे उ साँझ क उ चारिहुँ कोढ़ी अरामी डेरा क गएन। उ पचे अरामी डेरा क छोर तलक पहुँचेन। मुला हुवाँ कउनो नाहीं रहेन। 6यहोवा अरामी सेना क, रथन, घोड़न अउ बिसाल सेना क उद्घोस सुनाए रहा। एह बरे अरामी फउजियन आपुस में बातन किहन, “इस्त्राएल क राजा हिती राजा लोगन अउ मिसियन क हम लोगन क खिलाफ किराये पइ बोलाएस ह।”

7अरामी फउजी उ साँझ क आरम्भ में ही पराइ गएन उ पचे सब कछू अपने पाछे छोड़ गएन। उ पचे अपने डेरन, घोड़न, गदहन छोड़ने अउ आपन जिन्नगी बचावइ क भाग खड़े भएन।

कोढ़ी अरामी डेरा में

8जब इ सबइ कोढ़ी उ डेरा क छोर तलक पहुँचेन, उ पचे एक डेरा में गएन। उ पचे खाएन अउर पिएन। तब चारिहुँ कोढ़ी उ तम्बू स चाँदी, सोना अउ वस्त्र लइ लिहेन तउ उ पचे ओन चिजियन क लुकाइ दिहन। तब उ पचे लउटेन अउर दूसर तम्बू में गएन। उ हुआँ स भी सबइ कीमती चिजियन लइ आएन। उ पचे बाहेर गएन अउर एन चिजियन क लुकाइ रिहन। 9तब एन कोढ़ियन आपुस में बात किहन, “हम लोग बुरा करत अही। आजु हम लोगन क लगे सुभ खबर अहइ। मुला हम लोग चुप अही। जदि हम लोग सूरज स निकरइ तलक प्रतीक्षा करब तउ हम लोगन क दण्ड मिली। अब हम चली अउर ओन लोगन क सुभ सूचना देइ जउन राजा क महल में रहत हीं।”

कोढ़ी लोग सुभ खबर देत हीं

10एह बरे इ सबइ कोढ़ी नगर क दुआरपाल क लगे गएन। कोढ़ी रोगियन दुआरपालन स कहेन, “हम अरामी डेरा में गए रहे। किन्तु हम लोग कउनो मनई क हुवाँ नाहीं पावा। हुवाँ कउनो भी नाहीं रहा। घोड़न अउ गदहन तब भी बंधे रहेन अउर डेरन वइसे क वइसे लगे रहेन। किन्तु सबहिं लोग चले गए रहेन।”

11तब नगर क दुआरपाल जोर स चीखन अउर राजमहल क मनइयन क इ बात बताएन। 12राति क समइ रहा, किन्तु राजा अपने पलंग स उठा। राजा अपने अधिकारियन स कहेस, “मई तू लोगन क बताउब कि अरामी फउजी हमरे संग का करत अहइ। उ पचे जानत हीं कि हम भुखान अही। उ पचे खेतन में छुपइ बरे, डेरन क खाली कइ गएन ह। उ पचे इ सोचत अहइ, ‘जब इस्त्राएली नगर क बाहेर अइहीं, तब हम ओनका ज़िअत धइ लेब अउर तब हम नगर में प्रवेस करब।”

13राजा क अधिकारियन में स एक कहेस, “कछू मनइयन क नगर में अबहिं तलक बचे पाच तु घोड़न क लेइ द्या। निहचइ ही इ सबइ घोड़न भी हाली ही ठीक वइसे ही मर जइहीं, जइसे इस्त्राएल क सबहिं लोग जउन अबहिं तलक बचे रहि गए अहइ, मरिहीं। एन मनइयन क इ लखइ क पठवा जाइ कि का घटित भवा ह।”

14एह बरे लोग घोड़न क संग दुइ रथ लिहेन। राजा एन लोगन क अरामी फउज क पाछे लगाएस। राजा ओनसे कहेस, “जा अउर पता लगावा कि का घटना घटी?”

15उ सबइ मनई अरामी फउज क पाछे यरदन नदी तलक गएन। पूरी सड़क पइ वस्त्र अउ अस्त्र फइले भए रहेन। अरामी लोग हाली में भागत भए ओन चिजियन क लोकाइ दिहे रहेन। सँदेसवाहक सोमरोन क लउटेन अउर राजा क बताएन।

16तब लोग अरामी डेरा कइँती टूट पड़ने, अउर हुवाँ स उ पचे कीमती चिजियन लइ लिहन। एह बरे उहइ भवा जउन यहोवा कहे रहा। कउनो भी मनई एक तु डलिया निक आटा या दुइ डलिया जौ सिरिफ एक तु सेकेल में खरीद सकत रहा।

17राजा आपन व्यक्तिगत सहायक अधिकारी क दुआरे क रक्छा बरे चुनेस। किन्तु लोग दुस्मन क डेरा स भोजन पावइ बरे दौड़ पड़ने। लोग अधिकारी क धक्का दइके गिराइ दिहन अउर ओका रौंदत भए निकर गएन अउर उ मर गवा। एह बरे उ पचे सबहिं बातन वइसे ही ठीक घटित भइन जइसा परमेस्सर क जन तब कहे रहा जब राजा एलीसा क घरे आवा रहा। 18एलीसा कहे रहा, “कउनो भी मनई सोमरोन क नगरदुआर क बजार में एक सेकेल में एक तु डलिया नीक आटा या दुइ उलिया जौ बेसहि सकी।” 19किन्तु परमेस्सर क जन क उ अधिकारी जवाब दिहस, “जदि यहोवा सरग में खिड़कियन भी बनाइ देइ, तउ भी वइसा नाहीं होइ सकी” अउर एलीसा उ अधिकारी स कहे रहा, “तू अइसा अपनी आँखिन स लखब्या। किन्तु तू उ भोजन क कछू भी नाहीं खाइ पउब्या।” 20अधिकारी क संग ठीक वइसा ही घटित भवा। लोग नगरदुआर पइ ओका धक्का दइके गिराइ दिहन, ओका रौंद डाएन अउर उ मर गवा।

राजा अउ सूनेमिन मेहरारू

8 एलीसा उ मेहरारू स बातन किहस जेकरे पूत क उ जीवन में वापिस लाए रहा। एलीसा कहेस, “तोहका अउर तोहरे परिवार क कउनो दूसर देस में चले जाइ चाही। काहे? काहेकि यहोवा निहचइ किहेस ह कि हिआँ भुखमरी क समइ लाई। इ देस में इ भुखमरी क समइ सात बरिस क होइ।”

2एह बरे उ मेहरारू उहइ किहस जउन परमेस्सर क जन कहेस। उ अपने परिवार क संग सात बरिस पलिस्तियन क देस में रहइ चली गइ। 3जब सात बरिस पूरे होइ गएन तउ उ मेहरारू पलिस्तियन क देस स लउटि आइ। उ मेहरारू राजा स बातन करइ गइ। उ चाहत रही कि उ ओकरे घरे अउर ओकरी भुईया क ओका लउटावइ में ओकर मदद करइ।

4राजा परमेस्सर क जन क सेवक गेहजी स बातन करत रहा। राजा गेहजी स पूछेस, “कृपा कइके उ पचे सबहिं महान कार्य हमका बतावई जेनका एलीसा किहे अहई।”

5गेहजी राजा क एलीसा क बारे में एक मरे मनई क जिअत करइ क बात बतावत रहा। उहइ समइ उ मेहरारू राजा क लगे गइ जेकरे पूत क एलीसा जिआए रहा। उ चाहत रही कि उ अपने घरे अउर अपनी भुईया क वापस दिआवइ में ओहसे सहायत माँगइ। गेहजी कहेस, “मोर पर्भू राजा, इ अहइ मेहरारू अहइ अउर इ उहइ पूत अहइ जेका एलीसा जिआए रहा।”

6राजा पूछेस कि उ का चाहत ह। उ मेहरारू अपनी इच्छा जताएस। तब राजा एक अधिकारी क उ मेहरारू क मदद क बरे चुनेस। राजा कहेस, “इ मेहरारू क उ सब कछू द्या जउन एकर अहइ अउर एकर भुईया क सारी फसला जब स इ देस तजेस तब स अब तक क, एका द्या।”

बेन्हदद इस्त्राएल क एलीसा क लगे पठवत ह

7एलीसा दमिस्क गवा। अराम क राजा बेन्हदद बीमार रहा। कउनो मनई बेन्हदद स कहेस, “परमेस्सर क जन हिआँ आवा अहइ।”

8तब राजा बेन्हदद इस्त्राएल स कहेस, “भेंट साथे में ल्या अउर परमेस्सर क जन स मिलइ जा। ओका कहा कि उ पचे यहोवा स पूछई कि का मई अपनी बेरामी स चँगा होइ सकत हउँ।”

9एह बरे हजाएल एलीसा स भेंटइ गवा। हजाएल अपने संग भेंट लिआवा। उ दमिस्क स हर प्रकार क अच्छी चिजियन लिआवा। एन सब क लिआवइ बरे चालीस ऊँटन क जरूरत पड़ी। हजाएल एलीसा क लगे गवा। हजाएल कहेस, “तोहार अनुयायी अराम क राजा बेन्हदद मोका आप क लगे पठएस ह। उ पूछत ह कि का मई बेरामी स नीक होइ जाब।”

10तब एलीसा हजाएल स कहेस, “जा अउर बेन्हदद स कहा, ‘तू जिअत रहब्या।’ किन्तु यहोवा फुरइ मोका इ कहेस ह, ‘उ निहचइ ही मरी।’”

एलीसा हजाएल क बारे में भविस्सवाणी करत ह

11एलीसा हजाएल क तब तलक लखत रहा जब तलक हजाएल नाही होइ गवा। तब परमेस्सर क जन रोवइ लाग।

12हजाएल कहेस, “महोदय, आप काहे रोवत अहई?”

एलीसा जवाब दिहेस, “मई रोवत अहउँ काहेकि मई जानत हउँ कि तू इस्त्राएलियन बरे का कछू बुरा करब्या। तू ओनके मजबूत नगरन क जरउब्या। तू ओनके जुवकन क तरवार स मार डउब्या। तू ओनके बचन क मार डउब्या। तू ओनकर गाभिन मेहररूअन क गरभ क चीर डउब्या।”

13हजाएल कहेस, “मई कउनो ताकतवर मनई नाही हउँ। मई एन बड़के कामन क नाही कइ सकत।”

एलीसा जवाब दिहेस, “यहोवा मोका बताएस ह कि तू अराम क राजा होब्या।”

14तब हजाएल एलीसा क हिआँ स चला गवा अउर अपने राजा क लगे गवा। बेन्हदद हजाएल स पूछेस, “एलीसा तोहसे का कहेस?”

हजाएल जवाब दिहेस, “एलीसा मोहसे कहेस कि तू जिअत रहब्या।”

हजाएल बेन्हदद क हत्या करत ह

15मुला अगले दिन हजाएल एक ठु मोटा कपड़ा लिहस अउर एका पानी स गीला कइ लिहस। तब उ मोटके कपड़े क बेन्हदद क मुँह पइ डइके ओकर साँस रोक दिहस। बेन्हदद मर गवा। एह बरे हजाएल नवा राजा बना।

यहोराम आपन हुकूमत आरम्भ करत ह

16यहोसापात क पूत यहोराम यहूदा क राजा भवा। यहोराम अहाब क पूत योराम क इस्त्राएल क राज्जकाल क पँचएँ बरिस में हुकूमत आरम्भ किहस। 17यहोराम बत्तीस बरिस क रहा, जब उ हुकूमत करब आरम्भ किहस। उ यरूसलेम में आठ बरिस हुकूमत किहस। 18किन्तु यहोराम इस्त्राएल क राजा लोगन क तरह रहा अउर ओन कामन क किहस जेनका यहोवा बुरा बताए रहा। यहोराम अहाब क परिवार क लोगन क तरह रहत रहा। यहोराम इ तरह रहा काहेकि ओकर मेहरारू अहाब क बिटिया रही। 19मुला यहोवा ओका नस्ट नाही किहस काहेकि उ अपने सेवक दाऊद स प्रतिग्या किहे रहा कि ओकरे परिवार क कउनो न कउनो सदा ही राजा होइ।

20यहोराम क समइ में एदोम यहूदा क हुकूमत स टूट गवा। एदोम क लोग अपने बरे एक ठु राजा चुन लिहस।

21तब यहोराम अउ ओकर सबहिं रथ सार्इर क गएन। एदोमी सेना ओनका घेर लिहस। यहोराम अउ ओकर अधिकारियन ओन पइ रात में हमला किहेन अउर बच निकरेन। यहोराम क सबहिं फउजी अपने घरन क भाग गएन। 22इ तरह एदोमी यहूदा क हुकूमत क खिलाफ बिद्रोह किहा अउर उ पचे आजु भी बिद्रोह करत अहई।

उहइ समइ लिब्ना भी यहूदा क हुकूमत क बिरूध बिद्रोह कइ दिहा।

23यहोराम जउन कछू किहस उ सब “यहूदा क राजा लोगन क इतिहास” क किताबे में लिखा अहइ।

24यहोराम मरा अउर अपने पुरखन क संग दाऊद नगर में दफनावा गवा। यहोराम क पूत अहज्याह नवा राजा भवा।

अहज्याह आपन हुकूमत सुरू करत ह

25यहोराम क पूत अहज्याह, अहाब क पूत इस्त्राएल क राजा योराम क राज्जकाल क बारहवें बरिस में यहूदा क राजा भवा। 26हुकूमत सुरू करइ क समइ अहज्याह बाईस बरिस क रहा। उ उरूसलेम में एक बरिस हुकूमत किहस। ओकरी महतारी क नाउँ अतल्याह रहा। उ इस्त्राएल क राजा ओम्नी क बिटिया रही। 27अहज्याह उ सबइ काम किहस जेनका यहोवा बुरा बताए रहा। अहज्याह अहाब क परिवार क लोगन क तरह बहोत स बुरे काम किहस। अहज्याह उ तरह रहा काहेकि ओकर मेहरारू अहाब क परिवार स रही।

योराम हजाएल क खिलाफ जुद्ध में घायल होइ जात ह

28अहाब क पूत योराम अराम क राजा हजाएल स गिलाद क रामोत में जुद्ध करइ गवा। अहज्या जुद्ध में योराम क संग होइ गवा। अरामियन योराम क घायल कइ दिहन। 29राजा योराम यिज़्रैल क लउटि गवा ताकि उ ओन घावन क ठीक कइ सकी जउन अरामियन ओका उ समइ दिहे रहेन जब उ रमाह में आराम क राजा हजाएल क खिलाफ लड़े रहेन। यहोराम क पूत, यहूदा क राजा अहज्याह, अहाब क पूत योराम क लगे यिज़्रैल में गवा, काहेकि उ घायल होइ गवा रहा।

**एलीसा जुवा नबी क येहू क अभिसेक
करइ क कहत ह**

9 एलीसा नबी नबियन क समूह में स एक क बोलाएस। एलीसा इ मनई स कहेस, “तइयार होइ जा अउर अपने हाथे में तेल क इ नान्ह बोतल क ल्या। गिलाद क रामोत क जा। 2जब तू हुवाँ पहुँचा तउ निमसी क पौत अर्थात यहोसापात क पूत येहू स मिला। तब अन्दर जा अउर ओकर भाइयन में स ओका उठावा। ओका कउनो भीतरी कमरों में लइजा। 3तेल छोटी बोतल लइ जा अउर येहू क मूँड़ पइ उ तेल क डवा। इ कहा, ‘यहोवा कहत ह: मई तोहार अभिसेक इस्राएल क राजा होइ बरे किहेउँ ह।’ तब दरवाजा खोला अउ भाग चला। हुवाँ प्रतीच्छा न करा।”

4एह बरे इ जुवा नबी गिलाद क रामोत गवा। 5जब जुवक नबी हुवाँ पहुँचा, उ फउज क सेनापतियन क बइठे लखेस। जुवक कहेस, “सेनापति, मई तोहार क बरे एक सँदिसा लिआएउँ ह।” येहू कहेस, “हम सबहिं हिआँ अही। हम लोगन में स केकरे बरे सँदिस अहइ?”

जुवक कहेस, “सेनापति, सँदिस तोहार बरे अहइ।”

6येहू उठा अउर अन्दर गवा। तब जुवा नबी उ तेल क येहू क मूँड़ पइ डाइ दिहस। जुवा नबी येहू स कहेस, “इस्राएल क परमेस्सर, यहोवा कहत ह, ‘मई यहोवा क लोगन, इस्राएलियन पइ नवा राजा होइ क बरे तोहार अभिसेक करत हउँ? 7तोहका अपने राजा अहाब क परिवार क नस्ट कइ देइ चाही। इ प्रकार मई ईजेबेल क अपने सेवकन, नबियन तथा दूसर ओन सबहिं जउन मोर सेवा किहेन जेका उ मार डाएस क मउत क बरे दण्डित करब। 8इ तरह अहाब क सारा परिवार मरि जाइ। मई अहाब क परिवार क कउनो मर्द क जिअत नाही रहइ देब। एकर कउनो महत्व नाही होइ कि उ मर्द दास अहइ या स्वतंत्र मनई अहइ। 9मई अहाब क परिवार क, नबात पूत क यारोबाम या अहिययाह क पूत बासा क परिवार जइसा कइ देब। 10यिज़्रैल क छेत्र में ईजेबेल क कूकुरन खइहीं। ईजेबेल क दफनावा नाही जाइ।”

तब जुवक नबी दरवाजा खोलेस अउ भाग गवा।

सेवक येहू क राजा घोसित करत हीं

11येहू अपने राजा क अधिकारियन क लगे लउटा। अधिकारियन में स एक येहू स कहेस, “का सब कुसल अहइ? इ पागल मनई तोहरे लगे काहे आवा रहा?”

येहू अपने अधिकारियन क उत्तर दिहस, “तू उ पागल मनई क अउर जउन बातन उ कहत ह, जानत अहा।”

12अधिकारियन कहेस, “नाहीं! हमका सच्ची बात बतावा। उ का कहत ह?” येहू अधिकारियन क उ बताएस जउन जुवक नबी कहे रहा। येहू कहेस, “उ कहेस, ‘यहोवा इ कहत ह: मई इस्राएल क नवा राजा होइ क बरे तोहार अभिसेक किहेउँ ह।”

13तब हर एक अधिकारी हाली स आपन चोगा उतारेन अउर येहू क समन्वा पइड़ियन पइ ओनका धरेन। तब उ पवे तुरही बजाएन अउर इ घोसणा किहन, “येहू राजा अहइ।”

येहू यिज़्रैल जात ह

14एह बरे येहू, जउन निमसी क पोता अउर यहोसापात क पूत रहा योराम क खिलाफ योजना बनाएस।

उ समइ योराम अउ इस्राएली, अराम क राजा हजाएल स, गिलाद क रामोत क रच्छा क जतन करत रहेन। 15मुला राजा योराम आपन घाव स ठीक होइ बरे यिज़्रैल क गवा। अरामियन योराम क तब घायल किहे रहेन जब उ अराम क राजा हजाएल क खिलाफ जुद्ध किहे रहा।

एह बरे येहू अधिकारियन स कहेस, “जदि तू लोग स्वीकार करत अहा कि मई नवा राजा हउँ तउ नगर क कउनो मनई क यिज़्रैल में सूचना देइ बरे बचिके निकरइ न द्या।”

16योराम यिज़्रैल में अराम करत रहा। एह बरे येहू रथ में सवार भवा अउर यिज़्रैल गवा। यहूदा क राजा अहज्याह भी योराम क लखइ यिज़्रैल गवा।

17एक ठु रच्छक यिज़्रैल में रच्छक खम्भा पइ खड़ा रहा। उ येहू क बिसाल दल क आवत लखेस। उ कहेस, “मई लोगन क एक ठु बिसाल दल क लखत हउँ।”

योराम कहेस, “कउनो क ओनसे भेंटइ घोड़ा पइ पठवा। इ मनई स इ कहइ बरे कहा, “का आप सान्ति क इच्छा स आए अहइँ?”

18एह बरे एक सँदिसवाहक येहू स मिलइ बरे घोड़ा पइ सवार होइके गवा। सँदिसवाहक कहेस, “राजा योराम पूछत हीं, ‘का तू सान्ति स आए अहइँ?’”

येहू कहेस, “तोहका सान्ति स कछू लेब-देब नाही। आवा अउ मोरे पाछे चला।”

रच्छक योराम स कहेस, “उ दल क लगे सँदिसवाहक गवा, किन्तु उ अब तलक लउटिके नाही आवा।”

19तब योराम एक दूसरे मनई क घोड़ा पइ पठएस। उ मनई येहू क दल क लगे आवा अउर उ कहेस, “राजा योराम कहत हीं, ‘सान्ति।’”

येहू जवाब दिहस, “तोहका सान्ति स कछू भी लेब-देब नाही। आवा अउर मोरे पाछे चला।”

20रच्छक योराम स कहेस, “दूसर मनई उ दल क लगे गवा, किन्तु उ अबहिं लउटिके नाही आवा। रथचालक रथे क निमसी पोता येहू क तरह चलावत बाटइ। उ पागलन जइसा चलावत अहइ।”

21योराम कहेस, “मोरे रथे क तइयार करा।”

एह बरे सेवक योराम क रथे क तइयार किहन। इस्राएल

क राजा योराम अउ यहूदा क राजा अहज्याह निकर गएन। हर एक राजा अपने-अपने रथे स येहू स मिलइ गएन। उ पचे येहू स यिज़्रैली नाबोत क भुइया पड़ भेंटन।

22योराम येहू क लखेस अउर ओहसे पूछेस, “येहू का तू सात्ति क इरादे स आए अहा?”

येहू जवाब दिहेस, “जब तलक तोहार महतारी ईज़ेबेल रण्डीबाजी अउर जादू टोना करति रही तब तलक सात्ति नाहीं होइ सकी।”

23योराम भाग निकरइ बरे अपने घोड़न क बाग मोड़ेस। योराम अहज्याह स कहेस, “अहज्याह! इ एक ठु चाल अहइ।”

24किन्तु येहू अपनी पूरी ताकत स अपने धनुस क हींचेस अउर योराम क पीठ में बाण चलाइ दिहस। बाण योराम क हिरदइ क बेधत भवा पार होइ गवा। योराम अपने रथे में मरि गवा।

25येहू अपने सारथी बिदकर स कहेस, “योराम क लहास क उठावा अउर यिज़्रैली नाबोत क खेत में लोकाइ द्या। याद करा, जब हम अउर तू योराम क बाप अहाब क संग चले रहे। तब यहोवा कहे रहा कि एकरे संग अइसा ही होइ। 26यहोवा कहे रहा, ‘कल मई नाबोत अउ ओकरे पूतन क खून लखे रहेउँ। एह बरे मई अहाब क इहइ मइदान में सजा देब।’ यहोवा अइसा कहे रहा। एह बरे योराम क लहास क इहई मइदान में लोकाइ द्या जइसा यहोवा कहेस।”

27यहूदा क राजा अहज्याह इ लखेस, एह बरे उ भाग निकरा। उ बारी क भवन क रास्ते स होइके भागा। येहू ओकर पाछा किहस। येहू कहेस, “अहज्याह क भी ओकरे रथे में मार डावा।”

एह बरे येहू क लोग यिबलाम क लगे गूर क जाइ वाली सड़क पड़ अहज्याह पड़ प्रहार किहस। अहज्याह मगिद्दो तलक भागा, किन्तु हुवों उ मर गवा। 28अहज्याह क सेवक अहज्याह क लहास क रथे में यरूसलेम लइ गएन। उ पचे अहज्याह क, ओकरी कब्र में ओकरे पुरखन क संग दाऊद नगर में दफनाएन।

29अहज्याह इस्त्राएल पड़ योराम क राजकाल क गियारहवें बरिस में यहूदा क राजा बना रहा।

ईज़ेबेल क भयंकर मउत

30येहू यिज़्रैल गवा अउर ईज़ेबेल क इ खबर मिली। उ अपने क सजाएस अउर अपने बानन क बाँधेस। तब उ खिड़की क सहारे खड़ी भइ अउर बाहेर क लखइ लाग। 31येहू नगर में प्रवेस किहस। ईज़ेबेल कहेस, “जिम्नी जउन आपन ही सुआमी क मार डाएस, का तू सात्ति में आवा ह?”

32येहू ऊपर खिड़की कइँती लखेस। उ कहेस, “मोरी कइँती कउन अहइ? कउन?”

दुइ या तीन खोजन खिड़की स येहू क लखेन, 33येहू ओनसे कहेस, “ईज़ेबेल क खाले लोकावा।”

तब खोजन ईज़ेबेल क खाले लोकाएन। ईज़ेबेल क तनिक खून देवार अउर घोड़न पड़ छिटक गवा। घोड़न ईज़ेबेल क तने क कुचरि डाएस। 34येहू महल में घुसा अउर

उ खाएस अउर पिएस। तब उ कहेस, “अब इ सरापित मेहरारू क बारे में इ करा। ओका दफनाइ द्या काहेकि उ राजा क बिटिया अहइ।”

35कछू लोग जउन ईज़ेबेल क दफनाए गएन। रहेन ओकरे लहास क न पाइ सकेन। उ पचे सिरिफ ओकर खोपड़ी, ओकर गोड़ अउ ओकरे हाथन क हथेलियन पाइ सकेन। 36एह बरे उ पचे लोग लउटेन अउर उ पचे येहू स कहेन। तब येहू कहेस, “यहोवा अपने सेवक तिसबी एलिय्याह स इ सँदेसा देइ क कहे रहा। एलिय्याह कहे रहा: ‘यिज़्रैल क पहेँटा में ईज़ेबेल क लहासे क कूकुर खइहीं। 37ईज़ेबेल क लहास यिज़्रैल क पहेँटा में खेत क गोबर क तरह होइ। लोग ईज़ेबेल क लहास क पहिचान नाहीं पइहीं।’”

येहू सोमरोन क प्रमुखन क लिखत ह

10 अहाब क सतर पूत सोमरोन में रहेन। येहू पत्र लिखेस अउर ओनका सोमरोन में यिज़्रैल क सासकन अउ प्रमुखन क पठएस। उ ओन लोगन क भी पत्र लिखेस जउन अहाब क पूतन क अभिभावक रहेन। पत्र में येहू लिखेस, 2-3“जइसे ही तू इ पत्र क पावा तू अपने सुआमी क पूतन में स सब स जियादा जोगग अउर उतिम मनई क चुना। तोहरे लगे रथ अउर घोड़न अहई अउर तू एक मजबूत नगर में रहत अहा। तोहरे लगे अस्त्र-सस्त्र भी अहई। जउने पूत क चुना ओका ओकरे बाप क सिहांसने पड़ बइठावा। तब अपने सुआमी क परिवार क बरे जुद्ध करा।”

4किन्तु यिज़्रैल क सासक अउर प्रमुख बहोत ससान रहेन। उ पचे कहेन, “दुइनउँ राजा (योराम अउर अहज्याह) येहू क रोक नाहीं सकेन। एह बरे हम भी ओका रोक नाहीं सकित।”

5अहाब क महल क प्रबन्धक, नगर प्रसासक, प्रमुख वरिष्ठ-जन अउर अहाब क बच्चन क अभिभावकन येहू क लगे एक सँदेसा पठएन। “हम आप क सेवक अही। हम उ सब करब जउन आप कहिहीं। हम कउनो मनई क राजा नाहीं बनाउब। उहइ करई जउन आप ठीक समुझत हीं।”

सोमरोन क प्रमुख अहाब क

बच्चन क मार डावत हीं

6तब येहू एक दूसर पत्र एन प्रमुखन क लिखेस। येहू कहेस, “जदि तू मोर समर्थन करत अहा अउर मोर आदेस मानत अहा तउ अहाब क पूतन क मूँड़ काट डावा अउर इहइ समइ कल यिज़्रैल में मोरे लगे ओनका लइ आवा।”

अहाब क सतर पूत रहेन। उ पचे ओन प्रमुखन क लगे रहेन जउन ओनकर सिखलाई देत करत रहेन। 7जब नगर क प्रमुख लोग पत्र पाइ गएन तब उ पचे राजा क पूतन क लिहन अउर सबहिं सतर पूतन क मार डाएन। तब प्रमुखन राजपूतन क मूँड़ टोकरियन में धरेन। उ पचे टोकरियन क यिज़्रैल में येहू क लगे पठइ दिहन। 8सँदेसवाहक येहू क लगे आएन अउर ओहसे कहेन, “उ पचे राजपूतन क मूँड़ लइके आए अहई।”

तब येहू कहेस, “नगर दुआर पड़, भिंसारे तलक ओन मूँडन क दुइ ढेरन बनाइके रखा।”

9भिंसारे येहू बाहेर निकरा अउर लोगन क समन्वा खड़ा भवा। उ लोगन स कहेस, “तू निरपराध अहा इ मई अउर जउन आपन सुआमी क विरुद्ध योजना बनावा। अउर ओका मार डावा मुला अहाब क एन सब पूतन क कउन मारेस? 10तू पचन्क समुझइ चाही कि यहोवा जउन कछू कहत ह उ घटित होइ अउर यहोवा एलिय्याह क उपयोग अहाब क परिवार क बरे एन बातन क कहइ बरे किहे रहा। अब यहोवा उ कइ दिहस जेनके बरे उ कहे रहा कि “मई करब।”

11इस तरह येहू यिज्रैल में रहइवाले अहाब क पूरे परिवार क मार डाएस। येहू सबहिं महत्वपूर्ण मनइयन, जिगरी दोस्तन अउ याजकन क मार डाएस। उ अहाब क लोगन में स एक भी मनई क जिअत नाही छोड़ेस।

येहू अहज्याह क सम्बन्धियन क मार डावत ह

12येहू यिज्रैल स चला अउ सोमरोन पहुँचा। राहे में येहू “गड़रियन क डेरा” नाउँ क जगह पड़ रूका। जहाँ गड़रियन भेड़िन क ऊन कतरत रहेन। 13येहू यहूदा क राजा अहज्याह क सम्बन्धिया स मिला। अउर ओनसे पूछेस, “तू पचे कउन अहा?”

उ पचे जवाब दिहेन, “हम लोग यहूदा क राजा अहज्याह क रिस्तेदार अही। हम लोग हिआँ राजा क बच्चन अउर राजमाता रानी क गदेलन स मिलइ आए अही।”

14तब येहू अपने लोगन स कहेस, “एनका जिअत धइ ल्या।”

येहू क लोग अहज्याह क रिस्तेदारन क जिअत धइ लिहन। उ पचे बयालीस लोग रहेन। येहू ओनका बेथ-एकद क लगे कुआँ पड़ मार डाएस। येहू कउनो मनई क जिअत नाही छोड़ेस।

येहू यहोनादाब स मिलत ह

15येहू जब उ ठउर स चला तउ रेकाब क पूत यहोनादाब स भेंटा। यहोनादाब येहू स मिलइ आवत रहा येहू यहोनादाब क सुआगत क सुआगत किहेस अउर ओहसे पूछेस, “का तू मोरे ओतने बिस्सासी मीत अहा जेतना मई तोहार हउँ?”

यहोनादाब जवाब दिहस, “हाँ, मई तोहार बिस्सासी मीत हउँ।”

येहू कहेस, “जदि तू अहा तउ, तू आपन हाथ मोका द्या।”

तब येहू बाहेर निहुरा अउर उ यहोनादाब क अपने रथे में हीचं लिहेस।

16येहू कहेस, “मोर संग आवा। तू लखब्या कि यहोवा बरे मोर भावना केतनी प्रबल अहइँ।”

इ तरह यहोनादाब येहू क रथे में बइठा। 17येहू सोमरोन में आवा अउर अहाब क उ सारे परिवार क मार डाएस जउन जिअत रहा। येहू ओन सबहिं क मार डाएस। येहू सबइ काम किहेस जेनका यहोवा एलिय्याह क भविस्सबाणी में कहे रहा।

येहू बाल क उपासकन क बोलाबत ह

18तब येहू सबहिं लोगन क एक संग एकदटा किहस। येहू ओनसे कहेस, “अहाब बाल क सेवा बहोत कम किहस। मुला येहू बाल क बहोत जियादा सेवा करी। 19अब बाल क सबहिं याजकन अउ नबियन अउर ओन सबहिं लोगन क एक संग बोलावा जउन बाल क उपासना करत हीं। कउनो मनई क इ सभा में गैर हाजिर न रहइ द्या। मई बाल क बहोत बड़की बलि चढ़ावइ जात अहउँ। मई उ कउनो भी मनई क मार डाउब जउन एहमाँ हाजिर नाही होइ।”

किन्तु येहू बाल क उपासना करइ वाले लोगन क तबाह करइ बरे गुमराह करत रहेन। 20येहू कहेस, “बाल क बरे एक धर्मसभा करा” अउर याजक लोग धर्मसभा क घोसणा कइ दिहन। 21तब येहू पूरे इस्राएल देस में सँदिसा पठएस। बाल क सबहिं उपासक आएन। कउनो भी मनई अइसा नाही रहा जउन घरे पड़ रहि गवा होइ। बाल क उपासक बाल क मन्दिर में आएन। मन्दिर लोगन स भर गवा।

22येहू लबादा धरइवाले मनई स कहेस, “बाल क सबहिं उपासकन क बरे लबादा लिआवा।” एह बरे उ मनई बाल पूजकन बरे लबादन लिआवा।

23तब येहू अउ रेकाब पूत यहोनादाब बाल क मन्दिर क भीतर गएन। येहू बाल क उपासकन स कहेस, “अपने चारिहुँ कइँती लख ल्या अउर इ निहचइ कइ ल्या कि तोहरे संग कउनो यहोवा क सेवक तउ नाही अहइ। इ निहचइ कइ ल्या कि केवल बालपूजक लोग ही अहइँ।”

24बाल-पूजक बाल क मन्दिर में बलि अउर होमबलि चढ़ावइ गएन।

मुला बाहेर येहू अस्सी मनइयन क प्रतिच्छा में तइयार रखे रहा। येहू कहेस, “मई तोहका कछू लोग देइ वाल हउँ ओनमें स कउनो मनई क बचिके निकरइ न द्या। जदि कउनो मनई कउनो मनई क बचि निकरइ देइ तउ ओकर भुगतान ओका अपनी जिन्गी स करइ होइ।”

25येहू जइसेन ही बलि अउ होमबलि चढ़ाउब पूरा किहस तइसेन ही उ रच्छकन अउ अधिकारियन स कहेस, “भीतर जा अउर बाल-पूजकन क मार डावा। पूजाघर स कउन जिअत मनई क बाहेर न आवइ द्या।”

एह बरे अधिकारियन अपनी पतरी तरवारन क उपयोग किहस अउर बाल-पूजकन क मार डाएन। रच्छकन अउ अधिकारियन बाल-पूजकन क लहासन क बाहेर लोकाइ दिहन तब रच्छक अउ अधिकारियन बाल क पूजाघरे ज भीतरी कमरे में गएन।

26उ पचे बाल क पूजाघर क स्मृति-पासाण क बाहर लइ आएन अउर पूजाघरे क जराइ दिहन। 27तब उ पचे बाल क स्मृति पासाण क तहस-नहस कइ दिहन। उ पचे बाल क पूजाघर क भी मटियामेट कइ दिहन। उ पचे बाल क पूजाघर क एक सौचालय में बदल दिहन। आजु भी ओकर उपयोग सौचालय क बरे होत ह।

28इ तरह येहू इस्राएल में बाल-पूजा क खतम कइ दिहस। 29मुला येहू, नबात क पूत यारोबाम क ओन पापन क करइ स पूरी तरह स नाही रोक सका, जउन इस्राएल स

पाप कराए रहा। येहू दान अउर बेतेल में सोने क बछवन क तबाह नहीं किहिस।

इस्त्राएल पइ येहू क हुकूमत

30यहोवा येहू स कहेस, “तू बहोत नीक किहा ह। तू उ काम किहा ह जेका मई अच्छा बताएउँ ह। तू अहाब क परिवार क उ तरह बर्बाद किहा ह जइसा तोहसे मई ओका बर्बाद करइ चाहत रहा। एह बरे तोहार सन्तान इस्त्राएल पइ चार पीढ़ी तलक हुकूमत करिहीं।”

31मुला येहू पूरे हिरदइ स यहोवा क नेमन क पालन करइ में सावधान नाहीं रहा। येहू यारोबाम क ओन पापन क करब बन्द नाहीं किहिस जउन इस्त्राएल स पाप कराए रहेन।

हजाएल इस्त्राएल क हरावत ह

32उ समइ यहोवा ने इस्त्राएल क कछू हिस्सन पइ ओनकर दुस्मन का कब्जा कइ लेइ दिहिस। अराम क राजा हजाएल इस्त्राएलियन क हर एक सीमा पइ हराएस। 33हजाएल यरदन नदी क पूरब क गिलाद प्रदेस क, गाद, रूबेन अउ मनस्से क परिवार समूह क प्रदेसन सहित जीत लिहिस। हजाएल असेएर स लइके अर्नोन घाटी क सहारे गिलाद अउ साशान तलक क सारी भुईया जीत लिहिस।

येहू क मउत

34उ सबइ बड़के कार्य, जउन येहू किहिस, “इस्त्राएल क राजा लोग क इतिहास” क किताबे में लिखे गए अहई। 35येहू मरा अउर ओका ओकरे पुरखन क संग दफनाइ दीन्ह गवा। लोग येहू क सोमरोन में दफनाएन। ओकरे पाछे येहू क पूत यहोआहाज इस्त्राएल क नवा राजा भवा। 36येहू सोमरोन में इस्त्राएल पइ अट्ठाईस बरिस तलक हुकूमत किहिस।

अतल्याह यहूदा क सबहि राजपूतन क बर्बाद कइ देत ह

11 अहज्याह क महतारी अतल्याह लखेस कि ओकर पूत मरि गवा। तब उ उठी अउर उ राजा क पूरे परिवार क मार डाएस।

2यहोसेबा राजा योराम क बिटिया अउर अहज्याह क बहिन रही। योआस राजा क पूतन में स एक रहा। यहोसेबा योआस क तब छुपाइ लिहिस जब राजा क बाकी पूतन मारे जाइ रहेन। यहोसेबा योआस क छुपाइ दिहिस। उ योआस अउर ओकर धायी क अपने सोना क कमरा में छुपाइ दिहिस। इ तरह यहोसेबा अउ धायी योआस क अतल्याह स छुपाइ लिहिस। इ तरह योआस मारा नाहीं गवा।

3तब योआस अउ यहोसेबा यहोवा क मन्दिर में जाइ छुपेन। योआस हुवाँ छः बरिस तलक छुपा रहा उ छः बरिस अतल्याह यहूदा पइ हुकूमत किहिस।

4सतएँ बरिस प्रमुख याजक यहोयादा करीतन क सेनापतियन क अउ रच्छकन क बोलाएस अउर उ पचे यहोवा क मन्दिर में ओसे भेंटन आएन। तब यहोयादा ओनके संग एक

तु वाचा किहिस। मन्दिर में यहोयादा ओनका प्रतिग्या करइ क मजबूर किहिस। तब उ राजा क पूत योआस क ओनका देखाएस।

5तब यहोयादा ओनका आदेस दिहिस। उ कहेस, “तोहका इ करइ होइ। तोहमाँ स एक तिहाई सबित क दिन में तोहार काम करत ह ओका राजा क महल क रच्छा क जिम्मेवारी दीन्ह जाई। 6दूसर एक तिहाई क सूर- दुआर पइ रहइ क होइ अउर बचे एक तिहाई क रच्छकन क पाछे, दुआर पइ रहब होइ। इ तरह तू लोग इमारत क चारिहुँ कइँती नज़र रख सकब। 7तोहमाँ स दुइ तिहाइ जउन सबित क दिन काम नाहीं करत ह, ओका राजा योआस अउर यहोवा क मन्दिर क रच्छा करइ क होइ। 8जब कहुँ उ जाइ तोहका पचन्क राजा योआस क संग रहइ चाही। पूरे दल क ओका घेरे रहइ चाही। हर एक रच्छक क अपने अस्त्र-सस्त्र अपने हाथे में रखइ चाहीं, अउर तू लोगन क उ कउनो भी मनई क मार डावइ चाही जउन तोहरे पचन्क बहोत जियादा निचके पहाँचइ।

9सेनापतियन याजक यहोयादा क दीन्ह गए सबहि आदेसन क पालन किहिस। हर एक सेनापति अपने फउजियन क लिहिस, कछू जउन उस हफता काम पइ रहेन अउर कछू जउन काम पइ नाहीं रहेन, अउर ओन सबइ क याजक यहोयादा क लगे लइ गएन 10अउर याजक सेनापतियन क भालन अउ ढास दिहेन। इ पचे उ सब भालन अउ ढास दिहेन जेनका दाऊद यहोवा क मन्दिर में धरे रहा। 11इ सबइ रच्छक अपने हाथन में अपने सस्त्र लिहे मन्दिर क दक्खिन कोने स लइके उत्तर कोने तलक खड़े रहेन। उ पचे वेदी अउर मन्दिर क चारिहुँ कइँती खड़े रहेन, ताकि उ पचे राजा क रच्छा सदा कइ सकेन।

12इ सबइ मनई योआस क बाहेर लइ आएन। उ पचे योआस क मुँड़े पइ मुकुट पहिराएन अउर परमेस्सर अउ राजा क बीच क वाचा क ओका दिहेन। तब उ पचे ओकर अभिसेक किहेन अउर ओका नवा राजा बनाएन। उ पचे तालियन बजाएन अउर उद्घोस किहेन, “राजा दीर्घायु होइ।”

13रानी अतल्याह क रच्छकन अउर लोगन क चीखन सुनेन। एह बरे उ यहोवा क मन्दिर में लोगन क लगे गइ। 14अतल्याह उ खम्भा क सहारे राजा क लखेस जहाँ राजा अक्सर खड़े होत रहेन। उ प्रमुखन अउ लोगन क राजा क बरे तुरही बजावत भए भी लखेन। उ लखेस कि सबहि लोग बहोत खुस रहेन। उ तुरही क बजावत भए सुनेस अउर उ आपन ओढ़ना इ परगठ करइ बरे फार डाएस कि ओका बड़ी घबराहट अहइ। तब अतल्याह चिल्लाइ उठी, “सड्यन्त्र! सड्यन्त्र!”

15याजक यहोयादा फउजियन क व्यवस्था क अधिकारी सेनापतियन क हुकूम दिहिस। यहोयादा ओनसे कहेस, “अतल्याह क आपन फउजियन क पंक्तिन में स होइके मन्दिर क छेत्र स बाहेर लइ जा अउर जउन भी ओकर पाछा करइ मार डावा।”

यहोयादा नाहीं चाहत रहा कि उ भी यहोवा क मन्दिर में मरे।

16उ पचे ओकरे बरे रास्ता बनाएस अउर ओन दरवाजन स होइके महल स बाहर निकारा जउने जगह स घोड़ा निकरत ह, अउर ओका मार डाएस।

17तब यहोयादा यहोवा, राजा अउ लोगन क बीच एक तु सन्धि कराएस। इ वाचा स इ पता चलत रहा कि राजा अउ लोग यहोवा क अपने ही अहई। यहोयादा राजा अउ लोगन क बीच भी एक तु वाचा कराएस।

18तब सबहिं लोग बाल क पूजागृह क गएन। लोग बाल क मूर्ति अउ ओकर बेदियन क बर्बाद कइ दिहन। उ पचे ओनकर बहोत स टूकन कइ डाएन। लोग बाल क याजक मत्तन क भी वेदी क समन्वा मार डाएन।

तब याजक यहोयादा कछू लोगन क यहोवा क मन्दिर क देखभाल बरे निगराकार क रूप में रखा। 19यहोयादा सेनापतियन, बिसेस फउजियन अउर आम लोगन क लिहेस, अउर उ सबइ राजा योआस क यहोवा क मन्दिर स महल में लइ गएन। उ पचे रच्छकन क दुआर होइके स राजा क महल तलक गएन। तब राजा योआस राजसिंहासने पइ बइठा। 20सबहिं लोग खुस रहेन। नगर सान्त रहा। रानी अतल्याह, राजा क महल क लगे तरवार क घाट उतार दीन्ह गइ रही।

21जब योआस राजा भवा, उ सात बरिस क रहा।

योआस आपन हुकूमत सुरू करत ह

12 योआस इस्त्राएल में येहू क राजकाल क सताएँ बरिस में हुकूमत करब सुरू किहस। योआस चालीस बरिस तलक यरूसलेम में हुकूमत किहस। योआस क महतारी सिब्या बर्सेवा क रही। 2योआस उ सबहिं कार्य किहस जेनका यहोवा नीक कहे रहा। योआस पूरी जिन्नगी यहोवा क आग्या क पालन किहस। उ उ सबइ कार्य किहस जेनकर सिच्छा याजक यहोयादा ओका दिहे रहा। 3मुला उ उच्च ठउरन क बर्बाद नाहीं किहस। लोग तब तलक भी ओन पूजा क ठउरन पइ बलि भेंट करतेन अउ सुगन्धि बारत रहेन।

योआस मन्दिर क मरम्मत क आवेस दिहस

4-5योआस याजकन स कहेस, “यहोवा क मन्दिर में बहोत धन अहइ। लोग मन्दिर में चिजियन दिहे अहई। लोग गणना क समइ मन्दिर क कर दिहेन ह अउर लोगन आपन इच्छा स धन दिहे ह। याजकन, आप लोग उ धन क लइ लेई अउर यहोवा क मन्दिर क मरम्मत करवाइ देई।”

6मुला याजक लोग मरम्मत नाहीं किहन। योआस क राजकाल क तेईसवें बरिस में भी याजक लोग तब तलक मन्दिर क मरम्मत नाहीं किहे रहेन। 7एह बरे योआस याजक यहोयादा अउ दूसर याजकन क बोलाएस। योआस यहोयादा अउ दूसर याजकन स पूछेस, “आप मन्दिर क मरम्मत काहे नाहीं किहन? आप ओन लोगन स धन लेब बन्द करई जेनकर आप सेवा करत हीं। उ धने क उपयोग में लिआउब बंद करई। उ धने क उपयोग मन्दिर क मरम्मत में होइ चाही।”

8याजक लोग यहोवा स धन न लेब स्वीकार किहन। मुला उ पचे मन्दिर क मरम्मत न करइ क निहचइ किहेन। 9एह बरे याजक यहोयादा स एक तु सन्दूख लिहस अउ ओकरे ऊपरी हीसा में एक छेद कइ दिहस। तब यहोयादा सन्दूख क बेदी क दक्खिन कइँती रख दिहस। इ सन्दूख उ दरवाजे क लगे रहा जेहसे लोग यहोवा क मन्दिर में आवत रहेन। कछू याजक मन्दिर क दुआर- पथे क रच्छा करत रहेन। उ सबइ याजक उ धने क जेका लोग यहोवा क देत रहेन, लइ बते रहेन अउर उ सन्दूख में डाइ देत रहेन। जब लोग मन्दिर क जात रहेन तब उ पचे उ सन्दूख में सिक्कन डावत रहेन।

10जब भी राजा क सचिव अउ महायाजक इ जानतेन कि मन्दिर में रखे सन्दूख में बहोत धन अहइ तउ उ पचे अउतेन अउर सन्दूख स धन क निकार लेतेन। उ पचे धन क थइलन में रखतेन अउर ओका गिन लेत रहेन। 11तब उ पचे ओन मजदूरन क भुगतान करतेन जउन यहोवा क मन्दिर में काम करत रहेन। उ पचे यहोवा क मन्दिर में काम करइवालन बढइयन अउ दूसर कारीगरन क भुगतान करत रहेन। 12उ पचे धन क उपयोग पाथर क कामगारन अउ पाथर तरासन क भुगतान करइ में करत रहेन अउर उ पचे उ धने क उपयोग लकड़ी, काटे पाथर, अउर यहोवा क मन्दिर क मरम्मत क बरे दूसर चिजियन क बेसहइ में करत रहेन।

13-14लोग यहोवा क मन्दिर क बरे धन दिहन। किन्तु याजक उ धने क उपयोग चाँदी क बर्तन, बत्ती- झाड़नी, चिलमची, तुरही या कउनो भी सोना- चाँदी क तस्तरियन क बनाबइ में नाहीं कइ सकेन। उ धन मजदूरन क भुगतान करइ में लगा अउर ओन मजदूरन यहोवा क मन्दिर क मरम्मत किहन। 15कउनो सारे धन क हिसाब नाहीं किहस या कउनो कार्यकर्ता क इ बतावइ बरे मजबूर नाहीं कीन्ह गवा कि धने क का भवा? काहेकि ओन कार्यकर्तन पइ बिस्पास कीन्ह जाइ सकत रहा।

16लोग उ समइ धन दिहस जब उ पचे दोखबलि या पापबलि चढ़ाएन। किन्तु उ धने क उपयोग मजदूर क भुगतान क बरे नाहीं कीन्ह गवा। उ धन याजकन क रहा।

योआस हजाएल स यरूसलेम क रच्छा करत ह

17हजाएल अराम क राजा रहा। हजाएल गत नगर क खिलाफ जुद्ध करइ गवा। हजाएल गत क हराएस। तब उ यरूसलेम क खिलाफ जुद्ध करइ जाइ क योजना बनाएस।

18यहोसापात, यहोराम अउ अहज्याह यहूदा क राजा रह चुके रहेन। उ पचे योआस क पुरखा रहेन। उ पचे यहोवा क बहोत स चिजियन भेंट किहे रहेन। उ सबइ चिजियन मन्दिर में रखी रहिन। योआस भी बहोत स चिजियन यहोवा क भेंट किहे रहा। योआस ओन सबहिं बिसेस चिजियन अउ मन्दिर अउ अपने महल में रखे भए सारे सोना क लिहस। तब योआस ओन सबहिं कीमती चिजियन क अराम क राजा हजाएल क लगे पठाएस। इहइ स हजाएल अपनी फउज क यरूसलेम स हटाइ लिहस।

योआस क मउत

19योआस जउन बड़के कारज किहस उ सबइ सबहिं “यहूदा क राजा लोगन क इतिहास” क किताबे में लिखे गए अहईं।

20योआस क अधिकारी लोग ओकरे खिलाफ योजना बनाएस। उ पचे योआस क सिल्ला तलक जाइ वाली सड़किया पर स्थित मिल्लो क घरे पइ मार डाएस। 21सिमात क पूत योजाकर अउ सोमेर क पूत यहोजाबाद योआस क अधिकारी रहेन। ओन मनइयन योआस क मार डाएन। लोग दाऊद नगर में योआस क ओकरे पुरखन क संग दफनाएन। योआस क पूत अमस्याह ओकरे पाछे नवा राजा बना।

यहोआहाज अपनी हुकूमत सुरू करत ह

13 येहू क पूत यहोआहाज सोमरोन में इस्त्राएल क राजा बना। इ अहज्याह क पूत योआस क यहूदा में राजकाल क तेईसवें बरिस में भवा। राजा बनइ क पाछे यहोआहाज सत्रह बरिस सोमरोन में राज किहस।

2यहोआहाज उ सबइ कारज किहस जेनका यहोवा बुरा बताए रहा। यहोआहाज नबात क पूत यारोबाम क पापन क अनुसरण किहस जउन इस्त्राएल स पाप कराएस। यहोआहाज ओन कामन क करब बंद नाहीं किहस। अतब यहोवा इस्त्राएल पइ बहोत कोहाइ गवा। यहोवा इस्त्राएल क अराम क राजा हजाएल अउ ओका पूत बेन्हदद क अधीन कइके लम्बे समइ तलक सजा दिहस।

यहोवा इस्त्राएल क लोगन पइ कृपा किहस

4तब यहोआहाज यहोवा स मदद बरे पराथना किहस अउर यहोवा ओकर पराथना सुनेस। यहोवा इस्त्राएल क लोगन क कस्ट अउ अराम क राजा क उत्पीड़न लखे रहा।

5एह बरे यहोवा एक मनई क इस्त्राएल क रच्छा बरे पठाएस। इस्त्राएली अरामियन स अजाद होइ गएन। एह बरे, इस्त्राएली, पहले क तरह अपने घरे लउट गएन।

6मुला इस्त्राएलियन फुन भी, ओन यारोबाम क परिवार क पापन क करव बंद नाहीं किहस। यारोबाम इस्त्राएल स पाप करवाएस, अउर इस्त्राएली निरंतर पाप करम करत रहेन। उ पचे असेरा क खंभन क भी सोमरोन में धरेन।

7अराम क राजा यहोआहाज क फउज क हराइ दिहस। अराम क राजा जियादा हीसा क लोगन क नस्ट कइ दिहस। उ सिरिफ पचास घुड़सवार, दस रथ, अउर दस हजार पैदल फउजी छोड़ेस। यहोआहाज क फउजी दायं चलावत समइ हवा स उड़ाए गए भूसे क तरह रहेन।

8सबहिं बड़े कारज जउन यहोआहाज कहेस, “इस्त्राएल क राजा लोगन क इतिहास” क किताबे में लिखे अहईं। 9यहोआहाज मरा अउर अपने पुरखन क संग दफनावा गवा। लोग यहोआहाज क सोमरोन में दफनाएन। यहोआहाज क पूत यहोआस ओकरे पाछे नवा राजा भवा।

इस्त्राएल पइ यहोआस क हुकूमत

10यहोआहाज क पूत यहोआस सोमरोन में इस्त्राएल क राजा भवा। इ योआस क यहूदा में राजकाल क सैतीसेवें

बरिस में भवा। यहोआस इस्त्राएल पइ सोलह बरिस तलक राज किहस। 11इस्त्राएल क राजा यहोआस उ सबइ कारज किहस जेनका यहोवा बुरा बताए रहा। उ नबात क पूत यारोबाम क पापन क बंद नाहीं किहस जउन इस्त्राएल स पाप कराएस। यहोआस ओन पापन क करत रहा। 12सबहिं बड़के कारज जउन यहोआस किहस अउर यहूदा क राजा अहज्याह क खिलाफ उ जउन जुद्ध किहस उ सबइ “इस्त्राएल क राजा लोगन क इतिहास” क किताबे में लिखे अहईं। 13यहोआस मरा अउर अपने पुरखन क संग दफनावा गवा। यारोबाम नवा राजा बना अउर यहोआस क राजा सिहांसने पइ बइठा। यहोआस सोमरोन में इस्त्राएल क राजा लोगन क संग सफनावा गवा।

यहोआस एलीसा स भेट करत ह

14एलीसा बीमार पड़ा। पाछे एलीसा बेरामी स मर गवा। इस्त्राएल क राजा यहोआस एलीसा भेंटइ गवा। यहोआस एलीसा बरे रोएस। यहोआस कहेस, “मोर बाप। मोर बाप! का इ इस्त्राएल क रथन अउर घोड़न क बरे समइ अहइ?”

15एलीसा यहोआस स कहेस, “एक ठु धनुस अउर कछू बाण ल्या।”

अतः बह धनुस-बाण ले आया। 16तब एलीसा इस्त्राएल क राजा स कहेस, “आपन हाथ धनुस पइ धरा।” तब एलीसा आपन हाथ राजा क हाथे पइ रखेस। 17एलीसा कहेस, “पूरब क खिड़की खोला।” यहोआस खिड़की खोलेस। तब एलीसा कहेस, “बाण चलावा।”

यहोआस बाण चलाइ दिहस। तब एलीसा कहेस, “इ यहोवा क बिजय क बाण अहइ। इ अराम पइ बिजय क बाण अहइ। तू अरामियन क अपेक में हरउब्या अउर तू ओनका नस्ट कइ देब्या।”

18एलीसा कहेस, “बाण ल्या।” योआस बाण लिहस। तब एलीसा इस्त्राएल क राजा स कहेस, “भुईया पइ प्रहार करा।”

योआस भुईया पइ दीन दाई प्रहार किहस। तब उ रूक गवा। 19परमेस्सर क जन योआस पइ कोहाइ गवा। एलीसा कहेस, “तोहका पाँच या छः दाई धरती पइ प्रहार करइ चाही रहा। तब तू अराम क ओका नस्ट करइ तलक हरउब्या। किन्तु अब तू अराम क सिरिफ तीन दाई हरउब्या।”

एलीसा क कब्र पइ एक अद्भुत बात होत ह

20एलीसा मरा अउर लोग ओका दफनाएन।

एक दाई बसन्त में मोआबी फउजियन क एक दल इस्त्राएल पई छापा मारेस। उ पचे जुद्ध में सामग्री लेइ आएन। 21कछू इस्त्राएली एक मरे मनई क दफनावत रहेन अउर उ पचे फउजियन क उ दल क लखेन। इस्त्राएलियन हाली में लहास क एलीसा क कब्र में फेंक दिहेन अउर उ पचे भाग खड़े भएन। जइसेन ही उ मरा मनई एलीसा क हाड़न क छुएस, मरा मनई जी उठा अउर अपने गोड़न पइ खड़ा होइ गवा।

यहोआस एलीसा स भेट करत ह

22 यहोआहाज पूरे सासन काल में अराम क राजा हजाएल इस्त्राएल क परेसान किहस। 23 किन्तु यहोवा इस्त्राएलियन पइ दयालु रहा। यहोवा क दया आइ अउर उ इस्त्राएलियन कइँती भवा। काहे? काहेकि इब्राहीम, इसहाक अउर याकूब क संग अपनी वाचा क कारण, यहोवा इस्त्राएलियन क अबहिं नस्ट करइ बरे तइयार नाहीं रहा। उ अबहिं तलक ओनका अपने स दूर नाहीं फेंके रहा।

24 अराम क राजा हजाएल मरा अउर ओकरे पाछे बेन्हदद नवा राजा बना। 25 मरइ क पहले हजाएल योआस क पिता यहोआहाज क जुद्ध में कछू नगर लिहे रहा। किन्तु अब यहोआहाज हजाएल क पूत बेन्हदद स उ सबइ नगर वापस लइ लिहस। योआस बेन्हदद क तीन दाईं हराएस अउर इस्त्राएल क नगरन क वापस लिहस।

अमस्याह यहूदा में आपन हुकूमत सुरू करत ह

14 योआस क पूत अमस्याह, इस्त्राएल क राजा यहोआहाज क पूत योआस क हुकूमत काल क दूसरे बरिस में यहूदा क राजा भवा। 2 अमस्याह जब हुकूमत करब सुरू किहस, उ पचीस बरिस क रहा। अमस्याह उनतीस बरिस तलक यरूसलेम में राज्ज किहस। अमस्याह क महतारी यहोअददान यरूसलेम क निवासी रही। 3 अमस्याह उ सबइ कारज किहेस जेनका यहोवा नीक बताए रहा। किन्तु उ आपन पुरखा दाऊद क तरह परमेस्सर क अनुसरण पूरी तरह स नाहीं किहस। अमस्याह उ सबइ सारे काम किहस जउन ओकर बाप योआस किहे रहेन। 4 उ उच्च ठउरन क नस्ट नाहीं किहस। लोग ओन पूजा क ठउरन पइ बलि देतेन अउर सुगन्धि बारत रहेन।

5 राज्ज पइ पूरा अधिकार करइ क पाछे अमस्याह ओन अधिकारियन क मार डाएस जउन ओकरे बाप क मारे रहेन। 6 मुला उ हतियारन क बच्चन क, “मूसा क व्यवस्था” क किताबे में लिखे नेमन क कारण नाहीं मारेस। यहोवा आपन इ आदेस मूसा क व्यवस्था में दिहे रहा: “महतारी- बाप बच्चन क जरिये कछू कीन्ह जाइ क कारण मारे नाहीं जाइ सकतेन अउर बच्चन अपने महतारी बाप क जरिये कछू कीन्ह जाइ क कारण मारे नाहीं जाइ सकतेन। कउनो मनई सिरिफ अपने ही बुरे कारज बरे मारा जाइ सकत ह।”

7 अमस्याह नून घाटी में दस हजार एदोमियन क मार डाएस। जुद्ध में अमस्याह सेला क जीतेस अउर ओकर नाउँ “योक्तेल” धरेस। उ ठउर आजु भी योक्तेल कहा जात ह।

अमस्याह योआस क खिलाफ जुद्ध छेड़ि चाहत ह

8 अमस्याह इस्त्राएल क राजा येहू क पूत यहोआहाज अउर यहाआहाज क पूत योआस क लगे संदेसवाहक पठएस। अमस्याह क संदेस में कहा, “आवा, हम आपुस में जुद्ध करी। आमने सामने होइके एक दूसरे क मुकाबला करी।” 9 इस्त्राएल क राजा योआस यहूदा क राजा अमस्याह क उत्तर पठएस। योआस कहेस, “लबानोन क एक ठु कँटहरी

झाड़ी देवदारू बृच्छ क लगे एक संदेसा पठएस। संदेसा इ रहा, ‘अपनी बिटिया, मोरे पूत क संग बियाहे बरे द्या।’ मुला लबानोन क एक जंगली जनावर ओहर स निकरा अउर कँटहरी झाड़ी क कुचर गवा। 10 इ फुर अहइ कि तू एदोम क हराया ह। किन्तु तू एदोम पइ जीत क कारण घमण्डी होइ गवा अहा। अपनी प्रसिद्धि क आनंद उठावा अउर घरे पइ रहा। अपने बरे परेसानियन मत खड़ी करा। जदि तू अइसा करब्या तउ तू हार जाब्या अउर तू आपन संग यहूदा क भी हराउब्या।”

11 मुला अमस्याह योआस क चितवनी क नाहीं सुनेन। एह बरे इस्त्राएल क राजा योआस यहूदा क राजा अमस्याह क खिलाफ यहूदा क बेतसेमेस में लड़इ बरे गवा। 12 इस्त्राएल यहूदा क हराइ दिहस। यहूदा क हर एक मनई घरे पराइ गवा। 13 बेतसेमेस में इस्त्राएल क राजा योआस यहूदा क राजा अमस्याह क बन्दी बनाइ लिहस। अमस्याह योआस क पूत रहा। योआस अहज्या क पूत रहा। योआस अमस्याह क यरूसलेम लइ गवा। योआस एप्रैम दुआर स कोने क फाटक तलक लगभग छः सौ फुट यरूसलेम क देवार क गिरवाएस। 14 तब योआस सारा सोना- चाँदी अउर जउन भी बर्तन यहोवा क मन्दिर अउर राजमहल क खजाने में रहेन। ओन सब क लूट किहस। योआस कछू लोगन क बन्दी बनाइ लिहस। तब उ सोमरोन क वापस लउट गवा।

15 जउन सबहिं बड़के कारज योआस किहस, साथ ही साथ यहूदा क राजा अमस्याह क संग उ कइसे लड़ा, “इस्त्राएल क राजा लोगन क इतिहास” क किताबे में लिखे गए अहइँ। 16 योआस मरा अउर अपने पुरखन क संग दफनावा गवा। योआस सोमरोन में इस्त्राएल क राजा लोगन क संग दफनावा गवा। योआस क पूत यारोबाम ओकरे पाछे नवा राजा भवा।

अमस्याह क मउत

17 यहूदा क राजा योआस क पूत अमस्याह इस्त्राएल क राजा यहोआहाज क पूत योआस क मउत क पाछे पन्द्रह बरिस तलक जिआ। 18 अमस्याह जउन कारज किहस उ सबइ “यहूदा क राजा लोगन क इतिहास” क किताबे में लिखे गएन अहइँ। 19 लोग यरूसलेम में अमस्याह क खिलाफ एक ठु योजना बनाएन। अमस्याह लाकीस क पराइ निकरा। मुला लोग अमस्याह क खिलाफ लाकीस क अपने मनई पठएस अउर ओन लोग लाकीस में अमस्याह क मार डाएस। 20 लोग घोड़न पइ अमस्याह क लहास क वापस लइ आएन। अमस्याह दाऊद नगर में अपने पुरखन क संग यरूसलेम में दफनावा गवा।

अजर्याह यहूदा पइ आपनी हुकूमत सुरू करत ह

21 तब यहूदा क सबहिं लोग अजर्याह क ओकरे बाप अमस्याह क जगह पइ नवा राजा बनाएन। अजर्याह सोलह बरिस क रहा। 22 इ तरह अमस्याह मरा अउर अपने पुरखन क संग दफनावा गवा। तब अजर्याह एलत क यहूदा बरे फुन पाएस अउर ओका फुन बनाएस।

यारोबाम दूसरा इस्राएल पइ हुकूमत सुरू करत ह

23इस्राएल क राजा योआस क पूत यारोबाम सोमरोन में यहूदा क राजा योआस क पूत अमस्याह क राजकाल क पन्द्रहवें बरिस में हुकूमत करब सुरू किहस। 24यारोबाम उ सबइ कारज किहेस जेनका यहोवा बुरा बताएस। यारोबाम उ नबात क पूत यारोबाम क पापन क करब बंद नाहीं किहस, जउन इस्राएल क पाप करइ बरे मजबूर किहस। 25यारोबाम उ भुइँया क, जउन लेवी हमात स अराबा क सागर तलक जात रही, वापस लिहस। इ वइसा ही भवा जइसा इस्राएल क यहोवा परमेस्सर अपने सेवक, अमितै क पूत योना स कहे रहा। जउन कि गथेपेर क नबी रहा। 26यहोवा लखेस कि सबहिं इस्राएली, चाहे उ पचे अजाद होईं या दास, बहोत स परेसानियन में अहईं। कउनो मनई अइसा नाहीं बचा जउन इस्राएल क मदद कइ सकत रहा। 27यहोवा इ नाहीं काहे रहा कि उ संसार स इस्राएल क नाउँ उठाइ लेइ। एह बरे यहोवा योआस क पूत यारोबाम क उपयोग इस्राएल क लोगन क रच्छा बरे किहेस।

28यारोबाम जउन बड़के कारज किहस उ सबइ “इस्राएल क राजा लोगन क इतिहास” क किताबे में लिखे अहईं। ओहमें इस्राएल क बरे दमिस्क अउर हमात क यारोबाम जरिये वापस जीत लेइ क कथा सामिल अहइ। (पहिले इ सबइ नगर यहूदा क आधिपत्य में रहेन।) 29यारोबाम मरा अउर इस्राएल क राजा लोगन, अपने पुरखन क संग दफनावा गवा। यारोबाम क पूत जकर्याह ओकरे पाछे नवा राजा भवा।

यहूदा पइ अजर्याह क हुकूमत

15 यहूदा क राजा अमस्याह क पूत अजर्याह इस्राएल क राजा यारोबाम क राजकाल क सताइसवें बरिस में राजा बना। 2हुकूमत करब सुरू करइ क समइ अजर्याह सोलह बरिस क रहा। अजर्याह यरूसलेम में बावन बरिस तलक हुकूमत किहस। अजर्याह क महतारी यकोल्याह यरूसलेम स रही। 3अजर्याह ठीक अपने बाप अमस्याह क तरह उ सबइ काम किहस जेनका यहोवा अच्छा बताए रहा। अजर्याह ओन सबहिं कामन क अनुसरण किहस जेनका ओकर बाप अमस्याह किहे रहा। 4मुला उ ऊँच ठउरन क नस्ट नाहीं किहस। लोगन हुआँ बलियन चढ़ावत रहे अउर धूप जरावत रहे।

5यहोवा राजा अजर्याह क नोस्कान करइवाले कोढ़ रोग क रोगी बनाइ दिहस। उ मरइ क दिन तलक इहइ रोग स पीड़ित रहा। अजर्याह एक अलग महल में रहत रहा। राजा क पूत योताम राजमहल क देखभाल अउर जनता क संग निआत करत रहा।

6अजर्याह जउन काम किहस उ सबइ, “यहूदा क राजा लोग क इतिहास” क किताबे में लिखे अहईं। 7अजर्याह मरा अउर अपने पुरखन क संग दाऊद क नगर में दफनावा गवा। अजर्याह क पूत योताम ओकरे पाछे नवा राजा भवा।

इस्राएल पइ जकर्याह क अल्पकालीन सासन

8यारोबाम क पूत जकर्याह सोमरोन में इस्राएल पइ छः महीने तलक हुकूमत किहस। जकर्याह यहूदा क राजा अजर्याह क राजकाल क अड़तीसवें बरिस में राजा भवा। 9जकर्याह उ सबइ कारज किहेस जेनका यहोवा बुरा कहे रहा। उ उ सबइ ही कारज किहेस जउन ओकरे पुरखन किहे रहेन। उ नबात क पूत यारोबाम क पापन क करब बंद नाहीं किहेस जउन इस्राएल क पाप करइ बरे मजबूर किहस।

10याबेस क पूत सल्लूम जकर्याह खिलाफ योजना बनाएस अउर लोगन क बीच में ओह पइ हमला कइके ओका इल्लैम में मार डाएस। फुन सल्लूम ओकरे जगह पइ नवा राजा भवा। 11जकर्याह जउन दूसर कारज किहेस उ सबइ “इस्राएल क राजा लोगन क इतिहास” क किताबे में लिखे अहईं। 12इ तरह यहोवा क कथन फुरइ सिद्ध भवा। यहोवा येहू स कहे रहा कि ओकरे संतानन क चार पीढ़ियन इस्राएल पइ राजा क तरह राज करब्या।

सल्लूम क इस्राएल पइ अल्पकालीन सासन

13याबेस क पूत सल्लूम यहूदा क राजा उज्जियाह क राजकाल क उनतालीसवें बरिस में इस्राएल क राजा बना। सल्लूम सोमरोन में एक महीने तलक सासन किहस।

14गादी क पूत मनहेम तिस्रा स सोमरोन आइ पहोंचा। मनहेम याबेस क पूत सल्लूम क मार डाएस। तब ओकरे पाछे मनहेम नवा राजा भवा। 15सल्लूम जकर्याह क खिलाफ सडयंत्र करइ सहित जउन कारज किहेस, उ सबइ सबहिं “इस्राएल क राजा लोगन क इतिहास” क किताबे में लिखे गएन अहईं।

इस्राएल पइ मनहेम क हुकूमत

16सल्लूम क मरइ क पाछे मनहेम तिप्सह, एहमें रहइवाले सबइ लोगन क अउर तिस्रा स सुरू होइवालन छेत्रन क हराई दिहेस। लोग ओकरे बरे नगर दुआर क खोलब मना कइ दिहन। एह बरे मनहेम ओनका हराइ दिहस अउर नगर क सबहिं गरभवती मेहररूअन क गरभ क चीर गिराएस।

17गादी क पूत मनहेम यहूदा क राजा जकर्याह क राजकाल क उनतालीसवें बरिस में इस्राएल क राजा भवा। मनहेम सोमरोन में दस बरिस हुकूमत किहस। 18मनहेम उ सबइ काम किहेस जेनका यहोवा बुरा बताए रहा। मनहेम पूरी जिन्नगी, नबात क पूत यारोबाम क पापन क करब बंद नाहीं किहेस, जउन इस्राएल स पाप कराएस।

19अस्सूर क राजा पूल इस्राएल क खिलाफ जुद्ध करइ आवा। मनहेम पूल क पचहतर हजार पौण्ड चाँदी दिहस। उ इ एह बरे किहस कि पूल मनहेम क बल प्रदान करी अउर जेहसे राज पइ ओकर अधिकार सुदढ़ होइ जाइ। 20मनहेम सबहिं धनी अउर सक्तीसाली लोगन स करन क भुगतान करवाइके धन बटोरेस। मनहेम हर मनई पइ चाँदी क पचास सेकेल कर लगाएस। तब मनहेम अस्सूर क राजा क धन

दिहस। एह बरे अस्सूर क राजा चला गवा अउर इस्राएल में नाहीं ठहरा।

21मनहेम जउन कारज किहेस उ सबइ “इस्राएल क राजा लोगन क इतिहास” क किताबे में लिखे अहई। 22मनहेम मरा अउर अपने पुरखन क संग दफनावा गवा। मनहेम क पूत पकह्याह ओकरे पाछे नवा राजा भवा।

इस्राएल पइ पकह्याह क हुकूमत

23मनहेम क पूत पकह्याह यहूदा क राजा अजर्याह क राजकाल क पचासवें बरिस में सोमरोन में इस्राएल क राजा भवा। पकह्याह दुइ बरिस तलक राज्ज किहस। 24पकह्याह नबात क पूत यारोबाम क पापन क करब बन्द नाहीं किहस जउन इस्राएल क पाप करइ बरे मजबूर किहे रहा।

25पकह्याह क फउज क सेनापति रमल्याह क पूत पेकह रहा। पेकह पकह्याह क मार डाएस। उ ओका सोमरोन में राजा क महल में मारेस। पेकह जब पकह्याह क मारेस, ओकरे संग अरगोब अरीआह अउर गिलाद क पचास मनसेधू रहेन। तब पेकह ओकरे पाछे नवा राजा भवा।

26पकह्याह जउन काम किहस उ सबइ “इस्राएल क राजा लोगन क इतिहास” क किताबे में लिखे अहई।

इस्राएल पइ पेकह क हुकूमत

27रमल्याह क पूत पेकह यहूदा क राजा अजर्याह क राजकाल क बावनेवे बरिस में इस्राएल पइ हुकूमत करब सुरू किहेस। पेकह बीस बरिस तलक सासन किहस। 28पेकह उ सबइ काम किहस जेनका यहोवा बुरा कहे रहा। पेकह इस्राएल क पाप करइ बरे मजबूर करइवाले नबात क पूत यारोबाम क पाप करमन क करब बंद नाहीं किहस।

29अस्सूर क राजा तिगलत्पिलेसेर इस्राएल क खिलाफ लड़इ आवा। इ उहइ समइ रहा जब पेकह इस्राएल क राजा रहा। तिगलत्पिलेसेर इयोनन अबेल्बेत्माका, यानोह, केदेस, हासोर, गिलाद, गालील अउर नप्ताली क सारे छेल पइ अधिकार कइ लिहस। तिगलत्पिलेसेर एन जगहन पइ लोगन क बन्दी बनाइके अस्सूर लड़ गवा।

30एला क पूत होसे रमल्याह क पूत पेकह क खिलाफ सइयंत्र किहस। होसे पेकह क मार डाएस। तब होसे पेकह क पाछे नवा राजा बना। इ यहूदा क राजा उज्जियाह क पूत योताम क राजकाल क बीसवें बरिस में भवा।

31पेकह जउन सारे कारज किहस उ सबइ “इस्राएल क राजा लोगन क इतिहास” क किताबे में लिखे अहई।

यहूदा पइ योताम हुकूमत करत ह

32उज्जियाह क पूत योताम यहूदा क राजा बना। उ इ इस्राएल क राजा रमल्याह क पूत पेकह क राजकाल क दूसरे बरिस में भवा। 33योताम जब राजा बना, उ पच्चीस बरिस क रहा। योताम यरूसलेम में सोलह बरिस तलक हुकूमत किहस। योताम क महतारी सादोक क बिटिया यरूसा रही। 34योताम अपने बाप उज्जियाह क तरह उ सबइ काम किहेस, जेनका यहोवा ठीक बताए रहा। 35मुला उ ऊँच ठउरन क नस्त नाहीं किहेस। लोग ओन पूजा ठउरन

पइ तब भी बलि चढ़ावत अउर सुगन्धि बारत रहेन। योताम यहोना क मन्दिर क उपरी दुआर बनवाएस। 36सबहिं कारज जउन योताम किहस उ सबइ “यहूदा क राजा लोगन क इतिहास” क पुस्तक में लिखे अहई।

37उ समइ यहोवा अराम क राजा रसीन अउर रमल्याह क पूत पेकह क यहूदा क खिलाफ लड़इ पठएस।

38योताम मरा अउर अपने पुरखन क संग दफनावा गवा। योताम अपने पुरखन दाऊद क नगर में दफनावा गवा। योताम क पूत आहाज ओकरे पाछे नवा राजा भवा।

आहाज यहूदा क राजा बनत ह

16 योताम क पूत आहाज इस्राएल क राजा रमल्याह क पूत पेकह क राजकाल क सत्रहवें बरिस में यहूदा क राजा बना। 2आहाज जब राजा बना उ बीस बरिस क रहा। आहाज यरूसलेम में बीस बरिस तलक राज्ज किहस। आहाज उ सबइ काम नाहीं किहेस जेनका यहोवा अच्छा बताए रहा। उ परमेस्सर क आग्या क पालन अपने पुरखा दाऊद क तरह नाहीं किहेस। 3आहाज इस्राएल क राजा लोगन क तरह रहा। उ अपने पूत क बलि आगी में दिहस। उ ओन रास्ट्रन क घोर पापन क किहेस जेनका यहोवा देस छोड़इ क मजबूर तब किहे रहा जब इस्राएली लोग हुवाँ आए रहेन। 4आहाज ऊँची जगहन, पहाड़ियन अउर हर एक हरे पेड़ क नीचे बलि चढ़ाएस अउ सुगन्धि बारेस।

5अराम क राजा रसीन अउर इस्राएल क राजा रमल्याह क पूत पेकह, दुइनउँ यरूसलेम क खिलाफ लड़इ आएन। रसीन अउ पेकह आहाज क घेरि लिहन किन्तु उ पचे ओका हराइ नाहीं सकेन। 6उ समइ अराम क राजा अराम क बरे एलत क वापस लड़ लिहस। रसीन एलत में रहइवाले सबहिं यहूदा क निवासियन क जबरदस्ती निकारेस। अरामी लोग एलत में बस गएन अउर उ पचे आजु भी हुवाँ रहत अहई।

7आहाज अस्सूर क राजा तिगलत्पिलेसेर क लगे सदेसवाहक पठएस। सँदेसा इ रहा: “मई आपक सेवक हउँ। मई आपके पूत क तरह हउँ। आवई, अउर मोका अराम क राजा अउर इस्राएल क राजा स बचावई। उ पचे मोहसे जुद्ध करइ आए अहई।” 8आहाज यहोवा क मन्दिर अउ राजमहल क खजाने में जउन सोना अउर चाँदी रहा ओका भी लड़ लिहस। तब आहाज अस्सूर क राजा क भेंट पठएस। 9अस्सूर क राजा ओकर बात मान लिहस। उ दमिस्क क खिलाफ लड़इ बरे गवा। राजा उ नगर पइ अधिकार कइ लिहस अउर लोगन क किर क बन्दी बनाइके लड़ गवा। उ रसीन क भी मार डाएस।

10राजा आहाज अस्सूर क राजा तिगलत्पिलेसेर स भेंटइ गवा। आहाज दमिस्क में वेदी क लखेस। राजा आहाज इ वेदी क एक ठु नमूना अउर ओकर व्यापक रूपरेखा, याजक ऊरियाह क पठएस। 11तब याजक उरियाह राजा आहाज क जरिये दमिस्क स पठए गए नमूने क समान ही एक ठु वेदी बनाएस। याजक उरियाह इ प्रकार क वेदी राजा आहाज क दमिस्क स लउटइ क पहिले बनाएस।

12जब राजा दमिस्क स लउटा तउ उ वेदी क लखेस। उ वेदी पइ भेंट चढ़ाएस। 13वेदी पइ आहाज होमबलि अउ अन्नबलि चढ़ाएस। उ आपन पेयबोलि डाएस अउर अपनी मेलबलि क खून क इ वेदी पइ छिछकारेस।

14आहाज उ काँसे क वेदी क जउन यहोवा समन्वा रही मन्दिर क समन्वा क जगह स हटाएस। इ काँसे क वेदी आहाज क वेदी अउर यहोवा क मन्दिर क बीच रही। आहाज काँसे क वेदी क अपने वेदी क उत्तर कइँती रखेस। 15आहाज याजक ऊरिय्याह क आदेस दिहस। उ कहेस, “बिसाल वेदी क उपयोग भिंसारे क होमबलियन क बारइ क बरे, साँझ क अन्नबलि क बरे अउर इ देस क सबहि लोगन क पेयबलि बरे करा। होमबलि अउ बलियन क सारा खून बिसाल वेदी पइ छिछकारा। किन्तु मई काँसे क वेदी क उपयोग परमेस्सर स सवाल पूछइ बरे करब।” 16याजक ऊरिय्याह उ सबइ किहस जेका करइ बरे राजा आहाज आदेस दिहस।

17हुवाँ पइ काँसे क कवचवाली गाड़ियन अउ याजकन क हाथ धोवइ बरे चिलमचियन रहिन। तब राजा आहाज मन्दिर में प्रयुक्त काँसे क गाड़ियन क काट डाएस अउर ओनसे पल्लन निकार लिहस। उ गाड़ियन में स चिलमचियन क लइ लिहस। उ बिसाल टंकी क भी काँसे क ओन बर्धन स हटाइ लिहस जउन ओकरे नीचे खड़ी रहिन। उ बिसाल टंकी क एक ठु पाथर क चबूतरे पइ रखेस। 18कारीगरन सबित क सभा बरे मन्दिर क अंदर एक ठु ढकी जगह रहेन। आहाज सबित बरे ढकी जगह क भी हटाइ लिहस। आहाज इ सबइ चिजियन यहोवा क मन्दिर स लिहस। इ सबइ उ अस्सूर क राजा क कारण किहस।

19आहाज जउन कारज किहस उ सबइ “यहूदा क राजा लोगन क इतिहास” क किताबे में लिखे अहई। 20आहाज मरा अउ अपने पुरखन क संग दाऊद नगर में दफनावा गवा। आहाज क पूत हिजकिय्याह ओकरे पाछे नवा राजा भवा।

होसे इस्राएल पइ हुकूमत करब सुरू करत ह

17 एला क पूत होसे सोमरोन में इस्राएल पइ हुकूमत करब सुरू किहस। इ यहूदा क राजा आहाज क राजकाल क बारहवें बरिस में भवा। होसे नौ बरिस तलक सोमरोन में हुकूमत किहस। 2होसे उ सबइ कारज किहेस जेनका यहोवा बुरा कहे रहा। मुला होसे इस्राएल क ओतना बुरा राजा नाहीं रहा जेतने उ पचे राजा रहेन जउन ओकरे पहिले सासन किहे रहेन।

3अस्सूर क राजा सल्मनेसेर होसे क खिलाफ जुद्ध करइ आवा। सल्मनेसेर होसे क हराएस अउर होसे सल्मनेसेर क सेवक बन गवा। होसे सल्मनेसेर क अधीनस्थ कर देइ लाग।

4मुला पाछे अस्सूर क राजा क पता चला कि होसे ओकरे खिलाफ सड्यंत्र रचेस ह। होसे मिस्त्र क राजा क लगे मदद मँगइ बरे राजदूत पठएस। उ बरिस होसे अस्सूर क राजा क नाहीं पठएस जइसे उ हर बरिस पठवत रहा।

एह बरे अस्सूर क राजा होसे क बन्दी बनावा अउर ओका कैद में डाइ दिहस।

5तब अस्सूर क राजा इस्राएल क सबहि प्रदेशन पइ आक्रमण किहस। उ सोमरोन पहुँचा। उ तीन साल तलक सोमरोन क घेरे राखेस। 6अस्सूर क राजा इस्राएल पइ होसे क राजकाल क नवे बरिस में, सोमरोन पइ अधिकार जमाएस। अस्सूर क राजा इस्राएलियन क बन्दी क रूप में अस्सूर लइ गवा। उ ओनका हलह, हाबोर नदी क तट पइ जउन गोजान क नदी अहइ अउर मादियन क नगरन में बसाएस।

7इ सबइ घटना घटी काहेकि इस्राएलियन अपने परमेस्सर यहोवा क बिरूद्ध पाप किहे रहा। यहोवा इस्राएलियन क मिस्त्र स बाहेर लिआवा। यहोवा ओनका राजा फिरौन क चंगुल स बाहेर निकारेस। किन्तु इस्राएलियन दूसर देवतन क पूजब सुरू किहे रहेन। 8इस्राएली उहइ सब करइ लगे रहेन जउन दूसर राष्ट्र करत रहेन। यहोवा ओन लोगन क अपना देस छोड़इ क मजबूर किहे रहा जब इस्राएली आए रहेन। इस्राएलियन भी राजा लोगन स सासित होब पसन्द किहन, परमेस्सर स सासित होब नाहीं। 9इस्राएलियन गुप्त रूप स अपने यहोवा परमेस्सर क खिलाफ काम किहस। जेका ओनका नाहीं करइ चाही रहा।

इस्राएलियन अपने सब स नान्ह नगर स लइके सब स बड़के नगर तलक, अपने सबहि नगरन में ऊँच जगह बनाएस। 10इस्राएलियन हर एक ऊँची पहाड़ी पइ अउर सबहि हरियर बृच्छ क खाले स्मृति पाथर अउ असेरा स्तम्भ लगाएस।

11इस्राएलियन पूजा क ओन सबहि जगहन पइ सुगन्धि बारेस। उ पचे इ सबइ सबहि कारज ओन राष्ट्रन क तरह किहस जेनका यहोवा ओनके समन्वा देस तजइ क मजबूर किहे रहा। इस्राएलियन उ सबइ कारज किहेन जउन यहोवा क कोहाइ दिहस। 12उ पचे देवमूरतियन क सेवा किहन अउर यहोवा इस्राएलियन स कहे रहा, “तू पचन्क इ नाहीं करइ चाही।”

13यहोवा हर एक नबी अउर हर एक द्रस्टा क उपयोग इस्राएल अउ यहूदा क चितउनी देइ बरे किहस। यहोवा कहेस, “तू पचे बुरे करमन स दूर हटा। मोरे आदेसन अउर नेमन क पालन करा। ओन सबहि नेमन क पालन करा जेनका मई तोहरे पुरखन क दिहेउँ ह। मई अपने सेवक नबियन क उपयोग इ नेम तू पचन क देइ बरे किहेउँ।”

14लेकिन लोग एक नाहीं सुनेन। उ पचे अपने पुरखन क तरह बड़े हठी रहेन। ओनके पुरखा यहोवा, अपने परमेस्सर में पतियात नाहीं रहेन।

15लोग अपने पुरखन क संग यहोवा क कीन्ह गइ वाचा क रद्द कइ दिहस। अउर यहोवा क नेमन क मानइ स इन्कार किहन। उ पचे यहोवा क चितउनियन क सुनइ स इन्कार किहन। उ पचे व्यर्थ देवमूरतियन क अनुसरण किहन अउर खुद व्यर्थ बन गएन। उ पचे अपने चारिहुँ कइँती क राष्ट्रन क अनुसरण किहन। इ सबइ राष्ट्र उ करत रहेन जेका न करइ क चितउनी इस्राएल क लोगन क यहोवा दिहे रहा।

16लोग यहोवा, अपने परमेस्सर क आदेसन क पालन करब बंद कइ दिहस। उ पचे बछवन क दुइ मूरतियन बनाएन। उ पचे असेरा स्तम्भ बनाएन। उ पचे आकास क सबहिं नछत्रन क पूजा किहन अउर बाल क सेवा किहन। 17उ पचे अपने बेटवन -बिटियन क बलि आगी में दिहन। उ पचे जादू अउ प्रेत बिद्या क उपयोग भविस्स क जानइ बरे किहेन। उ पचे आपन क ओन चिजियन क करइ बरे बेचेस जेका यहोवा कहे रहा दुस्ट अहइ, जउन यहोवा क क्रधित कई दिहेन। 18एह बरे यहोवा इस्त्राएल पइ बहोत कोहाइ गवा अउर ओनका अपनी निगाह स दूर लइ गवा। यहूदा क परिवार समूह क अलावा कउनो इस्त्राएली बचा नाहीं रहा।

यहूदा क लोग भी अपराधी अहई

19मुला यहूदा क लोग भी यहोवा, अपने परमेस्सर क आदेसन क पालन नाहीं किहन। यहूदा क लोग भी इस्त्राएल क लोगन क तरह ही रहत रहेन।

20यहोवा इस्त्राएल क सबहिं लोगन क अस्वीकार किहस। उ ओन पइ बहोत बिपतियन दाएस। उ लोगन क ओनका छूटइ दिहस अउर अन्त में उ ओनका अपनी निगाह स लोकाए दिहस। 21यहोवा दाऊद क परिवार स इस्त्राएल क निकार दिहस। इस्त्राएलियन नबात क पूत यारोबाम क अपना राजा बनाएस। यारोबाम इस्त्राएलियन क यहोवा क अनुसरण करइ स दूर कइ दिहस। यारोबाम इस्त्राएलियन स एक भीषण पाप कराएस। 22इ तरह इस्त्राएलियन ओन सबहिं पापन क अनुसरण किहन जेनका यारोबाम किहे रहा। उ पचे एन पापन क करब तब तलक बंद नाहीं किहन। 23जब तलक यहोवा इस्त्राएलियन क अपनी निगाह स दूर नाहीं हटाएस। लोगन क बतावइ क बरे कि इ होइ, उ अपने नबियन क पठएस। एह बरे इस्त्राएली अपने देस स बाहेर अस्सूर पहुँचाए गएन अउर उ पचे आज तलक हुँवइ अहई।

सोमरोनी लोगन क आरम्भ

24अस्सूर क राजा बाबेल, कूता, अच्वा, हमात अउर सपवैम स लोगन क लिआवा। उ इस्त्राएलियन क हटावइ बरे ओन लोगन क सोमरोन में ठहरा दिहस। ओन लोग सोमरोन पइ अधिकार किहन अउर ओकरे चारिहुँ कईती क नगरन में रहइ लागेन। 25जब लोग सोमरोन में रहइ लागेन तउ उ पचे यहोवा क सम्मान नाहीं किहन। एह बरे यहोवा सिंहन क एन पइ आक्रमण क बरे पठएस। एन सिंहन ओनके कछू लोगन क मार डाएन। 26कछू लोग इ बात अस्सूर क राजा स कहेन। “उ सबइ लोग जेनका तू लइ गएन अउर सोमरोन क नगरन में बसाएन, उ देस क परमेस्सर क नेमन क नाहीं जानतेन। एह बरे उ पचे सिंहन क ओका मारइ दिहेन।”

27एह बरे अस्सूर क राजा इ आदेस दिहस: “तू कछू याजकन क सोमरोन स लिहे रह्या। मई जिन याजकन क बन्दी बनाएस रहेउँ ओनमी स एक क सोमरोन क वापस पठइ द्या। उ याजक क जाइ अउर हुवाँ रहइ द्या। तब उ

याजक लोगन क उ देस क देवता क नेम सिखाइ सकत हा।”

28एह बरे अस्सूरियन क जरिये सोमरोन स लिआए भए याजकन में स एक ठु बतेल में रहइ आवा। उ याजक लोगन क सिखाएस कि ओनका यहोवा क सम्मान कइसे करइ चाही।

29मुला ओन सबहिं रास्ट्रन अपने निजी देवता बनाएन अउर ओनका सोमरोन क लोगन क जरिये बनाए गए ऊँची जगहन पइ पूजा ठउरन में रखेस। ओन रास्ट्र इहइ किहन, जहाँ कहुँ भी उ पचे बसेन। 30बाबेल क लोग लबार देवता सुक्कोतबनोत बनाएन। कूत क लोग लबार देवता नेर्गल क बनाएन। हमात क लोगन असत्य देवता असीम क बनाएन। 31अच्वी लोग लबार देवता निभज अउर तर्ताकि बानएन अउर सपवमी लोग लबार देवतान अद्रम्मेलेक अउर अनम्मेलेक क सम्मान बरे अपने बच्चन क आगी में बारेन।

32मुला ओन लोग यहोवा क भी उपासना किहन। उ पचे अपने लोगन में स ऊँची जगहन बरे याजक चुनेन। इ सबइ याजक ओन पूजा क ठउरन पइ लोगन बरे बलि चढ़ावत रहेन। 33उ पचे यहोवा क सम्मान करत रहेन, मुला उ पचे अपने देवतन क भी सेवा करत रहेन। उ सबइ लोग अपने देवता क वइसी ही सेवा करत रहेन जइसी उ पचे ओन देसन में करत रहेन जहाँ स उ पचे लाए गए रहेन।

34आजु भी उ सबइ लोग वइसे ही रहत हीं जइसे उ पचे पहिले रहत रहेन। उ पचे यहोवा क सम्मान नाहीं करत अहई। उ पचे यहोवा क आदेसन अउर नेमन क पालन नाहीं करत हीं। उ पचे ओन नेमन या आदेसन क पालन नाहीं करत रहेन जेनका यहोवा याकूब (इस्त्राएल) क सन्तानन क दिहे रहा। 35यहोवा इस्त्राएल क लोगन क संग एक वाचा किहे रहा। यहोवा ओनका आदेस दिहस, “तू पचन्क दूसर देवतन क सम्मान नाहीं करइ चाही। तू पचन्क ओनकर पूजा या सेवा नाहीं करइ चाही या बलि भेंट नाहीं करइ चाही।

36किन्तु तू पचन्क यहोवा क अनुसरण करइ चाही। यहोवा उहइ परमेस्सर अहइ जउन तू पचन्क मिश्र स बाहेर लइ आवा। यहोवा आपन महान सक्ती क उपयोग तू पचन्क बचावइ बरे किहस। तू पचन्क यहोवा क सम्मान, उपासना करइ चाही अउर उहइ क बलि भेंट करइ चाही। 37तू पचन्क ओकरे ओन नेमन, विधियन, उपदेसन अउर आदेसन क पालन करइ चाही जेनका उ तोहरे पचन्क बरे लिखेस। तू पचन्क एनकार पालन सदा ही करइ चाही। तू पचन्क दूसर देवतन क सम्मान नाहीं करइ चाही। 38तू पचन्क उ वाचा क नाहीं बिसरइ चाही, जउन मई तोहरे संग किहेउँ। तू पचन्क दूसर देवतन क आदर नाहीं करइ चाही। 39तू पचन्क सिरिफ यहोवा, अपने परमेस्सर क ही सम्मान करइ चाही। तब उ तू पचन्क तोहरे पचन्क सबहिं दुस्मनन स बचाइ।”

40मुला इस्त्राएलियन एका नाहीं सुनेन। उ पचे उहइ करत रहेन जउन पहिले करत चले आवत रहेन। 41एह बरे अब तउ उ सबइ दूसर रास्ट्र यहोवा क सम्मान करत हीं, किन्तु उ पचे अपनी देवमूरतियन क भी सेवा करत हीं। ओनकर

पुत्र-पौत्र उहइ करत हीं, जउन ओनकर पुरखन करत रहेन। उ पचे आजु तलक उहइ काम करत हीं।

हिजकिय्याह यहूदा पइ आपन सासन करब सुरू करत ह

18 आहाज क पूत हिजकिय्याह यहूदा क राजा रहा। हिजकिय्याह इस्राएल क राजा एला क पूत होसे क राजकाल क तीसरे बरिस में सासन करब सुरू किहस। 2 हिजकिय्याह जब सासन करब सुरू कहिसह, उ पच्चीस बरिस क रहा। हिजकिय्याह यरूसलेम में उनतीस बरिस तलक सासन किहस। ओकर महतारी जकर्याह क बितिया, अबी रही।

3 हिजकिय्याह ठीक अपने पुरखा दाऊद क तरह उ सबइ कारज किहस जेनका यहोवा अच्छा बताए रहा।

4 हिजकिय्याह ऊँची जगहन क नस्ट किहस। उ स्मृति पाथरन अउ असेरा स्तम्भन क खंडित कइ दिहस। ओन दिनन इस्राएल क लोग मूसा क जरिये बनाए गए काँसे क साँप बरे सुगन्धि बारत रहेन। इ काँसे क साँप क नाउँ “नहुसतान” रहा। हिजकिय्याह इ काँसे क साँप क टूकन कइ डाँस काहेकि लोग उ साँप क पूजा करत रहेन।

5 हिजकिय्याह यहोवा, इस्राएल क परमेस्सर में भरोसा रखत रहा। यहूदा क राजा लोगन में स कउनो क संग चाहे उ ओकर पहिले रहेन या ओकर पाछे रहेन हिजकियाह क समानता नाही कीन्ह जा सकत रहा। 6 हिजकिय्याह यहोवा क बहोत भक्त रहा। उ यहोवा क अनुसरण करब नाही तजेस। उ ओन आदेसन क पालन किहस जेनका यहोवा मूसा क दिहे रहेन। 7 यहोवा हिजकिय्याह क संग रहा। हिजकिय्याह जउन कछू किहस, ओहमाँ उ सफल रहा।

हिजकिय्याह अस्सूर क राजा क विरुद्ध विद्रोह किहस। हिजकिय्याह अस्सूर क राजा क सेवा करब बंद कइ दिहस। 8 हिजकिय्याह लगातार गाज्जा तलक अउर ओकरे चारिहूँ कइँती क पलिस्तिन क पराजित किहस। उ सबहिं नान्ह स लइके बड़के पलिस्ती नगरन क पराजित किहस।

अस्सूरी सोमरोन पइ अधिकार करत हीं

9 अस्सूर क राजा सल्मनेसेर सोमरोन क खिलाफ जुद्ध करइ गवा। ओकर फउज नगर क घेर लिहस। इ हिजकिय्याह क यहूदा पइ राजकाल क चउथे बरिस में भवा। इ इस्राएल क राजा, एला क पूत होसे क भी सतवाँ बरिस रहा। 10 तीन बरिस पाछे सल्मनेसेर सोमरोन पइ अधिकार कइ लिहस। उ सोमरोन क यहूदा क राजा हिजकिय्याह क राजकाल क छठे बरिस में लइ लिहस। इ इस्राएल क राजा होसे क राजकाल क भी नवाँ बरिस रहा। 11 अस्सूर क राजा इस्राएलियन क बन्दी क रूप में अस्सूर लइ गवा। उ ओनका हलह, हाबोर नदी पइ (जउन कि गोजान नदी भी अहइ) अउर मादियन क नगरन में बसाएस। 12 इ भवा, काहेकि इस्राएलियन यहोवा, अपने परमेस्सर क आग्या क पालन नाही किहन। उ पचे यहोवा क वाचा क तोड़न। उ पचे ओन सबहिं नेमन क नाही मानेन जेनके बरे यहोवा आपन सेवक मूसा क आदेस दिहे रहा।

इस्राएल क लोग यहोवा क वाचा क नाही सुनेन अउर ओन कामन क नाही किहन जेनका करइ क सिच्छा ओहमाँ दीन्ह गइ रही।

अस्सूर यहूदा क लेइ क तैयार होत ह

13 हिजकिय्याह राजकाल क चौदहवें बरिस अस्सूर क राजा सन्हेरीब यहूदा क सबहिं सुदूढ़ नगरन क खिलाफ जुद्ध छेढ़इ गवा। सन्हेरीब ओन सबहिं नगरन क पराजित किहस। 14 तब यहूदा क राजा हिजकिय्याह अस्सूर क राजा क लाकीस में एक संदेसा पठाएस। हिजकिय्याह कहेस, “मई बुरा किहेउँ ह। मोका सान्ति स रहइ द्या। तब मई तू पचन क उ भुगतान करब जउन कछू तू चाहब्या।”

तब अस्सूर क राजा यहूदा क राजा हिजकिय्याह स गियारह टन चाँदी अउर एक टन सोना स जियादा माँगेस। 15 हिजकिय्याह सारी चाँदी जउन यहोवा क मन्दिर अउर राजा क खजानन में रही, उ सब दइ दिहस। 16 उ समइ हिजकिय्याह उ सोने क उतार लिहस जउन यहोवा क मन्दिर क दरवाजन अउ चउखटन पइ मढ़ा गवा रहा। राजा हिजकिय्याह एन दरवाजन अउर चउखटन पइ सोना मढ़वाए रहा। हिजकिय्याह इ सोना अस्सूर क राजा क दिहस।

अस्सूर क राजा अपने लोगन क यरूसलेम पठवत ह

17 अस्सूर क राजा अपने तीन बहोत जियादा महत्वपूर्ण सेनापतियन क एक बिसाल सेना क संग यरूसलेम में राजा हिजकिय्याह क लगे पठाएस। उ सबइ लोग लाकीस स चलन अउर यरूसलेम क गएन। उ सबई ऊपरी स्रोत क लगे छोटकी नहर क निचके खड़े भएन। (ऊपरी स्रोत धोबी तलक लइ जाइवाली सड़किया पइ अहइ।) 18 एन लोग राजा क बोलाएन। हिलकिय्याह क पूत एल्याकीम (एल्याकीम राजमहल क अधीच्छक रहा।) सेबना (सास्त्री) अउर आसाप क पूत योआह (अभिलेखपाल) ओनसे भेंटइ आएन।

19 सेनापतियन में स एक ओनसे कहेस, “हिजकिय्याह स कहा कि अस्सूर क महान सम्राट इ कहत ह,

केह पइ तू भरोसा करत अहा? 20 तू सिरिफ अरथहीन सब्द कह्या ह। तू कहत अहा “मोरे लगे उपयुक्त सलाह अउर सकती जुद्ध में मदद बरे अहइ।” किन्तु तू केह पइ पतियात अहा जउन तू मोरे विरुद्ध कीन्ह अहा? 21 तू टूट बेतं क कुबरी क सहारा लेत रहा अहा। इ कुबरी मिस्त्र अहइ। जदि कउनो मनई इ कुबरी क सहारा लेइ तउ इ टूटी अउर ओकरे टापे क बेधत भइ ओका घायल करी। मिस्त्र क राजा ओन सबहिं लोगन बरे वइसा ही अहइ, जउन ओह पइ भरोसा करत हीं। 22 होइ सकत ह, “तू कहा हम यहोवा, अपने परमेस्सर पइ पतियाइत ह।” किन्तु मई जानत हउँ कि हिजकिय्याह ऊँच जगहन अउर वेदियन क हटाइ दिहस जहाँ लोग यहोवा क उपासना करत रहेन। अउर याहूदा अउर यरूसलेम स कहेस, “तू पचनक सिरिफ यरूसलेम में वेदी क समन्वा उपासना करइ चाही।”

23अब अस्सूर क राजा हमरे सुआमी स इ वाचा करा। मई प्रतिग्या करत हउँ कि मई दुइ हजार घोड़न देव, जदि आप एन पइ चढ़इवाले घुड़सवारन क प्राप्त कइ सकब्या। 24मोरे सुआमी क अधिकारियन में स सब स निचले दर्जे क अधिकारी क भी तू हराइ नाही सकब्या। तू रथ अउर घुड़सवार सैनिक पावइ क बरे मिस्त्र पइ बिस्सास किहा ह। 25मई यहोवा क बिना यरूसलेम क बर्बाद करइ नाही आवा हउँ। यहोवा मोहसे कहेस ह, “इ देस क खिलाफ जा अउर एका नस्ट करा।”

26तब हिलकिय्याह क पूत एल्याकीम, सेब्ना अउर योआह प्रमुख सेनापती स कहेस, “कृपा कइके हम स अरामी में बातन करइँ। हम उ भाखा क समुझित ह। यहूदा क भाखा में हम लोगन स बातन न करी काहेकि देवार पइ क लोग हम लोगन क बातन सुन सकत हीं।”

27मुला रबसाके ओनसे कहेस, “मोर सुआमी मोका सिरिफ तू पचन्स अउर तोहरे पचन्क राजा स बातन करइ बरे नाही पठएस ह। मई ओन दूसर लोगन बरे भी कहत रहा अहउँ जउन देवारे पइ बइठे रहत हीं। उ पचे आपन मल अउ मूत्र तोहरे पचन्क संग खइहीं-पीइहीं।”

28तब सेनापति हिब्रू भाखा में जोर स चिचियान, “अस्सूर क महान सम्राट क इ सँदेसा सुना। 29सम्राट कहत ह, ‘हिलकिय्याह क अपने क गुमराह जिन करावइ द्या। उ तू पचन्क मोरी सकती स बचाइ नाही सकत।’ 30हिलकिय्याह क तोहका यहोवा में भरोसा न कराइ द्या, हिलकिय्याह कहत ह, ‘हम क यहोवा बचाइ लेइ। अस्सूर क सम्राट इ नगर क पराजित नाही कइ सकत ह।’ 31मुला हिलकिय्याह क एक न सुना।

“अस्सूर क सम्राट इ कहत ह: ‘मोरे संग सन्धि करा अउर मोहसे मिला। तब तू पचे हर एक अपनी अंगूर क बेलन अउर अपने अंजीर क पेड़न स खाइ सकत ह अउ अपने कुएँ स पानी पी सकत ह। 32इ तू पचे तब तलक कइ सकत ह जब तलक मई तोहका तोहरे पचन्क देस जइसे देस में न लइ न जाउँ। इ अन्न अउर नवी दाखरस, इ रोटी अउ अंगूर भरे खेत अउर जइतून एवं मधु क देस अहइ। तब तू पचे जिअत रहब्या, मरब्या नाही। मुला हिलकिय्याह क एक न सुना। उ तोहरे पचन्क गुमराह करइ चाहत ह। उ कहत रहत ह, ‘यहोवा हमका बचाइ लेइ।’ 33दूसर रास्ट्रन क देवतन आपन रास्ट्रन क अस्सूर क सम्राट स न बचाइ सकइहीं। 34हमात अउ अर्पाद क देवता कहीं अहइँ? सपवैम, हेना अउर इव्वा क देवता कहीं अहइँ? उ पचे मोहसे सोमरोन क न बचाइ सकेन। नाही। 35कउनो दूसरे देस में कउनो देवता अपनी भुइँया क मोहसे न बचाइ सका? यहोवा मोहसे यरूसलेम क न बचाइ सका।”

36मुला लोग चुप रहेन। उ पचे एक तु सब्द भी प्रमुख सेनापतिन क नाही कहेन काहेकि राजा हिलकिय्याह ओनका अइसा आदेस दइ रखे रहा। उ कहे रहा, “ओहसे कछू जिन कहा।”

37हिलकिय्याह क पूत एल्याकीम (एल्याकीम राजमहल क अधीच्छक रहा।) सेब्ना (सास्त्री) अउ आसप क पूत योआह (अभिलेखपाल) हिलकिय्याह क लगे लउटेन। ओकर कपड़ा फाटा भावा रहेन काहेकि उ परेसान रहेन। उ पचे हिलकिय्याह उ सब कहेन जउन अस्सूर क सेनापति कहे रहा।

हिलकिय्याह यसायाह नबी क लगे अपने अधिकारियन क पठवत ह

19 राजा हिलकिय्याह उ सबइ सुनेस अउर इ देखौवइ बरे कि उ बहोत दुःखी अहइ अउर घबरावा भावा अहइ, अपने ओढ़नन क फार डाएस अउर मोटे ओढ़नन पहिर लिहेस। तब उ यहोवा क मन्दिर में गवा।

2हिलकिय्याह एल्याकीम (एल्याकीम राजमहल क अधीच्छक रहा।) सेब्ना (सास्त्री) अउर याजकन क अग्रजन क आमोस क पूत यसायाह नबी क लगे पठएस। उ पचे मोटे ओढ़नन पहिरन जेहसे पता चलत रहा कि उ पचे परेसान अउर दुःखी अहइँ। 3उ पचे यसायाह स कहेन, “हिलकिय्याह इ कहत ह, ‘इ हमरे बरे संकट, दण्ड अउर अपमान क दिन अहइ। इ बच्चन क जनम देइ क समइ अहइ, मुला ओनका जनम देइ बरे कउनो सकती नाही अहइ। 4अस्सूर क राजा जिअत परमेस्सर क निन्दा करइ बरे आपन प्रमुख सेनापति क हमरे लगे पठएस ह। होइ सकत ह कि यहोवा तोहर परमेस्सर ओन सबहिं बातन क सुन लेइ। इ होइ सकत ह कि यहोवा इ प्रमाणित कइ देइ कि दुस्मन गलती पइ अहइ। एह बरे एन लोगन बरे पराथना करा जउन सबहिं तलक जिअत बचा अहइँ।”

5राजा हिलकिय्याह क अधिकारी यसायाह क लगे गएन। 6यसायाह ओनसे कहेस, “अपने सुआमी हिलकिय्याह क इ सँदेसा द्या: ‘यहोवा कहत ह। ओन बातन स डेराअ नाही जेनका अस्सूर क राजा क अधिकारियन मोर मसखरी उड़ावत भाए कहेन ह। 7मई हाली ही ओकरे मने में अइसी भावना पइदा करब जेहसे उ एक अफवाह सुनिके अपने देस वापिस जाइ क मजबूर होइ अउर मई ओका ओकरे देस में एक तु तरवार क घाट उतरवाइ देब।”

हिलकिय्याह क अस्सूर क राजा क पुन वितउनी

8प्रमुख सेनापति सुनेस कि अस्सूर क राजा लाकीस स चल पड़ा अहइ। एह बरे उ गवा अउर इ पाएस कि ओकर सम्राट लिब्ना क खिलाफ जुद्ध करत बाटइ। 9अस्सूर क राजा एक तु अफवाह कूस क राजा तिर्हाका क बारे में सुनेस। अफवाह इ रही “तिर्हाका तोहरे खिलाफ लड़इ आवा ह।”

एह बरे अस्सूर क राजा हिलकिय्याह क लगे सँदेसवाहक क एक सँदेसा क संग पठएस। 10यहूदा क राजा हिलकिय्याह स इ कहा:

‘जउने परमेस्सर में तू पतियात अहा ओका तू अपने क गुमराह करइ जिन द्या। उ कहत ह, “अस्सूर क राजा यरूसलेम क पराजित नाही करी।”

11तू ओन बातन क सुन्या ह जउन अस्सूर क राजा लोग दूसर सबहिं देसन क संग घटित किहन ह। हम ओनका पूरी तहर स नस्ट कीन्ह। तू भी नाहीं बचि पउब्या।

12ओन रास्ट्रन क देवता अपने लोगन क रच्छा नाहीं कइ सकेन। मोर पुरखन गोजान, हारान, रेसेप अउ तलस्सार में एदेन क लोगन क नस्ट किहन। 13हमात अपादि, अउर सपवैम नगर क राजा कहाँ अहई? हेना अउ इला क राजा? उ पचे सबहिं समाप्त होइ गएन ह।”

हिजकिय्याह यहोवा स पराथना करत ह

14हिजकिय्याह संदेसबाहकन स पत्र पाप्त किहेस अउ ओनका बाँचेस। तब हिजकिय्याह यहोवा क मन्दिर तलक गवा अउर यहोवा क समन्वा पत्रन क बिखरेस। 15हिजकिय्याह यहोवा क समन्वा पराथना किहेस अउर कहेस, “यहोवा इस्त्राएल क परमेस्सर। तू करूब सरगदूतन पइ सम्राट क तरह बइठत ह। तू ही सिरिफ सारी पृथ्वी क राज्जन क परमेस्सर अहा। तू पृथ्वी अउ अकासे क बनाया। 16यहोवा मोर पराथना सुना। यहोवा अपनी आँखिन खोला अउ इ पत्र क लखा। ओन सबदन क सुना जेनका सन्हेरीब जीवित परमेस्सर क अपमान करइ बरे पठाएस ह। 17यहोवा, इ फुरइ अहइ। अस्सूर क राजा लोग एन सबहिं रास्ट्रन क नस्ट किहन। 18उ पचे रास्ट्रन क देवतन क आगी में लोकाइ दिहन। किन्तु उ पचे सच्चे देवता नाहीं रहेन। उ पचे सिरिफ काठ अउ पाथर क मूर्ति रहेन जेनका मनइयन बनाइ रखे रहेन। इहइ कारण रहा कि अस्सूर क राजा ओनका नस्ट कइ सकेन। 19एह बरे यहोवा, हमार परमेस्सर, अब हमका अस्सूर क राजा स बचा। तब पृथ्वी क सारे राज्ज समुझिहीं कि यहोवा, सिरिफ तू ही परमेस्सर अहा।”

परमेस्सर हिजकिय्याह क जवाब दिहस

20आमोस क पूत यसायाह हिजकिय्याह क इ सँदेस पठाएस। उ कहेस, “यहोवा, इस्त्राएल क परमेस्सर इ कहत ह, ‘तू मोहसे अस्सूर क राजा सन्हेरीब क खिलाफ पराथना किहा ह। मई तोहार पराथना सुनि लिहेउँ ह।’

21“सन्हेरीब क बारे में यहोवा क इ सँदेसा अइसा अहइ: ‘सिथ्योन क कुँवरी बिटिया तोहका तुच्छ समुझत ह, उ तोहार मजाक उड़ावत ह। यरूसलेम बिटिया तोहरे पीठ क पाछे तोहार मजाक उड़ावत ह।

22तू केकर अपमान किहया? तू केकर मजाक उड़ाया? केकरे खिलाफ तू बातन किहया? तू अइसे बातन किहा जइसा कि तू इस्त्राएल क परम पवित्र स महान अहइ।

23तू अपने सँदेसबाहकन क यहोवा क अपमान करइ क पठया। तू कहया, “मई अपने अनेक रथन सहित ऊँचे पर्वतन तलक आया। मई लबानोन में भीतर तलक आएउँ। मई लबानोन क उच्चतम देवदारू क बृच्छन, अउ लबानोन क उत्तम चीड़ क बृच्छन क काटा। मई लबानोन क सब स ऊँच अउर सब स घन बने में घुसेउँ।

24मई खुद कुअँन खोदेस अउ विदेसन क पानी पिएउँ। मई मिन्न क नदियन क झुराएउँ अउर उ देस क रउँदेउँ।”

25मुला का तू नाहीं अनक्या? “मई (परमेस्सर) बहोत पहिले इ योजना बनाए रहेउँ, पुराने जमाने स ही ह सबइ जोजनन बनाइ दिहे रहेउँ, अउर अब मई ओका ही पूरी होइ देत हउँ। मई तू पचन्क मजबूत नगरन क ढेर बनावइ दिहेउँ।

26नगर में रहइवाले मनई कउनो ताकत नाहीं रखतेन। उ सबइ लोग डरे भए अउर सरमिन्दा रहेन। लोग खेतन क जंगली पौधन क तरह होइ गएन, जउन बढ़इ क पहिले ही मर जात हीं, इ लोग उ घास क तरह अहइ जउन छत पइ उगत ह अउर जे बढ़इ स पहिले ही मुड़झा जात ह।

27मई जानत हउँ तू कब उठत ह अउर तू कब बइठत ह। बइठा, मई जानत हउँ कि तू कब जुद्ध करइ जात अहा अउर कब घरे आवत अहा, मई जानत हउँ कि तू अपने क कब मोरे खिलाफ करत अहा।

28तू मोरे खिलाफ गया मई तोहरे घमण्ड क सब्द सुनेउँ। एह बरे मई आपन अंकुस तोहरे नाके में डाउब। अउर मई आपन लगाम तोहरे मुँह में डाउब। तब मई तोहका पाछे लउटाउब अउर उ राहे लउटाउब जेहसे तू आवा रहया।”

हिजकिय्याह क यहोवा क सँदेसा

29“मई तोहार मदद करब, एकर सँदेसा इ होइ: इ बरिस तू उहइ अन्न खाब्या जउन अपने आप उगी अउर अगले बरिस तू उहइ अन्न खाब्या जउन उ बिआ स पइदा होइ। मुला तू बिआ बोउब्या अउर तीसरे बरिस में आपन फसल कटब्या। तू अंगूरे क बेलन खेतन में लगउब्या अउर ओनसे अंगूर खाब्या। 30अउर यहूदा क परिवारे क जउन लोग बचि गवा अहई उ पचे फुन फूली फरिहीं ठीक वइसे ही जइसे पौधा अपनी जड़न मजबूत कइ लेइ पइ ही फरत ह 31काहेकि यरूसलेम में रहइवालन कछू लोग जिअत रहब्या। सिथ्योन पर्वत पइ रहइवालन में स कछू लोग बच जाईं। यहोवा क जोस इ सब करावाएब।”

32“अस्सूर क सम्राट क बारे में यहोवा अइसा कहत ह:

उ इ नगर में नाहीं आई। उ इ नगर में एक ठु भी बाण नाहीं चलाइ। उ इ नगर क खिलाफ ढाल क संग नाहीं आइ। उ इ नगर पइ आक्रमण क माटी क टीलन नाहीं बनाइ।

33उ उहइ राहे स लउटी जेहसे उ आवा। उ इ नगर में नाहीं आई। इ यहोवा कहत ह।

34मई अपने बरे अउर अपने सेवक दाऊद बरे इ नगर क रच्छा करब अउर बचाइ लेब।”

अस्सूरी फउज बर्बाद होइ गइ

35उ राति यहोवा क दूत अस्सूरी डेरा में गवा अउर एक लाख पचासी हजार लोगन क मार डाएस। भिन्सोर क जब लोग उठेन तउ उ पचे सारी ल्हासन लखेन।

36एह बरे अस्सूर क राजा सन्हेरीब चला गवा अउर नीनवे वापस पहाँचा, अउर हुवई रुक गवा। 37एक दिना सन्हेरीब मन्दिर में अपने देवता निसरोक क पूजा करत रहा।

ओकरे पूतन अद्रेम्मेलेक अउर सरेसेर ओका तरवार स मार डाएन। तब उ पचे अरारात प्रदेस में पराइ निकरेन अउर सन्हेरीब क पूत एसहर्ददोन ओकरे पाछे नवा राजा भवा।

हिजकिय्याह बीमार पड़ा अउर मरइ क भवा

20 उ समइ हिजकिय्याह बीमार पड़ा अउर लगभग मरि ही गवा। आमोस क पूत नबी यसायाह हिजकिय्याह स भेंटेस। यसायाह हिजकिय्याह स कहेस, “यहोवा कहत ह, ‘अपने परिवार क लोगन क बरे वसीयत नामा लिख ल्या। तू मर जाब्या। तू जिअत नहीं रहब्या।”

2हिजकिय्याह आपन मुँहना देवारे कइँती कइ लिहस। उ यहोवा स पराथना किहस अउर कहेस, 3“यहोवा याद रखा कि मई पूरे हिरदइ क संग सच्चाई स तोहार सेवा किहेउँ ह। मई उ किहेउँ ह जेका तू नीक बताया ह।” तब हिजकिय्याह फूट-फूटके रोइ पड़ा।

4बीच क आँगन क यसायाह क छोड़इ क पहिले यहोवा क सँदेसा ओका मिला। यहोवा कहेस, 5“लउटा अउर मोरे लोगन क अगुवा हिजकिय्याह स कहा, ‘यहोवा तोहार पुरखा दाऊद क परमेस्सर इ कहत ह, मई तोहार पराथना सुनि लिहेउँ ह अउर तोहार आँसू लखेउँ ह। एह बरे मई तोहका स्वस्थ करब। तीसरे दिन तू यहोवा क मन्दिर में जाब्या। 6अउर मई तोहरी जिन्नगी क पन्द्रह बरिस बढ़ाइ देब। मई अस्सूर क सम्राट क सक्ती स तोहका अउर इ नगर क बचाउब। मई अइसन अपने बरे अउर अपने सेवक दाऊद क बरे इ करब।”

7तब यसायाह कहेस, “अंजीर क एक मिस्त्रन बनावा अउर एका घाव क जगह पड़ लगावा।”

एह बरे उ पचे अंगीरे क मिस्त्रन लिहन अउर हिजकिय्याह क घाव क जगह पड़ लगाएन। तब हिजकिय्याह स्वस्थ होइ गवा।

हिजकिय्याह क स्वस्थ होइ क संकेत

8हिजकिय्याह यसायाह स कहेस, “एकर संकेत का होइ कि यहोवा मोका स्वस्थ करी अउर मई यहोवा क मन्दिर में तीसरे दिन जाब?”

9यसायाह कहेस, “तू का चाहत अहा? का छाया दस पैड़ी आगे जाइ या दस पैड़ी पाछे जाइ? इहइ यहोवा क तोहरे बरे संकेत अहइ कि जउन यहोवा कहेस ह, ओका उ करी।” 10हिजकिय्याह जवाब दिहेस, “छाया क बरे दस पैड़ियन आगे जाब सहल बाटइ। नहीं, छाया क दस पैड़ी पाछे हटइ द्या।”

11तब नबी यसायाह यहोवा स पराथना किहस अउर अहाज क धूप-घड़ी पई यहोवा छाया क दस पैड़ियन पाछे हटाएस। उ ओन पैड़ियन पड़ लउटी जेन पड़ इ पहिले रही।

हिजकिय्याह अउ बाबेल क मरई

12ओन दिनन बलदान क पूत बरोदक बलदान बाबेल क राजा रहा। उ पत्रन क संग एक टु भेंट हिजकिय्याह क पठाएस। बरोदक-बलदान इ एह बरे किहस काहेकि उ सुनेस कि हिजकिय्याह बीमार होइ गवा ह। 13हिजकिय्याह बाबेल

क लोगन क सुआगत किहस अउर उ अपने महल क सबहिं कीमती चिजियन क ओनका देखाएस। उ ओनका चाँदी, सोना, मसालन, कीमती इत्र, अस्त्र-सस्त्र अउर अपने खजाने क हर एक चीज देखाएस। हिजकिय्याह क पूतरा महल अउर राज्ज में अइसा कछू नहीं रहा जेका उ ओनका न देखाए होइ।

14तब यसायाह नबी राजा हिजकिय्याह क लगे आवा अउर ओहसे पूछेस, “इ सबइ लोग का कहत रहेन? उ पचे कहीं स आए रहेन?”

हिजकिय्याह कहेस, “उ पचे बहोत दूर क देस बाबेल स आए रहेन।”

15यसायाह पूछेस, “उ पचे तोहरे महल में का लखेन ह?”

हिजकिय्याह जवाब दिहेस, “उ पचे मोरे महल क सबहिं चिजियन लखेन ह। मोरे खजानन में अइसा कछू नहीं बाटइ जेका मई ओनका न देखॉया होइ।”

16तब यसायाह हिजकिय्याह स कहेस, “यहोवा क हिआँ स इ सँदेसा क सुना। 17उ समइ आवति अहइ जब तोहरे महल क सबहिं चिजियन अउर उ सबइ सबहिं चिजियन जेनका तोहार पुरखन आजु तलक सुरच्छित रखेन ह, बाबेल स लइ जाइ जइहीं। कछू भी नहीं बची। यहोवा इ कहत ह। 18बाबेल तोहरे पूतन क लइ लेइहीं अउर तोहार पूत बाबेल क राजा क महल में खोजे बने रहिहीं।”

19तब हिजकिय्याह यसायाह स कहेस, “यहोवा क हिआँ स इ सँदेसा नीक अहइ।” हिजकिय्याह सोचेस, “कम स कम मोर जीवनकाल में सात्ति अउर रच्छा रहइहीं।”

20हिजकिय्याह जउन बढ़के कारज किहस, जेनमें जलकुण्ड पड़ कीन्ह गए काम अउ नगर में पानी लिआवइ बरे नहर बनावइ क काम सामिल अहइ “यहूदा क राजा लोगन क इतिहास” क किताबे में लिखे गए अहइ। 21हिजकिय्याह मरा अउ अपने पुरखन क संग दफनावा गवा अउर हिजकिय्याह क पूत मनस्से ओकरे पाछे नवा राजा भवा।

मनस्से अपना कुसासन यहूदा पड़ आरंभ करत ह

21 मनस्से जब हुकुमत करइ लाग तब उ बारह बरिस क रहा। उ पचपन बरिस तलक यरूसलेम में हुकुमत किहस। ओकरी महतारी क नाउँ होसीबा रहा।

2मनस्से उ सबइ काम किहस जेनका यहोवा बुरा बाताए रहा। मनस्से उ सबइ भयंकर काम करत रहा जउन दूसर रास्ट्र करत रहेन। (अउर यहोवा ओन रास्ट्रन क अपना देस तजइ पर मजबूर किहे रहा जब इस्त्राएली आए रहेन।) 3मनस्से फुन ओन ऊँच जगहन क बनाएस जेनका ओकर बाप हिजकिय्याह बर्बाद किहे रहा। मनस्से भी ठीक इस्त्राएल क राजा अहाब क तरह बाल क सम्मान देई बरे वेदियन बनाएस अउर असेरा क सम्मान बरे स्तम्भ बनाएस। मनस्से अकासे में तारन क पूजा करब सुरू किहस। 4मनस्से यहोवा क मन्दिर में झूठे देवतन क पूजा क वेदियन बनाएस। (इ उहइ ठउर अहइ जेकर बारे में यहोवा बातन करत रहा जब उ कहे रहा, “मई अपना नाउँ यरूसलेम में रखब।”) 5मनस्से यहोवा क मन्दिर क दुइ आँगनन में अकासे क

नछत्रन बरे बेदियन बनाएस। 6मनस्से अपने पूत क बलि दिहस अउर ओका वेदी पइ बारेस। मनस्से भविस्स जानइ क कोसिस मँ कइउ तरीकन क उपयोग किहस। उ ओझा लोगन अउ भूत सिद्धियन स मिला।

मनस्से जियादा स जियादा उ करत गवा जेका यहोवा बुरा कहे रहा। इ यहोवा क कोहाइ दिहस। 7मनस्से असेरा क खुदी भइ मूर्ति बनाएस। उ इ मूर्ति क मन्दिर मँ धरेस। यहोवा दाऊद अउ दाऊद क पूत सुलैमान स इ मन्दिर क बारे मँ कहे रहा: “मइँ यरूसलेम क पूरे इस्त्राएल क नगरन मँ स चुनेउँ ह। मइँ आपन नाउँ यरूसलेम क मन्दिर मँ सदा ही बरे रखब। 8मइँ इस्त्राएल क लोगन स उ भुइँया जेका मइँ ओनके पुरखन क दइ दिहे रहेउँ, क तहइ बरे नाहीं कहब। मइँ लोगन क ओनके देस मँ रहइ देब, जदि उ पचे ओन सब चिजियन क पालन करिहीं जेनका आदेस मइँ दिहेउँ ह अउर जउन उपदेस मोर सेवक मूसा ओनका दिहस ह।” 9किन्तु लोग परमेस्सर क एक न सुनेन। मनस्से ओन लोन स पाप कराएस। इस्त्राएलियन आवइ क पहिले कनान मँ रहइ वाले सबहिँ रास्ट्र जेतना बुरा करत रहेन मनस्से ओहसे भी जियादा बुरा किहे रहा। यहोवा ओन रास्ट्रन क नस्ट कइ दिहे रहा जब इस्त्राएल क लोग इ भुइँया लेइ आए रहेन।

10यहोवा अपने सेवक, नबियन क उपयोग इ किहइ बरे कहस: 11“यहूदा क राजा मनस्से एन घिनौने पापन क किहेस ह अउर अपने स पहिले रहइवाले एमोरियन स भी बड़की बुराई किहेस ह। मनस्से अपने देवमूरतियन क साथ यहूदा स भी पाप कराएस ह। 12एह बरे इस्त्राएल क परमेस्सर यहोवा करत ह, ‘लखा! मइँ यरूसलेम अउ यहूदा पइ ऐँतनी विपतियन ढाउब कि जदि कउनो मनई एनके बारे मँ सुनी तउ ओकर हिरदइ बइठ जाइ। 13मइँ यरूसलेम क माप पई सोमरोन क माप पंक्ति अउर अहाब क परिवार क साहुल क उपयोग करब। कउनो मनई तस्तरी क पोंछत ह अउर तब उ ओका उलटिके रख देत ह। मइँ यरूसलेम क साथ भी अइसा ही करब। 14हुवौँ मोर कछू मनई फुन भी बचे रहि जइहीं। किन्तु मइँ ओन मनइयन क तजि देब। मइँ ओनका ओनके दुस्मनन क दइ देब। ओनकर दुस्मन ओनका बन्दी बनइहीं, उ पचे ओन कीमती चिजियन क तरह होइहीं जेनका फउजी जुद्ध मँ प्राप्त करत हीं। 15काहे? काहेकि मोर लोग उ सबइ काम किहन जेनका मइँ बुरा बताएउँ। उ पचे मोका उ दिन स कोहाइ दिहन ह जउने दिन स ओनकर पुरखन मिस्त्र स बाहेर आएन। 16अउर मनस्से अनेक निरपराध लोगेन क मारेस। उ यरूसलेम क एक सिरे से दूसर सिरे तलक खून स भरि दिहेन। इ सारे पाप ओन पापन क अलावा अहईँ जेका उ यहूदा स कराएस। मनस्से यहूदा स उ कराएस जेका यहोवा बुरा बताए रहा।”

17ओन पापन सहित अउर भी जउन कार्य मनस्से किहस, उ सबहिँ “यहूदा क राजा लोगन क इतिहास” क किताबे मँ लिखे अहईँ। 18मनस्से मरा अउर अपने पुरखन क संग दफनावा गवा। ओका उज्जा क बाग मँ दफनावा गवा जउन कि मनस्से क महल मँ रहा। मनस्से क पूत आमोन ओकरे पाछे नवा राजा भवा।

आमोन क अल्पकालीन सासन

19आमोन जब हुकूमत करब सुरू कहस तउ उ बाईस बरिस क रहा। उ यरूसलेम मँ दुइ बरिस तलक सासन किहस। ओकरी महतारी क नाउँ मसुल्लेमेत रहा, जउन योव्बा स हारूस क बिटिया रही।

20ठीक अपने बाप क तरह आमोन उहइ काम किहस, जेनका यहोवा बुरा कहे रहा। 21आमोन ठीक अपने बाप क तरह रहत रहा। आमोन ओनहीं देवमूरतियन क पूजा अउ सेवा करत रहा जेनकर ओकर बाप करत रहा। 22आमोन अपने पुरखन क परमेस्सर यहोवा क तज दिहस अउर उ तरह नाहीं रहा जइसा यहोवा चाहत राहा।

23आमोन क सेवकन ओकर खिलाफ सडयंत्र रचेन अउर ओका ओकरे महल मँ मार डाएस। 24साधारण जनता ओन सबहिँ अधिकारियन क मार डाएस जउन आमोन क खिलाफ सडयंत्र रचे रहेन। तब लोग आमोन क पूत योसियाह क ओकरे पाछे नवा राजा बनाएन।

25जउन दूसर काम आमोन किहस उ सबइ “यहूदा क राजा लोगन क इतिहास” क किताबे मँ लिखे अहईँ। 26आमोन उज्जर क बाग मँ अपनी कब्र मँ दफनावा गवा। आमोन क पूत योसियाह नवा राजा बना।

योसियाह यहूदा पइ अपना सासन सुरू करत ह

22 योसियाह जब हुकूमत करब सुरू किहस तउ उ आठ बरिस क रहा। उ इकतीस बरिस तलक यरूसलेम मँ हुकूमत किहस। ओकर महतारी बोस्कत क अदाया क बिटिया, यदीदा रही। 2योसियाह उ सबइ काम किहेस जेनका यहोवा नीक बताए रहा। योसियाह परमेस्सर क अनुसरण अपने पुरखन दाऊद क तरह किहेस। योसियाह ठीक वइसे ही किहेस जइसे परमेस्सर चाहत रहा।

योसियाह मन्दिर क मरम्मत क आदेस देत ह

3अपने राजकाल क अट्ठारहवे बरिस मँ, अपने सचिव, मसुल्लाम क पोता व असल्याह क पूत सापान क यहोवा क मन्दिर मँ पठएस। योसियाह कहेस, 4“महायाजक हिलकिय्याह क लगे जा। ओहसे कहा कि ओका उ गनइ अउर लइ लेइ चाही जेका लोब यहोवा क मन्दिर मँ लिआएस ह। द्वारपालन उ धने क लोगन स बटोर रहेन। 5याजकन क इ धन ओन कारीगरन क देइ मँ उपयोग करइ चाही जउन यहोवा क मन्दिर क मरम्मत करत हीं। याजकन क इ धन क ओन लोगन क देइ चाही जउन यहोवा क मन्दिर क देखभाल करत हीं। 6बढ़ई, पाथरे क देवार बनावइवाले मिस्त्री अउर पाथर क काटइवालन क तनख्वाह बरे धने उपयोग करा। मन्दिर मँ लगावइ बरे इमारती लकड़ी अउ कटे पाथर क बेसहइ मँ धने क उपयोग करा। 7उ धने क जिन गना जेका तू मजदूरन क द्या। ओन मजदूरन पइ बिस्सास कीन्ह जाइ सकत ह।”

व्यवस्था क किताब मन्दिर मँ मिली

8महायाजक हिलकिय्याह सचिव सापान स कहेस, “लखा! मोका व्यवस्था क किताब यहोवा क मन्दिर मँ मिली ह।”

हिलकिय्याह इ पुस्तक क सापान क दिहस अउर सापान एका बाँचेस।

9-10 सास्त्री सापान, राजा योसिय्याह क लगे आवा अउर ओका बताएस जउन भवा रहा। सापान कहेस, “तोहरे सेवकन मन्दिर स मिले धने क लिहस अउर ओका ओन कारीगरन क दिहस जउन यहोवा क मन्दिर क काम करत रहेन। अउर जउन मन्दिर क देख-रेख करत रहेन।” तब सास्त्री सापान राजा स कहेस, “याजक हिलकिय्याह मोका इ किताब दइ दिहस ह।” तब सापान राजा क किताब बाँचिके सुनाएस।

11 जब राजा व्यवस्था क कितावे क सब्दन क सुनेस, उ आपन दुःख अउर परेसानी परगठ करइ क बरे अपने ओढ़नन क फारि डाएस। 12 तब राजा याजक हिलकिय्याह, सापान क पूत अहीकाम, मीकायाह क पूत अकबोर, सास्त्री सापान अउर राजसेवक असाया क आदेस दिहस। 13 राजा योसिय्याह कहेस, “जा, अउर यहोवा स पूछा कि हम क का करइ चाही। यहोवा क समन्वा मोरे बरे, लोगन क बरे अउर पूरे यहूदा क बरे याचना करा। इ मिली भइ पुस्तक क सब्दन क बारे में पूछा। यहोवा हम लोगन पइ कोहान अहइ काहेकि हमार पुरखन इ किताबे क सिच्छा क नाहीं मानेन। उ पचे हम लोगन क बरे लिखी सब बातन क नाहीं किहन।”

योसिय्याह अउर नबिया हुल्दा

14 एह बरे याजक हिलकिय्याह, अहीकाम, अकबोर, सापान अउर असाया, नबिया हुल्दा क लगे गएन। हुल्दा हर्हस क पोता व तिकवा क पूत सल्लूम क मेहरारू रही। उ याजक क ओढ़नन क देखभाल करत रहा। हुल्दा यरूसलेम क दूसरे हिस्सा में रहत रही। उ पचे गएन अउर उ पचे हुल्दा स बातन किहन।

15 तब हुल्दा ओनसे कहेस, “यहोवा इस्राएल क परमेस्सर कहत हः उ मनई स कहा जउन तू पचन्क मोरे लगे पठाएस हः 16 यहोवा इ कहत हः मई इ जगह पइ बिपत्ति लावत हउँ अउर ओन मनइयन पइ भी जउन हिआँ रहत हीं। इ सबइ उ सब बिपत्तियन अहई जेनका उ किताबे में लिखा गवा ह जेका यहूदा क राजा बाँचेस ह। 17 यहूदा क लोग मोका त्याग दिहन ह अउर दूसर देवतन क बरे सुगन्धि बारेन ह। उ पचे मोका बहोत किरोधित किहन ह। उ पचे बहोत स देवमूरतियन बनाएन। इहइ कारण अहइ कि मई इ जगह क खिलाफ आपन किरोध परगट करब। मोर विरोध उ आगी क तरह होइ जउन बुझाई न जाइ सकी।”

18 “यहूदा क राजा योसिय्याह स इ कहा जउन तोहका यहोवा स सलाह लेइ बरे भजेस ह। ‘यहोवा इस्राएल क परमेस्सर उ कहेस जउन तू सुने। तू उ सुन्या जउन मई इ जगह अउर इ जगह पइ रहइवाले लोगन क बारे में कहेउँ। तोहार हिरदइ कोमल अहइ। 19 जब तू इ सुन्या तउ तोहका दुःख भवा। मई कहेउँ कि भयंकर घटनन इ जगह क संग घटित होइहीं। अउर तू अपने दुःख क परगट करइ बरे अपने ओढ़नन क फारि डाया अउर तू रोवइ लाग्या। इहइ कारण अहइ कि मई तोहार बात सुनेउँ।’ यहोवा इ कहत ह,

20 मई तू पचन्क तोहरे पुरखन क संग मिलइ देब्या। तू पचे मरब्या अउर अपनी कब्र में सान्तिपूर्वक जाब्या। एह बरे तोहार पचन्क अँखियन ओन बिपत्तियन क नाहीं लिखहीं जेनका मई इ जगह पइ ढावइ जात अहउँ।”

तब याजक हिलकिय्याह, अहीकाम, अकबोर, सापान अउर असाया राजा स इ सब कहेस।

लोग नेम क सुनत हीं

23 राजा योसिय्याह यहूदा अउर इस्राएल क सबहिं प्रमुखन से आवइ अउर ओहसे मिलइ क बरे कहेस। 2 तब राजा यहोवा क मन्दिर गवा। सबहिं यहूदा क लोग अउर यरूसलेम में रहइवाले लोग ओकरे संग गएन। याजक, नबी, अउर सबहिं मनई, सब स जियादा महत्वपूर्ण स सब स कम महत्वपूर्ण सबहिं ओकरे संग गएन। तब उ “साच्छीपत्र क पुस्तक” बाँचेस। इ उहइ, “नेम क पुस्तक रही” जउन यहोवा क मन्दिर स मिली रही। योसिय्याह उ पुस्तक क इ तरह बाँचेस कि सबहिं लोग ओका सुनि सकई।

अराजा स्तम्भ क लगे खड़ा भवा अउर उ यहोवा क संग वाचा किहस। उ यहोवा क अनुसरण करब, ओकर आग्या, वाचा अउर नेमन क पालन करब अंगीकार किहस। उ पूरी आत्मा अउर हिरदइ स इ करब अंगीकार किहस। उ किताबे में लिखी वाचा क मानब अंगीकार किहस। सबहिं लोग इ परगट करइ क बरे खड़े भएन कि उ पचे राजा क वाचा क समर्पन करत ही।

4 तब राजा महायाजक हिलकिय्याह दूसर याजकन अउर द्वारपालन क बाल, असेरा अउर अकासे क नछयन क सम्मान बरे बनी सबहिं चिजियन क यहोवा क मन्दिर क बाहेर लिआवइ क आदेस किहस। तब योसिय्याह ओन सबहिं क यरूसलेम क बाहेर किद्रोन क खेतन में बार दिहस। तब राखी क उ पचे बेतेल लइ गएन।

5 यहूदा क राजा लोग कछू सामान्य मनइयन क याजकन क रूप में सेवा बरे चुने रहा। इ सबइ लोग हारून क परिवार स नाहीं रहेन। उ पचे झूठे याजक यहूदा क सबहिं नगरन अउर यरूसलेम क नजिक क नगरन में ऊँच जगहन पइ सुगन्धि बारत रहेन। उ पचे बाल, सूरज, चाँद, नछत्रन क समूह अउर अकासे क सबहिं नछत्रन क सम्मान में सुगन्धि बारत रहेन। किन्तु योसिय्याह ओन बनावटी याजकन क रोक दिहस।

6 योसिय्याह असेरा स्तम्भ क यहोवा क मन्दिर स हटाएस। उ असेरा स्तम्भ क नगर क बाहेर किद्रोन घाटी क लइ गवा अउर ओका हुवई बार दिहस। तब उ जरे खण्डन क कूटेस अउर उ राखी क साधारण लोगन क कब्रन पइ छितराएस।

7 तब राजा योसिय्याह यहोवा क मन्दिर में बने पुरुसगामियों क कोठान क गिरवाइ दिहस। ओन घरन में मेहररूनन झूठी देवी असीराह क सम्मान देइ बरे तम्बू क छोटे अवरण बिना करत रहिन।

8-9 उ समइ याजक बलि यरूसलेम क नाहीं लिआवत रहेन अउर ओका मन्दिर क वेदी पइ नाहीं चढ़ावत रहेन।

याजक सारे यहूदा क नगरन में रहत रहेन अउर उ पचे ओन नगरन में ऊँच नगरियन पइ सुगन्धि भारत अउ बलि भेंट करत रहेन। उ पचे ऊँची जगह गेबा स लइके बर्सेबा तलक हर जगह रहेन। याजकन अखमिरी रोटी यरूसलेम में मन्दिर में याजकन बरे बनावा गवा स्थान में एका खावइ क बजाए ओन सहरन में साधारण लोगन क संग खाएँस। परन्तु राजा योसिय्याह ओन ऊँची जगहन क नस्ट कइ डाएँस अउर याजकन क यरूसलेम लइ गवा। योसिय्याह ओन ऊँची जगहन क भी नस्ट किहे रहा जउन यहोसू दुआर क लगे बाई ओर रहेन। (यहोसू नगर क प्रसासक रहा।)

10तोपेत "हिन्नोम क पूत क घाटी" में एक जगह रही जहाँ लोग अपने बच्चन क मारत रहेन अउर लबार देवता मोलेक क सम्मान में ओनका वेदी पइ भारत रहेन। योसिय्याह उ जगहिया क ऐतना भ्रस्ट कइ डाएँस कि लोग उ जगहिया क प्रयोग न कइ सकइँ। 11बीते समइ में यहूदा क राजा लोग यहोवा क मन्दिर क दुआर क लगे कछू घोड़न अउर रथन रख छोड़े रहेन। इ नतन्मेलेख नाउँ क महत्वपूर्ण अधिकारी क कमरे क लगे रहा। घोड़न अउ रथन सूर्य देव क सम्मान बरे रहेन। योसिय्याह घोड़न क हटाएँस अउर रथे क बार दिहस।

12बीते समइ में यहूदा क राजा लोग अहाब क इमारत क छते पइ बेदियन बनाइ रखे रहेन। राजा मनस्से भी यहोवा क मन्दिर क दुइ आँगनन में वेदियन बनाइ रखे रहा। योसिय्याह ओन वेदियन क तोरि डाएँस अउर ओनकर टूटे टूकन क किद्रोन क घाटी में लोकाइ दिहस।

13बीते समइ में राजा सुलेमान यरूसलेम क निअरे विध्वंसक पहाड़ी क दक्खिन में कछू ऊँच जगह बनाए रहा। राजा सुलेमान पूजा क ओन जगहन क, सीदोन क लोग जउन घिनौनी चीज अस्तोरेत क पूजा करत रहेन, ओकरे सम्मान बरे बनाए रहेन। सुलैमान मोआब लोगन क जरिये पूजित घिनौनी चीज कमोस क सम्मान बरे भी एक ठु वेदी बनाए रहा अउर राजा सुलैमान अम्मोन लोगन क जरिये पूजित घिनौनी चीज मिल्कोम क सम्मान बरे एक ऊँची जगह बनाए रहा। किन्तु राजा योसिय्याह ओन सबहिँ पूजा ठउरन क नस्ट कइ दिहस। 14राजा योसिय्याह सबहिँ स्मृति पाथरन अउ असेरा स्तम्भन क तोड़ डाएँस। तब उ ओन जगहन क ऊपर मृतकन क हाइन क छितराएँस।

15योसिय्याह बेतेल क वेदी अउ ऊँच जगहन क भी तोरि डाएँस। नबात क पूत यारोबाम इ वेदी क बनाए रहा। यारोबाम इस्त्राएँल स पाप कराए रहा। योसिय्याह ऊँची जगहन अउ वेदी दुइनउँ इ तोरि डाएँस। योसिय्याह वेदी क पाथर क टूकन कइ दिहस। तब उ ओनका कूटिके धुरि बनाइ दिहस अउर उ असेरा स्तम्भ क बार दिहस। 16योसिय्याह चारिहुँ कइँती नजर दउड़ाएँस अउर पहाड़े पइ कब्रन क लखेस। उ मनइयन क पठाएँस अउर पचे ओन कब्रन स हाइन लइ आएँन। तब उ वेदी पइ हाइन क बारेस। इ तरह योसिय्याह वेदी क भ्रस्ट कइ दिहस। इ उहइ तरह भवा जइसा यहोवा क सँदेसा क परमेस्सर क जन घोसित किहे रहा। परमेस्सर क जन एकर घोसणा तब किहन जब यारोबाम वेदी क बहल में खड़ा रहा।

तब योसिय्याह चारिहुँ कइँती निगाह दउड़ाएँस अउर परमेस्सर क जन क कब्र खोदेस।

17योसिय्याह कहेस, "जउने स्मारक क मई लखत हउँ, उ का अहइ?"

नगर क लोग ओहसे कहेन, "इ परमेस्सर क उ जने क कब्र अहइ जउन यहूदा स आवा रहा। इ परमेस्सर क जन उ सब बताए रहा जउन आप बेतेल में वेदी क संग किहन। उ इ सबइ बातन बहोत पहिले बताए रहा।"

18योसिय्याह कहेस, "परमेस्सर क जन क अकेला छोड़ द्या। ओकरी हाइन क जिन हटावा।" एह बरे उ पचे हाइन तजि दिहन, अउर साथ ही सोमरोन स आएँ परमेस्सर क जन क हाइन भी छोड़ दिहन।

19योसिय्याह सोमरोन नगर क सबहिँ ऊँच नगरन क पूजागृह क भी नस्ट कइ दिहस। इस्त्राएँल क राजा लोग पूजा गृहन क बनाए रहेन अउर उ यहोवा क बहोत कोहाइ दिहे रहेन। योसिय्याह ओन पूजा-गृहन क वइसे ही नस्ट किहेस जइसे उ बेतेल क पूजा क जगहन क नस्ट किहस।

20योसिय्याह सोमरोन में रहइवाले ऊँची जगहन क सबहिँ पुरोहितन क मार डाएँस। उ ओनहीं वेदियन पइ पुरोहितन क बध किहस। उ मनइयन क हाइन वेदियन पइ बारेस। इ तरह उ पूजा इ ओन जगहन क भ्रस्ट किहस। तब उ यरूसलेम में लउटि आवा।

यहूदा क लोग फसल पर्व मनावत हीँ

21तब राजा योसिय्याह सबहिँ लोगन क हुकुम दिहस। उ कहेस, "यहोवा अपने परमेस्सर क फसह पर्व मनावा। एका उहइ तरह मनावा जइसा साच्छीपत्र क पुस्तक में लिखा अहइ।"

22लोग इ तरह फसह पर्व क तब स नाहीं मनाए रहेन जब स इस्त्राएँल पइ न्यायाधीस सासन करत रहेन। इस्त्राएँल क कउनो राजा या यहूदा क कउनो भी राजा कबहुँ फसल पर्व क ऐतना बड़का उत्सव नाहीं मनाए रहा। 23एह बरे ओन लोग यहोवा बरे फसह पर्व योसिय्याह क राजकाल क अट्टारहवें बरिस में यरूसलेम में मनाएँन।

24योसिय्याह ओझा लोगन क, भूतसिच्छकन, गृह-देवतन, देवमूरतियन अउर यहूदा अउ इस्त्राएँल में जउन घिनवनी चिजियन क पूजा होत रही, सब क नस्ट कइ दिहस। योसिय्याह इ यहोवा क मन्दिर में याजक हिलकिय्याह क मिली पुस्तक में लिखे गएँ परमेस्सर क नेमन क अनुसार किहस।

25एकरे पहिले योसिय्याह क समान कबहुँ कउनो राजा नाहीं भवा रहा। योसिय्याह यहोवा कइँती, अपनी पूरी आतिमा अउर अपनी पूरी सक्ती स गवा। योसिय्याह क तरह कउनो राजा मूसा क सबहिँ नेमन क अनुसरण नाहीं किहे रहा। उ समइ स योसिय्याह क तरह क कउनो दूसर राजा कबहुँ नाहीं भवा।

26किन्तु यहोवा यहूदा क लोगन पइ किरोध करब तजेस नाहीं। यहोवा अबहुँ भी ओन पइ सारे कामन क बरे कोहान रहा जेनका मनस्से किहे रहा। 27यहोवा कहेस, "मई इस्त्राएँलियन क ओनकर देस तजइ क मजबूत किहेउँ। मई

यहूदा क संग वइसा ही करब मई यहूदा क अपनी आँखिन स ओझल करब। बेसक मई यरूसलेम अउर एकर मन्दिर क चुना रहा जेकर बारे मँ मई कहे रहेउँ, 'मोर नाउँ हुवाँ रहब मई यरूसलेम अउर मन्दिर क रद्द कइ देब।"'

28योसियाह जउन दूसर काम किहस उ सबइ "यहूदा क राजा लोगन क इतिहास" क किताबे मँ लिखे अहई।

योसियाह क मउत

29योसियाह क समइ मिस्त्र क राजा फिरौन नको अस्सूर क राजा क खिलाफ जुद्ध करत परात नदी क गवा। राजा योसियाह नको स भेंटइ मगिद्दो गवा। फिरौन नको योसियाह क लखि लिहस अउर तब ओका मार डाएस। 30योसियाह क अधिकारियन ओकरे बदन क एक तु रथे मँ धरेन अउर ओका मगिद्दो स यरूसलेम लइ गएन। उ पचे योसियाह क ओकरी अपनी कब्र मँ दफनाएन।

तब साधारण लोग योसियाह क पूत यहोआहाज क लिहन अउर ओकर राज्ज अभिसेक कइ दिहन। उ पचे यहोआहाज क नवा राजा बनाएस।

यहोआहाज यहूदा क नवा राजा बनत ह

31यहोआहाज तेईस बरिस क रहा, जब उ राजा बना। उ यरूसलेम मँ तीन महीने तलक हुकूमत किहस। ओकर महतारी लिब्ना क यिर्मयाह क बिटिया हमूतल रही। 32यहोआहाज उ सबइ काम किहस जेनका यहोवा बुरा बताए रहा। यहोआहाज उ सब ही काम किहस जेनका ओकरे पुरखन किहे रहेन।

33फिरौन नको यहोआहाज क हमात प्रदेश मँ रिबला मँ कैद रखेस। एह बरे यहोआहाज यरूसलेम मँ सासन नाहीं कइ सका। फिरौन नको यहूदा क सात हजार पाँच सौ पौण्ड चाँदी अउर पचहतर पौण्ड सोना देइ क मजबूर किहस।

34फिरौन नको योसियाह क पूत एल्याकीम क नवा राजा बनाएस। एल्याकीम अपने बाप योसियाह क जगह लिहस। फिरौन-नको एल्याकीम क नाउँ बदलिके यहोयाकीम कइ दिहस अउर फिरौन-नको यहोआहाज क मिस्त्र लइ गवा। यहोआहाज मिस्त्र मँ मरा। 35यहोयाकीम फिरौन क सोना अउ चाँदी दिहस। किन्तु यहोयाकीम साधारण जनता स बसूलेस अउर उ धने क उपयोग फिरौन नको क देइ मँ किहस। एह बरे हर मनई चाँदी अउ सोना क अपने हीसे क भुगतान किहस अउर राजा यहोयाकीम फिरौन क उ धन दिहस।

36यहोयाकीम जब राजा भवा तउ उ पच्चीस बरिस क रहा। उ गियारह बरिस तलक यरूसलेम मँ राज्ज किहस। ओकर महतारी रूमा क अदायाह क बिटिया जबीदा रही। 37यहोयाकीम उ सबइ काम किहस जेनका यहोवा बुरा बताए रहा। यहोयाकीम उ सब ही काम किहस जउन ओकरे पुरखन किहे रहेन।

राजा नबूकदनेस्सर यहूदा आबत ह

24 यहोयाकीम क समइ मँ बाबेल क राजा नबूकदनेस्सर यहूदा देस मँ आवा। यहोयाकीम नबूकदनेस्सर क सेवा तीन बरिस तलक किहस। तब यहोयाकीम नबूकदनेस्सर

क खिलाफ होइ गवा अउर ओकरे विरूद्ध विद्रोह कइ दिहा। 2यहोवा कसदियन, अरामियन, मोआबियन अउ अम्मोनियन क दलन क यहोयाकीम क विरूद्ध लइइ बरे पठएस। यहोवा ओन दलन क यहूदा क नस्ट करइ बरे पठएस। इ वइसा ही भवा जइसा यहोवा करे रहा। यहोवा अपने सेवक नबियन क उपयोग उ कहइ बरे किहे रहा।

3यहोवा ओन घटनन क यहूदा क संग घटित होइ क आदेस दिहस। इ तरह उ ओनका अपनी निगाह स दूर करी। उ इ एन पापन क कारण किहस जउन मनस्से किहस। 4यहोवा इ एह बरे किहस कि मनस्से बहोत स निरपराध मनइयन क मार डाएस। मनस्से ओनके खून स यरूसलेम क भरि दिहस अउर यहोवा ओन पापनक छिमा नाहीं कइ चाहत रहा।

5यहोयाकीम जउन दूसर काम किहस उ सबइ "यहूदा क राजा लोगन क इतिहास" क किताबे मँ लिखे अहई।

6यहोयाकीम मरा अउर अपने पुरखन क संग दफनावा गवा। यहोयाकीम क पूत यहोयाकीम ओकरे पाछे नवा राजा भवा।

7मिस्त्र क राजा आपन सीमा स ओग अउर जियादा जमीन पइ कब्जा नाहीं कइ पाएस, काहेकि बाबेल क राजा मिस्त्र क नाला स परात नदी तलक सारे देस पइ, अधिकार कइ लिहे रहा। ओन जगहन पइ पहिले भी मिस्त्र क राजा क सासन रहा।

नबूकदनेस्सर यरूसलेम पइ अधिकार करत ह

8यहोयाकीम जब हुकूमत करइ लाग तब उ अट्टारह बरिस क रहा। उ यरूसलेम मँ तीन महीने तलक हुकूमत किहस। ओकर महतारी यरूसलेम क एलनातान क बिटिया नहुस्ता रही। 9यहोयाकीम ओन कामन क किहस जेनका यहोवा बुरा बताए रहा। उ उ सब ही सब काम किहस जउन ओकर बाप किहे रहेन।

10उ समइ बाबेल क राजा नबूकदनेस्सर क अधिकारी यरूसलेम आएन अउर हमला करइ बरे नगर क घेरि लिहस। 11तब बाबेल क राजा नबूकदनेस्सर नगरे मँ आवा। जब ओकर अधिकारियन एका हमला बरे घेरइ राखत रहेन। 12यहूदा क राजा यहोयाकीम बाबेल क राजा स भेंटइ बाहेर आवा। यहोयाकीम क महतारी, ओकर अधिकारी, प्रमुख अउ दूसर अधिकारी भी ओकरे संग गएन। तब बाबेल क राजा यहोयाकीम क बन्दी बनाइ लिहस। इ नबूकदनेस्सर क सासनकाल क अठवाँ बरिस रहा।

13नबूकदनेस्सर सारा खजाना लइ लिहस जउन यहोवा क मन्दिर मँ अउर राजा क महल मँ रहा। उ नबूकदनेस्सर ओन सबहिं स्वर्ण-पात्रन क टूकन मँ काट डाएस जेनका इस्त्राएल क राजा सुलैमान यहोवा क मन्दिर क बरे बनाए रहा। इ वइसा ही भवा जइसा यहोवा कहे रहा।

14नबूकदनेस्सर यरूसलेम क सबहिं लोगन क बन्दी बनाएस। उ सबहिं प्रमुखन अउर दूसर धनी लोगन क बन्दी बनाइ लिहस। उ दस हजार लोगन क धरेस अउर ओनका बन्दी बनाएस। नबूकदनेस्सर सबहिं कुसल मजदूरन अउर कारीगरन क लइ लिहस। साधारण लोगन मँ स सबन त गरीब लोगन क अलावा नगर मँ कउनो भी नाहीं बचे

रहेन। 15नबूकदनेस्सर यहोयाकीन क बाबेल लइ गवा। नबूकदनेस्सर राजा क महतारी, ओकर मेहररूअन, अधिकारी अउर देस क प्रमुख लोगन क भी लइ गवा। नबूकदनेस्सर ओनका यरूसलेम स बाबेल बन्दी क रूप में लइ गवा। 16बाबेल क राजा साढ़े सात हजार फउजी अउर एक हजार कुसल मजदूर अउर कारीगर भी लइ गवा। इ पचे सबहिं मनई प्रसिच्छित फउजी रहेन अउर जुद्ध में लइ सकत रहेन। बाबेल क राजा ओनका बन्दी क रूप में बाबेल लइ गवा।

राजा सिदकिय्याह

17बाबेल क राजा मत्तन्याह क नवा राजा बनाएस। मत्तन्याह यहोयाकीन क चाचा रहा। बाबेल क राजा मत्तन्याह क नाउँ बदलिके सिदकिय्याह रख दिहस। 18सिदकिय्याह जब सासन करब सुरू किहस तउ उ इक्कीस बरिस क रहा। उ गियारह बरिस यरूसलेम में सासन किहस। ओकर महतारी लिब्ना क यिर्मयाह क बिटिया हमूतल रही। 19सिदकिय्याह उ सबइ काम किहेस जेनका यहोवा बुरा बताए रहा। सिदकिय्याह उ सब ही सारे काम किहेस जउन यहोयाकीम किहे रहा। 20यहोवा यरूसलेम अउ यहूदा पइ ऐतना कोहाइ गवा कि उ ओनका दूर लोकाइ दिहस।

नबूकदनेस्सर क जरिये सिदकिय्याह क हुकूमत क समाप्ति

उ समइ सिदकिय्याह बाबेल क राजा क खिलाफ बिद्रोह कइ दिहस।

25 1एह बरे बाबेल क राजा नबूकदनेस्सर अपनी सारी फउज क संग यरूसलेम क खिलाफ जुद्ध करइ आवा। सिदकिय्याह क राज्ज क नौवें बरिस क दसवें महीने क दसवें दिन इ घटना घटित भइ। नबूकदनेस्सर यरूसलेम क चारिहुँ कइँती डेरा डाएस। तब उ पचे यरूसलेम क चारिहुँ कइँती ढलवान खड़ी किहन। 2नबूकदनेस्सर क फउज यरूसलेम क चारिहुँ कइँती सिदकिय्याह क यहूदा में सासनकाल क गियारहवे बरिस तलक बनी रही। 3उ नगर में भुखमरी क दसा बद स बदतर होत जात रही। चउथे महीने क नौवें दिन साधारण लोगन बरे कछू भी भोजन नहीं रहि गवा रहा।

4नबूकदनेस्सर क फउज नगर प्राचीर में एक ठु छेद बनाएस। उ राति क राजा सिदकिय्याह अउर ओकर सारे फउजी पराइ गएन। उ पचे राजा क बाग क सहारे दुइ देवान क दुआर स बच निकरेन। बाबेल क फउज नगर क चारिहुँ कइँती रही। किन्तु सिदकिय्याह अउर ओकर फउज रेगिस्ताने कइँती क सड़क पइ पराइ निकरेन। 5बाबेल क फउज सिदकिय्याह क पाछा किहस अउर ओका यरीहो क लगे रेगिस्तान में पकड़ लिहस। सिदकिय्याह क सारी फउज पराइ गइ अउर ओका अकेला छोड़ दिहस।

6बाबेल सिदकिय्याह क रिबला में बाबेल क राजा क लगे लइ गएन। बाबेल क राजा सिदकिय्याह क दण्ड देइ क निर्णय लिहस। 7उ पचे सिदकिय्याह समन्वा ओकरे पूतन क मार डाएस। तब उ पचे सिदकिय्याह क आँखिन निकारि

लिहन। उ पचे ओका जंजीरे में जकरेन अउर ओका बाबेल लइ गएन।

यरूसलेम क नस्ट कइ दीन्ह गवा

8नबूकदनेस्सर क बाबेल क सासनकाल क उन्नीसवे बरिस क पाँचवे महीने क सतवे दिन नबूजरदान यरूसलेम आवा। नबूकदनेस्सर क अंगरच्छकन क नायक नबूजरदान रहा। 9नबूजरदान यहोवा क मन्दिर अउ राजमहल बार डाएस। नबूजरदान यरूसलेम क सबहिं घरन क भी बार डाएस। उ बड़की इमारतन क भी बार डाएस।

10तब नबूजरदान क संग जउन बाबेल क फउज रही उ यरूसलेम क चारिहुँ कइँती क देवान क महराइ दिहस। 11अउर नबूजरदान ओन सबहिं लोगन क धरेस जउन तब तलक नगर में बचे रह गए रहेन। नबूजरदान सबहिं लोगन क बन्दी बनाइ लिहस अउर ओनका भी जउन आत्मसमर्पण करइ क कोसिस लिहन। 12नबूजरदान सिरिफ साधारण मनइयन में सब स गरीब लोगन क हुवाँ रहइ दिहस। उ ओन गरीब लोगन क हुवाँ अंगूर अउर दूसर फसलन क देखरेख क बरे रहइ दिहस।

13बाबेल क फउजी यहोवा क मन्दिर क काँसे क वस्तुअन क टूकन कइ डाएन। उ पचे काँसे स स्तम्भन, काँसे क गाड़ी क अउर काँसे क बिसाल सरोवर क भी टूकन कइ डाएन, तब बाबेल क फउजी ओन काँसे क टूकन क बाबेल लइ गएन। 14कसदियन बर्तन, बेलचे, दीप-झारू चम्मच अउर काँसे क बर्तन जउन यहोवा क मन्दिर में काम आवत रही, क भी लइ गवा। 15नबूजरदान सबहिं कढ़ाहियन अउ पियालन क लइ लिहस। उ जउन सोने क बने रहेन ओनका सोना क बरे अउर जउन चाँदी क बने रहेन ओनका चाँदी क बरे लिहस। 16-17जउन चिजियन उ लिहस ओनकर सूची इ अहइ: दुइ काँसे क खम्भा, एक हौज अउर गाड़ियन जेका सुलैमान क जरिये यहोवा क मन्दिर बरे बनावा गवा रहा। इन चिजियन में लगा काँसा ऐतना भारी रहा कि ओका तोला नहीं जाइ सकत रहा। हर एक स्तम्भ लगभग सताइस फुट ऊँचा रहा। स्तम्भन क सीर्स काँसे क बने रहेन। हर एक सीर्स साढ़े चार फुट ऊँचा रहा। हर एक सीर्स पइ जाल अउर अनार क नमूना बना रहा। एकर सब कछू काँसे क बना रहा। दुइनउँ खम्भन पइ एक ही प्रकार क आहतियन रहिन।

बन्दी बनावा गए यहूदा क लोग

18तब नबूजरदान मन्दिर स महायाजक सरायाह, दूसरा याजक सपन्याह अउर तीन दुआर रच्छनन क लिहस।

19नगर में नबूजरदान एक ठु अधिकारी क लिहस। उ सेना क सेनापति रहा। नबूजरदान राजा क पाँच सलाहकारन क भी लिहस जउन नगर में पाए गएन। अउर उ सेनापति क सचिव क लिहस। सेनापति क सचिव उ मनई रहा जउन साधारण लोगन क गणना करत रहा अउर ओनमें स कछू क फउजी क रूप में चुनत रहा। नबूजरदान साठ दूसर लोगन क भी लिहस जउन नगर में पाए गएन।

20-21 सेनापति तब नबूजरदान एन सबहिं लोगन क रिबला में बाबेल क राजा क सम्नवा लइ गवा। बाबेल क राजा हमात क छेत्र रिबला में एनका मार डाएस। इ तरह यहूदा क लोगन क कैदी बनाइके ओनका, ओनके देस स निर्वासित कीन्ह गवा।

गदल्याह, यहूदा क सासक

22 बाबेल क राजा नबूकदनेस्सर यहूदा देस में कछू लोगन क छोड़ दिहे रहा। उ अहीकाम क पूत गदल्याह क यहूदा क ओन लोगन पइ राजपाल बनाएस। अहीकाम सापान क पूत रहा।

23 जब फउज क सबहिं सेनापतियन अउ सिपाहियन सुनेन कि बाबेल क राजा गदल्याह क राजपाल बनाएस ह। तउ उ पचे गदल्याह क लगे मिस्पा में आएन। फउजी सेनापतियन में नतन्याह क पूत इस्माएल, कारेहू क पूत योहानान, नतोपाई तन्हूमेत क पूत सरायाह अउ माकाई क पूत याजन्याह रहेन। 24 तब गदल्याह इ फउजे क सेनापतियन अउर ओनके मनइयन अउर ओनके मनइयन क बचन दिहस। गदल्याह ओनसे कहेस, “बाबेल क अधिकारियन स जिन डेराअ। इ देस में रहा अउर बाबेल क राजा क सेवा करा। तब तोहरे पचन्क संग सब कछू ठीक रही।”

25 किन्तु सतवें महीने राजा क परिवारे क एलीसामा क पोता व नतन्याह क पूत इस्माएल दस मनसेधुअन क संग आवा अउ गदल्याह क मार डाएस। उ पचे मिस्पा में गदल्याह क संग जउन यहूदी अउ कासदी रहेन, ओनका भी मार डाएस। 26 तब सबहिं लोग सब स कम महत्वपूर्ण अउर सब स जियादा अउ सेना क नायक मिस्त्र क पराइ गएन। उ पचे एह परे पराइन् कि उ पचे कसदियन स ससान रहेन।

27 पाछे राजा एवील्मरोदक बाबेल क राजा बना। उ यहोयाकीन क जेल स आज़ाद कई दिहस। इ यहूदा क राजा यहोयाकीन क बन्दी बनाए जाइ क सैतीसवें बरिस में भवा। इ एवील्मरोदक क सासन सुरू करइ क बारहवें महीने क सत्ताइसवें दिन भवा। 28 एवील्मरोदक यहोयाकीन स दयापूर्वक बातन किहस। एवील्मरोदक यहोयाकीन क बाबेल में रहइवाले ओकरे सबहिं साथी राजा लोगन स जियादा ऊँच स्थान प्रदान किहस। 29 एवील्मरोदक यहोयाकीन क बन्दीगृह क वस्त्रन क पहिरब बन्द करवाएस। यहोयाकीन एवील्मरोदक क संग एक ही मेज पइ खाएस। उ अपनी बाकी जिन्नगी में हर एक दिन अइसा ही किहस। 30 इ तरह राजा एवील्मरोदक यहोयाकीन क जिन्नगी भर नियमित रूप स रह दिन क भोजन दिहस।

License Agreement for Bible Texts

World Bible Translation Center

Last Updated: September 21, 2006

Copyright © 2006 by World Bible Translation Center

All rights reserved.

These Scriptures:

- Are copyrighted by World Bible Translation Center.
- Are not public domain.
- May not be altered or modified in any form.
- May not be sold or offered for sale in any form.
- May not be used for commercial purposes (including, but not limited to, use in advertising or Web banners used for the purpose of selling online ad space).
- May be distributed without modification in electronic form for non-commercial use. However, they may not be hosted on any kind of server (including a Web or ftp server) without written permission. A copy of this license (without modification) must also be included.
- May be quoted for any purpose, up to 1,000 verses, without written permission. However, the extent of quotation must not comprise a complete book nor should it amount to more than 50% of the work in which it is quoted. A copyright notice must appear on the title or copyright page using this pattern: "Taken from the HOLY BIBLE: EASY-TO-READ VERSION™ © 2006 by World Bible Translation Center, Inc. and used by permission." If the text quoted is from one of WBTC's non-English versions, the printed title of the actual text quoted will be substituted for "HOLY BIBLE: EASY-TO-READ VERSION™." The copyright notice must appear in English or be translated into another language. When quotations from WBTC's text are used in non-saleable media, such as church bulletins, orders of service, posters, transparencies or similar media, a complete copyright notice is not required, but the initials of the version (such as "ERV" for the Easy-to-Read Version™ in English) must appear at the end of each quotation.

Any use of these Scriptures other than those listed above is prohibited. For additional rights and permission for usage, such as the use of WBTC's text on a Web site, or for clarification of any of the above, please contact World Bible Translation Center in writing or by email at distribution@wbtc.com.

World Bible Translation Center

P.O. Box 820648

Fort Worth, Texas 76182, USA

Telephone: 1-817-595-1664

Toll-Free in US: 1-888-54-BIBLE

E-mail: info@wbtc.com

WBTC's web site – World Bible Translation Center's web site: <http://www.wbtc.org>

Order online – To order a copy of our texts online, go to: <http://www.wbtc.org>

Current license agreement – This license is subject to change without notice. The current license can be found at: <http://www.wbtc.org/downloads/biblelicense.htm>

Trouble viewing this file – If the text in this document does not display correctly, use Adobe Acrobat Reader 5.0 or higher. Download Adobe Acrobat Reader from: <http://www.adobe.com/products/acrobat/readstep2.html>

Viewing Chinese or Korean PDFs – To view the Chinese or Korean PDFs, it may be necessary to download the Chinese Simplified or Korean font pack from Adobe. Download the font packs from: <http://www.adobe.com/products/acrobat/acrrasianfontpack.html>